

# **ҳаким назир**

**А с а р л а р**



**Б Е Ш Т О М Л И К**

**I Т О М**

Ўзбекистон ЛКСМ Марказий Комитети  
„ЁШ ГВАРДИЯ“ нашриёти

Т о ш к е н т — 1977



---

ЁНАР ДАРЁ

қисса

**Б**аҳорни ҳеч ким менчалик яхши кўрмас. Ахир ҳамма ўйин-кулгилар, ҳамма соз нарсаларни бошлаб келадиган баҳор-да! Еру кўк офтоб нурига чўмилади, табиат кулаётгандай. Офтоб шуълалари тонгдаёқ ётган ўйнинг дера-засидан барала кириб келади. Юзларингда ўйнаб, «Шундоқ вақтда ётаверасанми, тура қол!» дегандай қитиқлайди, сени гашқарига етаклайди. Ташқарида бўлса ўрик, шафтолилар бирин-кетин гулга киряпти, қадрдон асалариларни ўзига имляпти. Далалар, қирларда чучмома, лолалар очилиб, ҳаммани сайрга таклиф қиляпти. Ана шу лола, чучмомалар қўйнига отила қолсаму қўзилардай сакраб-сакраб ўйнасан, қушлардай тўйиб-тўйиб сайрасам дейсан. Бувим ҳар нарсага от қўяди. Баҳорни «ёзнинг карнайчиси», дейди. Тўғри-да, карнай тўй-томушадан хабар берганидай, баҳор ёзги каникулдан дарак беради. Лагерлар, саёҳатларни эсга тушира бошлайди. Эҳ, тезроқ кела қол ёз, дейсан. Бирпас ҳам уйда ўтиргинг келмай қолади.

Мана бугун каравотчамни ҳовузча лабига, ўрик дарахти тагига олиб чиқдим. Қўм-кўк осмонга қараб соғ ҳаводан мириқиб эмиш, ариқдаги сувнинг жилдирашини, ўрик гулларига дув ёлишган асалариларнинг ғув-ғувини эшитиб ётиш қандай маза-я!

Қулоғимга қушнинг ёқимли сайрагани эштилгандай бўлади. Қўзимга ўрик тепасида қуш уяси кўринади. Кечагина ўзим ўрнатган уяча эмас, каттакон, саватдай уя! Ундан чиройли лочин бошини чиқариб мени имлайди. Мен лип этиб ёнига чиқаман. Лочинни оламан деб қўйл чўзаман, қўлим унинг кучли чангалига тушиб қолади. У қанотини ёзади-да, темир қанот боласи билан мени кўтарганча виз этиб учуб кетади. Боласи шўхлик қилиб бағридан чиқиб кетмоқчи. Она қуш қўймайди. Боласи бўлса ўзим учаман деб типирчилайверади, ахиро онасидан ажралади, мени ҳам ажратади. Кейин икко-

вимиз ҳам учолмасдан пастга шўнг’иб туша бошлаймиз. Она қуш жон ҳолатда кетимиздан ёрдамга шошилади. Шу тушишда нақ ўтакам ёрилай деб чинқирдим-да, ўзимни ўнглайман деб бир интилувдим, шалоп этиб ҳовузчага қуладим. Югурга келган бувим:

— Ҳа, ҳа болажоним, нимадан қўрқдинг? — деганча мени ҳовузчадан тортиб олди. — Қўявер, сув ёруғлик, — деб юз-қўлларимни артди. Лой бўлган майка, иштонимни алмаштириди.

Ҳушим жойига келгандан кейин, тушимни айтиб берган эдим, бувим кулди:

— Баҳор келиб, хаёлинг ҳар ёққа чочилиб юрганиди ўзи. Тушингда ҳам ўнгингдагидай ойингни сўзига кирмагансан-да, ўзингча шошилгансан. Шошган ўрдак ҳам боши билан, ҳам думи билан шўнгийди, дейишади. Хайриятки, сувга тушдинг. Яхшиликка кўринади тушинг...

Бувим аломат-да, дарров гап топади. Пайтдан фойдаланиб, шошқалоқлигимни юзимга солди. Майли, ишқилиб ойимнинг олдида юзимга солмаса бўлгани.

Ўрикда яна қуш чирқиллади. Бу, албатта тушимдаги лочин эмас. Чиройли, саргимтири, жажжи саъвача. Уяча атробида пир-пир учиб, уни текшириди. Ёқди шекилли, секин туйнугидан мўралади. Ҳа, ичи кенг, ёруғ, энг муҳими, мушукдан, лочиндан хавфсиз эканини кўрди шекилли, саъвача севинди. Севинчидан яна чир-чирлаб, уячага кириб чиқди. Бир айланиб келиб яна уячага қўнди. Буни кўриб, мендан олдин синглим Попукнинг севинганини кўрсангиз.

— Уямда қуш телди, уямда қуш телди! Қушни обейинг, ата, қушни обейинг!

— Қушни олиб бўлмайди. Тегсанг қочиб кетади. Кейин қайтиб келмайди, — дейман. Қани кўнса!

Попук шунаقا. Нимани кўрса ёпишиб олади. Унинг дастидан бирор фидирак фидиратомайди, самокат учолмайди. Дарров: «Менгаям! Менгаям», деб хархаша қиласди. Ўзи жимитдай, эндигина алланг-талланг қилиб оёққа кирди-ю, самокат учолармиди-я! Қиз бола деган қўғирчоқ кўтаради, копток ўйнайди. Бу бўлса ўғил болалар ўйинига аралашади нуқул. Баъзида уларнинг ёнига кириб, лойдан машиналар ясашади, ерга қатор чўплар тиқиб, уларга ип тортишади. «Бу нима?» дессангиз, «электр сими» эмиш. Ўғил болалар от минса, бу ҳам от мингиси, чиллак ўйнаса, чиллик ўйнагиси келади. Булар ҳам майли-я, осмондан самолёт учиб ўтса, уни

ҳам олиб бер, деб хархаша қилгани ортиқча. Хўп, отни, чиллакни тол новдасидан ясаб бераман, самолётни-чи? Билмайман, десам, ерга ётиб олиб, дод солади. Қоғозга урина-урина расмини чизиб берсам ҳам қутулмайман. Кейин авиамодель тўтарагида ўргангандан ҳунаримни ишга соламан-да, фанердан моделча ясаб бераман. Попук буни учирман, деб бирласда бурдалаб ташлайди.

Ҳозир ҳам Попукни ҳар нарсага чалғитиб кўрдим, бўлмади. «Кушни обейинг», деб додлаб, ерга ётиб олди.

— Ахир нима қиласан қушни?— десам, ердан бош кўтариб, ёшсиз кўзини уқалаб:

— Ўйнагим қиставотти!— дейди.

— Куш чўқиб олади, йиғлайсан,— десам, тилини яна чурук қилиб:

— Йиғлийман йўқ!— дейди.

Кулгим қистади. Очиғи, ўзим ҳам қизиқиб кетдим. Урикка тирмашдим. Бир бутоққа миниб, ўзимни панароқ тутдим да, саъванинг уячага киришини пойладим. Саъва учеб келди-ю, шарпамни сезиб, уяга йўламади. Мен яна панароққа ўтаман, деб бир суриувдим, оёғим тойилиб алла бўлиб тушдим. Попук чинқириб юборди. Эсхонам чиқиб кетай деди. Ерда ағанаб ётибман-у: ҳамма ёғим бутунмикин, туролармикинман, деб ўйлайман. Йўқ, бувимнинг ёрдамида туриб олдим. Яхшили, ҳамма ёғим бутун экан. Бўлмаса ойимдан роса балога қолардим. Фақат ўнг қўлимнинг кафти ачишиб кетди. Ловиллагани босилармикин, деб қўлимни силкитаман — баттар зўраяяпти. Йиқилиб тушаётганимда, кафтим ўрик танасига тегиб, териси шилинган экан. Бувим бечора югуриб-елиб дори қидирди. Пахта қўйдириб босди-да, боғлаб қўйди. Қўлимни қучоқлаб олиб, ҳовлининг тўрт томонига югураман. Унга сари Попук йиғлайди.

— Мугомбир-эй! Йиқилган мен-ку. Сен нега йиғлайсан кўрққан олдин мушт кўтарар қилиб?

Ана шу кундан ҳамма иш чап қўлимга ўтди. Қошиқни ҳам, ручкани ҳам чап қўлда тутишим керак. Қошиқ оғзимга келгунча овқатнинг ярми тўкилиб кетади. Ручкага қўлим қовушмайди. Ёзган хатим чумоли изидай ажи-бужу бўлиб, оқ деворга лой сачрагандай чаплашиб чиқади. Чап қўлим худди беганага ўхшайди-я. Билмайман, шу вақтгача у нима иш қилиб юрган экан!

Мана энди на футбол, на волейболга аралашаман, на авиамодель тўтарагига қатнашаман. Қараб туриб «якка мохов»

бўлиб ўтирибман-а. Ҳаммадан алам қиласигани шуки, энди ким кўрса, «Ҳа, чапақай?» дейдиган бўлиб қолди. Илгари негадир «Митти» дейишарди.

Отимни сўрасангиз — Дамир. Жуда кичкиналик вақтимда бўлса, Замир деб аташарди. Боғчага кирганда Замира деган қиз бор экан. Уни бир хил пайт қисқача «Замир» дейишарди. Узоқдан бирор «Замир!» деб чақирса, иккимиз баравар югуришардик. Ҳамма кулги қиласарди.

Мактабда ҳам икковимиз бир синфга тушиб қолдик. Энди бизни ўқитувчимиз адаштирадиган бўлди. Фамилиямизда ҳам ўхщашик бор-да: меники Носиров бўлса, уники Нодирова. Бир куни ўқитувчи ёзувимизни текширганда менинг кундалигимга «5», уникига «3» қўйибди. Замира буни кўриши биланоқ йиғлаб юборди. Мен бўлсам «5» ёққанидан индамай ўтиравердим. Бир вақт ёзувимни қарасам — хато кўп, ўзи хунук. Шошилиб ёзганимданми бу, билмайман.

Ўқитувчимиз янгишганини билди-ю, дарров хатосини тузатди. Орада менинг изза бўлганим қолди. Бошқа синфга ўта қолсаммикин, шуни ўқитувчига айтсам хафа бўлмасмикин, деб юрувдим, Замира олдинроқ ўтиб кетди.

Энди ишим яхши кетаётган эди. Физкультура тўғарагига ёзилдим-у, чатофи чиқди. Үфил болалар бир томон, қиз болалар бир томон бўлиб волейбол ўйнаган эдик. Биринчи ўйинда бизнинг команда ютқиздӣ. Шунга мен сабабчи эмишман. Шошилиб қолиб, икки марта гина тўпга чалишиб умбалоқ ошдимда. Нима бўлти, бошқалар умбалоқ ошмабдими. Звеновой Солиҳ бошқаларга индолмасдан менга ўшқириб: «ўз отингга яраша қиз болага ўхшайсан. Қизлар томонга ўта қол, бор!» деди. Аламимга чидолмадим. Ўйга келиб, бўлган гапни ойимга айтиб бердим.

— Нима учун менга қизларни кидақа от қўйгансиз-а уялтириб? Бошқа тўғри отлардан қўйверсангиз бўлмасдими?

— Қанақасидан? — деди ойим ажабланиб.

— Мана, масалан: Раҳим, Салим, Карим...

— Уялмай қўя қол, ўғлим. «Замир» янги чиққан отлардан. Раҳматлик... — деган жойида ойимнинг тили тутилди.

Ҳа, «даданг» демоқчи бўлди-ю, айтолмади. Адамни эслаб ўзининг ҳам, менинг ҳам кўнглимизни бузгиси келмади. (Мана адамнинг ўлганига икки йилча бўлди, доим шундай қиласади.)

— Ўзим топган эдим «Замир»ни, — деди ойим, гапни тўғрилаб. — Ӯша сен туғилган кезда бунақа отлар расм бўлувди-да: Гулмира, Элмира, Фалаба, Инқилоб.

Айтандай, бунга ўшашлари мактабимизда ҳам бор: битасиники Марат, битасиники Феликс. Лекин бу отлар қизларнидан узоқ, ҳеч ким чалкаштиrolмайди. Ахир Маратни «Маратой», деб бўлармиди! «Маратжон» деса келиша қолади. Қизларнинг отига «жон» қўшсанг ҳеч ҳам ёпишмайди. Менинг отимга-чи, битта ҳарф қўшилса, тамом...

Кейинги кунларда машқ қила-қила волейболни ўрганиб олдим-ку, шундайм бари бир болалар: «Замира, Замира», деб кулишни қўйишмади. Энди жуда жаҳлим чиқди. Ойимга хархаши қилавергандим, ойим бувимга маслаҳат солди. Нима деса кўнадиган бувим, бу маслаҳатга юрмади.

— Қўй, Анорхон қизим, дадагинасининг иомига муносиб ном: «Собиржон»га «Замиржон». Узукнинг кўзидаи ярашган. Эсимизга тушиб туради дадагинаси,— деб қўйди бувим.

Ойим, бувимнинг сўзини ерда қолдирмади-ю, ўйлаб-ўйлаб, охири «Дамир»ни топди.

— Бу ҳам аввалгисига ўшаш ном. Маъниси ҳам ўшаш,— деди ва маънисини айтиб берди. («Замир», дегани «Тинчлик учун» дегани бўлса, Дамир дегани «Яшасин тинчлик» дегани экан).

Ишқилиб қиз бола отидан қутулиб олдим-да. «Митти», «Чапақай» дейишса дейишар.

## 2. БУВИМ БИЛАН ОЙИМ

«Чапақай» бўлиб қолганим мендан кўра бувимга оғир тушди. Бувимга илгари мен унча-мунча боқишиб турардим. Магазиндан нон, сут олиб келардим, синглимин боғчадан келганда ўйнатардим, «Лайка»ни боқардим («Лайка»— бу кучукчам. Кучукча бўлганда ҳам антица кучукча). Яна бувимга газета ўқиб бериш, узилган тугмаларимизни қадаганда, нинасига ип ўтказишгача менинг вазифам эди. Тўғриси, бу ишларни ҳамма вақт эмас, қўлим теккан-текканда қилардим. Ўзимнинг зарур ишларим кўпайиб, боқишолмай қолганимда ҳам, бувим хафа бўлмасди.

Ойим куни билан ишда бўларди. (У якка буюртма кийимлар тикадиган жойда ишлайди). Эрталаб вақтли туради-ю, кетишга тайёрланади. Ойна олдида узоқ ўтириб, сочини тараб, ўради-да, орқасига юмалоқлаб қўярди. Кейин кийимларини дазмоллашга киришарди. Бувим, худди мотоциклдай потиллаб турган самоварни стол ёнига келтиради. Дастурхон ёзарди-да, ўзи дивандаги қалин кўрпачага чордана қуриб ўтиради. Кейин:

— Қани, қўзичноқларим, чойга,— деб бизни чақиради.

Дастурхон бошига келганда, ойим шошиб қоларди. Тик турганча, бир пиёла чой ичарди-ю, Попукни олиб, йўлда борчасига қўйиш учун чиқиб кетарди. Чиқиб кетаётганда, менга:

— Бувингнинг юмушларига боқишиб тургин-а, Дамир,— деб тайинларди. Ишдан қайтганда бўлса, боқишган-боқишимаганимни сўрарди. Боқишолмаган бўлсам ҳам, бувим:

— Ҳа, қўзичноққинам қарашиб юборди,— деб, менга қўзи ни қисиб қўярди.

Ростини айтсам, бувимнинг шу қилиги менга ёқади. Боқишолмаганим устига, билмасдан ишини бузиб қўйган вақтларимда ҳам, ойимга айтмайди.

Бир куни Попук варрак учираётгандарни кўриб, «Менгаям вайяк!» деб туриб олди. (Яна ўғил болалар ўйини!) Мен бўйра ҷўпни чой қоғозга нари-бери ёпиштиридим-да, ип боғлаб берсам, «мунақамас!» деб улоқтириди. Кейин ўзимнинг ҳам варрак учиришга ҳафсалам келиб қолди. Қамиш қидирдим. Ҳужрадан иккита савағич топдим-да, ростакам катта варрак ясашга тушдим.

— Қараб тургин, Попугим! Бир вайяк ясайки, дардараги, кулоқлари қин-қизил, думлари ола-була бўлади. Учирганимизда ҳамманинг қўзи ўйнайди-а!

— Эҳ, мазза, мазза!— деб Попук севинчидан қуёндай диконг-диконг сакради.

Мен ўткир пичоқ билан савагичнинг биттасини иккига бўлиб, ўйнишга тушган эдим, бувим кўриб қолди-ю:

— Вой, ўйрим!— деб пичоқ билан савағичларни тортиб олиб, ҳужрага опкириб қўйди. Билсам, бувим пахта саваганда ишлатадиган савағичлар экан.

Бу воқеа бувим икковимизнинг ўртамиизда қолиб кетди-ю, бошқаси очилиб қолди. Бир куни Попук тикув машинасидан резинка тасмани тортиб чиқиб, бошқа ип қуриб қолгандай Лайканинг бўйнига боғлаб юрган ҳекан. Ойим кўриб қолиб, ўша тасма билан Попукнинг оғигига шарт-шарт туширди. Попук: «Вой оёғим, вой оёғим!» деб йиғлай бошлади. Ойим:

— Сенда айб! Сен кўра туриб қайтартмагансан!— деб мени койий кетди.

— Қилгуликни қизингиз қилсин-у, гапни мен эшитайми?— десам, ойим баттар аччиғланди:

— Ўзбошимчаликни бошлайдиган аввал ўзинг. Сендан юқяпти укангга ҳам!

Нима, мен қозонмидимки қорам юқса! Синглимни ўйната-

ман деб ҳам балога қоламан шекилли. Кошки ўзи унаقا-мунақага кўнадиган қизлардан бўлса. Гап уқмас, инжиқ. Ясаб берган ўйинчоингдан ҳам айб топади. Муштдай бошидан шунаقا қиласа, мактабга кирганда елкамга миниб олмасайди!

Анча кундан бери тинч юриб, бугун яна қўлга тушдим.

Кечқурун ойим қайтганда, мен чапақайлаб, қийнала-қийнала велосипедимга дам бераётган эдим. Бувим қаёққаям чиқиб кетган эди, шу тобда оғиргина халта кўтариб қайтиб келди. Магазиндан нон билан макарон олиб келаётган экан. Буни кўриб ойимнинг жаҳли чиқди.

— Бувингнинг ишларига қарашибгин, десам, ўйин билан овора экансан-да. Сени нима қилсан бўлади, а?

— Қарасам, дарс тайёрлаб ўтирган экан. Алақсимасин, деб ўзим чиқа қолган эдим. — Дарров бувим жавоб топди.

— Қани дарс тайёрлагани?

— Ҳозиргина танаффус қилдим-да, ойижон! — дедим бувимнинг гапига тўғрилаб ва ҳовузча бўйидаги столда очиқ-сочиқ ётгани китоб, дафтарларимни кўрсатдим.

— Кечқурун дарс тайёрласин, деб ким айтди сенга?

— Жадвалим асосида қиляпман-да, ойижон.

— Қани, жадвалингни ол-чи!

Оббо, бунаقا одати йўқ эди, қаттиқ тергашга тушди-ку. Мен айвондаги михга илиғлиқ жадвални олдим. Бунда кун бўйи қиладиган ишларим белгиланган. Илгари дадам тузиб берган жадвалда, дарс эрталаб тайёрланади, деб кўрсатилиган эди, бунисини яқинда ўзим ўзгартириб олган эдим. Бунда ҳар эҳтимолга қарши эрталаб ҳам, кечқурун ҳам дарс тайёрлашни кўрсатган эдим. Ахир, олдиндан нима бўлишини билиб бўлармиди! Олдиндан билиш учун оддий мия эмас, машина мия керак. Ҳа, электрон ҳисоб машинасига ўҳшаган мия! Қани энди шунаقا миянг бўлса-ю, олдиндан берган топширифингни ўзингга керакли вақтда тайёрлаб қўяверса. Кўпинча эрталаб энди дарс тайёрлашга ўтирай ҳеганингда, кўчадан болаларнинг шовқини келади, хаёлинг бодроқдай сочилиб кетади. Улар мазза қилишиб юрганда, сен мук тушиб ўтир — алам қилмайдими! «Ҳа, жадвалда бор-ку, кечқурун тайёрларман» дейман. Кечқурун бўлса тағин бирон зарур нарса чиқиб қолади. Бу ўртада овқатланиш бор. Овқатдан кейин бир-икки соат ўйнаш албатта зарур, буни ўқитувчимиз ҳам буюрган. Ундан сўнг уйқу. Ана шуниси чатоқ — уйқуга камида етти-саккиз соат вақт кетади. Шуни ким чиқарган бўлса ҳам, ўйламай чиқарган-да! .

Ойим жадвалга кўз ташлаб олди-да, менга бармоғини ўқталди:

— Буни ким ўзгартириди? Қимдан ўргандинг бу ўзбошим-чаликни?

— Йўқ, ойижон, ҳозир учинчи чорак охири-ку? Эрталаб ҳам, кечқурун ҳам дарс тайёрланглар деган ўқитувчимиз.

— Қайси ўқитувчинг деди.

— Ҳалима опам,— деб юбордим шошиб. Қейин тилимни тишладим. Ҳалима опамнинг номини бекор айтдим-да. У синф раҳбаримиз. Гоҳ-гоҳ келиб ойим билан кўришиб туради. Кўришганда ойим ундан «шунаقا дедингизми?» деб сўраб қолса-я!..

Ойим чарчаб келгани учунми, ортиқча тортишиб ўтирамай, ичкарига кириб кетди. Бувим секин менга:

— Ишн унча ундири масанг ҳам, гапни кўп дўндириасан-да, қўзим. Ишёқмасга иш буюрсанг, отангдан яхши насиҳат қиласи, дегани шу бўлади!— деб кулиб қўйди.

Қаранг, шунга ҳам дарров мақол топди-я бувим!

— Гапни дўндириадиган ўзингиз-ку, бувижон!— десам, у қисиқ қўзларини чиройли жилмайтириб:

— Ишни-чи?— дейди.

Мен жавоб тополмай қоламан.

Ойим уйдан бошқа кийимини кийиб чиқди-да, тепамга келди. (Бояги гап билан тергаш тамом бўлганми десам, чаласи қолган экан). Дафтаримни текширди. Уйга берилган топшириклар тахи бузилмасдан турган эди.

— Қани тайёрлаганинг? Қачонгача қўзимни бўяйсан, а, шумтака?

Мен индамасдан, қовоғимни солиб, чап қўл билан хат ёзиб ўтирибман. Энди бас қиласар десам, йўқ, баттар тутокяпти:

— Одамни хуноб қилдинг-ку. Сенда тайин деган нарса борми? Қачон эс-ҳуш киради-ю, ўз вазифангни тушуниб оласан? Айт ҳозир, қайсар!— деб, бирдан чап қулоғимни чўза кетди.

Қулоғим ловилласа ҳам, ручкамни қўймайман. Гапим кор қилмади, деб ўйлади шекилли, ўнг қулоғимни ҳам омбурдай тортди. Мен жон аччиғида иккала қўлимни қулоққа оборибман. Боғланган қўлим оғриб кетди. Худди ўриқдан йиқилган вақтимдагидайвой-войлаб туриб кетдим-ку! Қетимдан ойим қувди. Урмоқчими деб, қаттиқроқвой-войлаганимча ҳовлини гир-гир айландим. Охири ойим чарчаб:

— Бўлди, ҳой бола. Тўхта, қўлингни кўрсат!— деди.

— Калтак ейишдан чўчиганимданми, оғриқ таққа тўхтаган эди. Шундоқ бўлса ҳам қўлимни ачомлаб, бўйнимни кифтим-та қисиб, қўрқа-писа тўхтадим. Бу ёқда, калтак еса ажратаман, деб бувим тайёр турибди.

— Қаттиқ оғрияптими қўлинг?— деди ойим, худди ўзиники оғриётгандай юзини тириштириб.

У қўлимдаги докани, худди чақалоқнинг йўргагини ечгандай, жон ҳовучлаб ечди. Кафти-mdagi шилингнан жой ўпкадай қизариб турарди.

— Ҳаммаси шўхлик, бебошлиники,—деди ойим энди жаҳлдан тушиб ва сассиқ сариқ майдан суркаб қўйиб, тайнлади.— Қўлингни эҳтиёт қил. Сөвуқ сувга урма, газак олса, ёмон бўлади.

Ҳамманинг ойиси ҳам шунаقا бўладими, билмайман. Менинг ойим, бир ёқдан уй ишларига ёрдамлашмадинг, деб уришади, бир ёқдан қўлингни совуқ сувга урма, дейди. Салга раҳми келади-ю, тағин уришгани ортиқча.

Қизиқ, бирдан ойим, бояги жаҳли эсига тушдими, қовоғини солиб олди. «Қовоғимни очсан талтайиб кетади», деб ўйлангандир-да. Нима, мен Попукмидимки, салга талтайсам. Ана бўлмасам дедим-да, мен ҳам қовоғимни солиб олдим. Ҳеч ким билан гаплашмасдан дарсимни тайёрлайвердим. Овқатга чақиришган эди, «Қорним тўқ», деб бормадим. Ойим ўйлагандай бетайин эмаслигимни, ўз вазифамни билиб қила олишимни бир кўрсатиб қўйяй!..

Охири бувимнинг раҳми келди.

— Чарчагандирсан, қўзичофим. Ичагинг узилиб кетгандир. Бўлди қила қол,— деб зорланди.

Кўз қиirimни ташласам, бувим айвонга чинни косаларда овқат олиб ўтди. Бурнимга райҳон, кашничларнинг ёқимли ҳиди кирди. Ҳа, мошхўрда. Узим яхши кўрган овқат. Бувим хўп пазанда-да. Ҳар қанақа томоққа маза киритиб юборади. Ҳали кўқ резаворлар чиқмаган вақтда, уларнинг қуритилганидан ишлатади. Эҳ, у пиширган лағмону қўймоқларни еб тўймайсан. Негадир ҳозир тухум егим келиб қолса-я! Оғзимдан сўлағим келиб, дафтарга оқиб тушай деди. Қилт-қилт ютинидим-да, мук тушиб ишлай бердим.

— Бўлмаса овқатини олиб қўя туринг, ҳали плитада иситиб иchar,— деди ойим бувимга.

Мен бўлсам, ичимда, «тезроқ овқатланиб бўла қолишсайди!» деб турибман. Чунки энди миямга ҳеч нарса кирмай қолди. Дафтар бетидаги рақамлар, ҳарфлар худди чигирткалар-

дай дик-дик сакрашиб, ўрик гулидаги асаларилардай учишиб юриби.

Бувим билан ойим айвондан туриб кетишлари биланоқ, мен лип этиб ўтихонага ўтдим. У ерда товуқ катаги бор эди. Мўралаб кўрдим. Товуқ тухум қўйибди-ю, чиқиб кетибди. Бир эмас, иккитा� тухум. Ўшлаб боқсам, ҳали илиққина. У ёқ-бу ёққа аланглаб олдим-да, тухумнинг икки ёғини чўп билан чумчуқ қўзидаӣ тешиб, оғзимга хўп этувдим, лиққа кетди. Қани энди устидан юмшоқ нон бўлса, еб юборсанг. Оёқ учида ошхонага кирдим-да, яримта булкачани чўнтакка уриб чиқдим. Яна келиб стулимга ўтирдим. Боғланган қўлим билан оғзимни пана қила-қила нонни туширдим. Бирдан ҳиқиқоқ тутиб қолди. Ҳиқиқоқ босилармикин, деб водопроводдан бир ҳовуч сув ҳам ичиб олдим. Қорним тўйғанга ўхшади. Энди дафтардаги ҳарфлар, рақамлар учшини қўйиб, ўз ўрнига қўнди. Лекин қўнгани билан миямга кирмади. Негаки, уй ичидан ойимнинг йиги аралаш овози эшитилаётган эди. У бувимга дерди:

— Бу мени куйдирадиганга ўхшайди. Тепасида ҳақ деб турсангиз, ишга қарайди, бўлмаса йўқ. Пешонам шўр бўлмаса, раҳматлик...

Яна эсига адам тушди. Ойимга ўзимнинг раҳмим келиб кетди. Чиндан, адам борида ойимга енгил эди. Парвойи-палак, ишхонасига бориб келишини биларди, холос. Бунаقا дафтар текширишу жадвал суринтиришлар қаёқда эди! Үқишлиримнинг бориши, қанақа баҳолар олаётганимни ўзим айтмагунча билмасди. Мактабда ота-оналар мажлиси бўлганда ҳам «Адаси, ўзингиз бора қолинг. Ишдан ҳориб-чарчаб келдим», дерди. Кейин менинг бирон қилифим ёқмаса, ўзи тер-габ ўтирасдан, «Ўғлингизнинг айбини билиб қўйинг», деб дадамга айтардию қутуларди. Буни эслаб ҳам қўймасди кейин. Мен билан гаплашиб ўтирадиган, томошаларга олиб борадиган ҳам адам эди. Попукни-ку адам кечалари аллала-ганини қўяверинг. Адам ўлганда, Попук йўргакда эди...

Ўйлайвериб чарчадим. Бирдан миям қовоққа ўхшаб ғувилаб қолди. Худди унинг оғзи ёнилгандай ҳеч нарса кирмасди. Тепамдан вафиллаб самолёт учиб ўтди. Попук елкамга осилиб «самолётни обейинг!» деб харҳаша қилди. Ўзим туриб кетишига баҳона тополмаётган эдим. Дафтар, китобларимни йифишитирдим. «Юра қол, обераман», дедим-да, Попукни эргаштириб кўчага чиқдим.

### 3. «ПУШТ, СТЁПА АМАКИ КЕЛЯПТИ!»

**К**оронги тушгунгача қўшии болалар билан тўп тегишишдик. Хўб чарчаган эканман. Ҳовлига келдим-у, каравотга ўзимни отдим. Ётганимни кўриб, ойим бувимдан сўради:

— Овқатини ичдимикин?

Бувим ошхонага кириб қараб чиқди-да, «ичмабди», деди. Ойим нолиб кетди:

— Қандоқ бола чиқяпти ўзи. Қамчилигини кўрсатсанг ҳам бир бало. Чапақайига олиб, тўнини тескари кияди бу қайсар!

(Э, нега ҳадеб чапақай деяверади десам, бу қайсар дегани эканда. Нечук биз қайсар бўлар эканмиз?)

Бувим чойнакка чой дамлаб келди. Дивандаги кўрпачага чордана қурди-да, мен томонга бир қараб олди. Мени ухлади деб ўйлади. Ойимни олдига ўтқазиб, бемалол гап бошлади:

— Ҳамма бало, Анор қизим, дада йўқлигида. Дада бўлганда, ўйлга солиб оларди буни. Мен сенга айтсан, қизгинам, ҳали ҳам бўлса ўша маслаҳат...

(Ҳа, бўлди. Қачон ойим нолишга тушса, бувим пайтдан фойдаланиб, шу гапни очарди.)

— Султонбой мўмин-қобил йигит,—деб сўзини давом эттирди бувим,— қолаверса, қўлида гулдай ҳунари бор...

— Қўйинг, ойижон, шу гапни!— деб ойим ўриидан туриб кетди.

Бувим ялиниб-ёлвориб уни яна жойига ўтқизди. Ҳалиги гапни такрорлади:

— Бунинг устига болажонлигини айтмайсанми-я! Дамир билан Попук жони-тани.

Бувим айтаётган Султон амаки бизнинг узоқ қариндошимиз бўлади. Яқиндан бери бизникига икки-уч марта келди. («Лайка»ни ҳам ўша олиб келиб берган). Ўзи жуда баланд бўйли, қотма, лекин кучли киши. Ҳазилкашлиги ҳам бор. Эшикдан кираётганда бўйи дарозлигидан энгашиб:

— «Пўшт, Стёпа амаки келяпти!»— деб қўяди. (Чиндан, ўзи анави китобдаги Стёпа амакига жуда ўхшаб кетади-да. Фақат милиционер эмас, холос.)

Султон амаки кирган заҳоти мен билан Попукни азот кўтариб, «Қани, ким катта?» деб бошидан ошириб қўяди. Ҳамма ҳазили ҳам майли-ку, гап орасида «Жўжалар!» деб қўйгани унча ёқмайди менга. Қиз болаларни шунаقا деб айтса ярашашади:

ди. Қўп чийиллашади улар. Мени нега қўшади? Майли, буниси ҳеч гапмас. Узи соз одам, бувимнинг мақтаганича бор. Менга, Попукка ўзини жуда яқин олади. Иннайкейин ҳафсалалигини айтмайсизми: эринмасдан биз билан соатлаб гаплашиб ўтиради. Қап-катта киши ўйинларимизга аралашади. Мен бунга ҳайрон қолардим, тўғриси, бу ёқарди менга. Чунки унинг ана шу қилифи дадамга ўхшаб кетарди. Дадам ўзи катта ўқитувчи бўлса ҳам, мендан ҳеч вақтини аямасди-да. Нимани сўрасам сира эринмасдан, жеркимасдан жавоб берарди. Бўш қолди дегунча дафтарларимни варақларди, ё бўлмаса мен билан шахмат ўйнарди, тўғриси, ўргатарди.

Дадам ўлгандан кейин уйимиз ҳувиллаб, жуда зерикарли бўлиб қолган. Бувим, айниқса ойим бизга анча вақтгача кулиб қарамади. Ортиқча гапимиз, Попукнинг эркаликлари ҳам уларга ёқмасди. Мен буни тушунардим-ку, Попук тушунмасди. Шовқин-сурон, хархаша қилиб, ойимдан гап эшитиб оларди.

Султон амаки келиб юргандан бери, худди уйимиз тўлгандай бўлди. Ҳаммасидан унинг ўзи ҳақидағи ҳикоялари қизиқтиради мени. Мен уни гапга солиш учун:

— Нега мунақа қорайиб кетгансиз, Султон амаки?— дейман.

— Чунки, жўжалар, бутун умрим дашту саҳрода ўтган,— дейди.

— Нима, туғилганингиздан берими?— дейман гапни улаш учун.

— Ҳа,— дейди у.— Ойим мени далада туққан. Далада ўсганман. Қейин шаҳарда ўқиганман. Ўқишини битириб, яна саҳрога кетганман. Йўллар, кўприклар қурганман. Чўлларга сув чиқарганман. Бир шоир айтгандай, «Этик билан сув кечиб, сувлиқ билан сув ичганман»...

Айтаверса адо бўлмайди. Ҳар гапида мен: «Қандай қилиб?» деган саволни беравераман. У қандай бўлғанлигини тушунтиromoқчи бўлади-ю, бари бир тушунолмайман.

— То ўз кўзинг билан кўрмагунча тушумайсан,— деб қўяди у.

Мен унинг ҳикоясини эшитсам зерикмайман-у, Попук дарров эснайди.

— Амати, амати, ўйнагим қиставотти!— деб финшиб қолади.

Кейин Султон амаки: «Жўжалар зерикмасин», деб бирон ўйин ўйлаб чиқаради. Мендан бўр олади-да, ерга катак чиза-

ди. Кўзни бекитиб шу катакни босмасдан юришни ўргатади. Ё бўлмаса, ўрик шохига тик туриб учадиган тахта аргимчоқ солиб беради. Попукдан қутулганидан кейин, менга навбат келади: велосипедчамнинг қайшиб-майишиб кетган симлари ни тўғрилашга тушади, ўзи совға қилган «Зоръка» фотоаппаратида сурат олишни ўргатади. Мен қуш учун чиройли уя ясашни ҳам Султон амакидан ўрганиб олганман.

Султон амаки келганда бувимнинг жони киради. Бир-икки соатга бўлса ҳам биздан қутулади-да. Бувим хурсанд бўлганидан уни яхши овқат билан меҳмон қилади. Султон амакининг ўзи тортинчоқ одам, овқатни кўп емайди. Айниқса ойим уйда бўлса тортинади, тезроқ жўнаб қолишга ҳаракат қилади. Кетаётганида бувим илтимос қилади:

— Султон болам, ўзингнинг уйинг, ийманмасдан тез-тез келиб тургин, болаларни соғинтириб қўймагин. Хўпми, болам?

— Хўп, онажон. Сизлардан бошқа кимим ҳам бор бу ерда? Сизни кўрсам, онамни кўргандай бўламан,— дейди Султон амаки.

— Иннайкейин дўхтирларнинг ҳам айтганини қилгин, гипиртон ёмон касал дейишади,— деб тайинлаб қолади бувим.

Султон амакининг бош оғриқ касали бор. Унинг ота-онаси ўлиб кетган. Ҳеч кими, уй-жойи ҳам йўқ. Бу шаҳарга касалини боқизган қелиб қолган. Докторлар унга «шаҳарда қолинг», деб маслаҳат беришаётганимиш. Қоладими-йўқми, ким билади. Бувимнинг гапларидан қоладиганга ҳам ўхшайди. Бугун аниқ билдимки, бувим Султон амакини бир илож топиб бизникига олиб келмоқчи. Келгани-ку яхши, биз у билан зерикмаймиз ҳеч. Лекин бутунлай, бизга дада қилиб олиб келмоқчишиш. Шуниси ойимга ўхшаб менга ҳам тўғри келмади. Фашим келиб, бувимдан жаҳлим чиқди. Мунча ахир қистайвермаса, қистаб чақиравермаса! Бунинг устига ойимга Султон амакини мақтагани-мақтаган.

— Ҳа, яхши одамнинг садағаси кетсанг арзийди. Менга қариганимда суюнчиқ керак,— деб бувим кўз ёши қилади, кенг енгига кўз ёшларини артиб, қўшиб қўяди.— Болаларга бўлса ота керак. Мени онам десанг, хўп дея қол, қизгинам...

Ойим нима деркин, деб юрагим пўкиллаб турувди.

Яхшики, ойим хўп демади. Хўп деганда ундан ҳам хафа бўлиб кетардим. Лекин бувим қисташини қўймади. Эртасига ҳам қистади. Индинига ҳам қистади.

Ойим бечора энди ялинишга ўтди:

— Үйлаб кўрсангиз-чи, ойижон. Ахир Собиржонингизнинг

тупроғи совумасдан, хотираси ўчмасдан шу ишга қандоқ кўнглимиз бўлади-я!..

Бувим яна ўз сўзини қайтарди.

— Султон ўзи кўп одамшаванда йигит-да. Уни кўрсам, Собиржон ўғлимни кўргандай бўламан. Менга раҳм қилгин, қизим,— деб охири ув тортиб йиғлади. Шундан сўнг ойим:

— Болалар нима дейишаркин?— деб қолди.

— Болаларми?— деди бувим енгил нафас олиб.— Уларни кўндиришга мен кафил. Худога шукур, болажонларим қобил. Муомилага юради.

Бувимнинг мақтагани-ку менга ёқди-я, «уларни кўндираман, кўнади» дегани ёқмади. Попук-ку тентак, ҳеч балонинг фарқига бормайди, унга ўйин бўлса бас. Мен-чи? Нега мени унга тенг қиласди, мендан сўрамасдан ваъда беради? Ё энди сўрармикин? Борди-ю, сўраб қолса-чи? Унда нима дейман? «Майли», дёёлармидим? «Йўқ, бўлмайди», деб айтсан-чи? Бувим хафа бўлмасмикин?

Ўйлаб қолдим. Қулоғимга уларнинг гап-сўzlари ортиқ кирмай қўйди. Ўйлайверганимдан, охири миям ари инидай ғувиллаб кетди...

Кейин, әшикдан энгашиб Султон амаки кираётгандай, қулоғимда унинг йўғон, хушчақчақ овози янграгандай бўлди: «Пўшт, Стёпа амаки келяпти!»

#### 4. НОРОЗИЛИК

**Ү**йимизга Султон амаки брезент жилдлик чамадонини кўтариб келганига бир ойча бўлди. Шунча турса ҳам, унга кўнишиб кетолмаяпман. Қайтага илгари, келиб-кетиб юрганида менга яқин кўринарди. Уйимизда тура берганиси, кўзимга бегонароқ кўрина бошлади.

Попук тентакка-ку билинмади. Бувим, «ада» дегин деб ўргатган эди, дарров «ада»лайдиган бўлди. «Ада, ўйнагим қиставотти; ада, учадиган конток қилиб бейинг, (шар олиб беринг демоқчи), қонним очиб тетвотти, маяжни обейинг...»

Султон амаки унинг хархашаларига эринмасдан қулоқ солади. Қап-катта киши майда-чуйда ўйинларга ҳам аралаша-веради: арғимчоқ учиради, қамишдан кўзанак ясад, энди қиндан чиқаётган довучча узиб беради, елкасига кўтариб, ҳовли айлантиради. Дадам мени худди шундай қилиб кўтариб юрарди. Булари ҳам майли-я, айвонда тўрт оёқлаб Попукни

устига миндиргани ортиқча. Попук хўп маза қилиб қиқиллайди-ю, менинг ёмон ғашим келади: чақиришса ҳам олдиларига бормайман, ўзимни четга оламан. Кўпроқ вақтимни дарсга бераман. Бир ёқдан ўқув йили тугаяпти, иккинчи ёқдан янги одамга кимлигимни кўрсатиб қўйишим ҳам керак-да.

Дарс тайёрлаб ўтирганимда, Султон амаки тепамга келиб:

— Аҳвол қалай, ўртоқ ўқувчи?— деб қўяди.

Бирон масалани ечолмай хуноб бўлиб турган бўлсан ҳам:

— Раҳмат, яхши,— дейман.

Лекин Султон амаки (худди дадамга ўхшаб) алданмайди. Муғамбирлик билан афтиимга тикилиб туроди-да, қийналаётганимни пайқагандай:

— Чиқаришиб юборайми?— дейди.

Ичимда жон дейман-у, сир бой бермайман.

— Раҳмат. Бирорга ишлатиш тўғри келмайди.

— Ҳа, ҳа,— дейди у бароқ қошлиарини чимириб, кўзлари чақнаб.— Бу гапинг жойида! Ўқитувчингга балли!

«Нега ўзим қолиб, ўқитувчимга балли деяпсиз?» дегандай тикилсам, у:

— Тўғри тарбия берибди,— деб қўшиб қўяди.

Кўп ўтмасдан, у чапак чалади. Бу — таннаффусга звонок эди.

Яқинда у, фанердан тенинс столча қурган эди. Стол ёнига бориб қўлига ракета тутиб, мени кутади. Ичимда жон деб турган бўлсан ҳам:

— Ҳали дарсим чала,— деб қўяман.

— Яхши ўқувчи иш билан дам олишни қўша билади. Ўқитувчинлар бу ёғини ўргатмаганми? Қани, бўла қол, қўлим қичишиб турибди. Чемпионликни бир кўрсатиб қўяй кечагидақа,— деб кулади кечаги ўйинда ютмаган бўлса ҳам.

— Бўлмаса сиз ҳам чап қўлда ўйнайсиз,— деб ҳазилга ҳазил билан жавоб қайтараман-да, ўйинга тушиб кетамиз.

Роса терлагунча ўйнаймиз. Ҳар гал шарча шақирлаганда, менга ўхшаб у ҳам севиниб сакраб тушади, танглайнини такилатиб қўяди. Попук бўлса ерга юмалаган шарни тутаман деб, атрофимизда гилдирайди.

Мен чала қолган дарсимни унутиб юбораман. Тенинсдан бўшаганимдан кейин фотога уннаб кетаман.

Энди Попук билан икковимиз уйдаги ўйинларга алақсиб, кўчага ҳам кўп чиқмасдик. Чиқсан ҳам Султон амаки билан чиқардик. Секин-секин унга ўргана бошлагандик. Ойим ҳам

энди у билан илгаригига қараганда очилироқ гаплашар, бош оғриғи тутса куйиб-пишиб қаарди.

Султон амакининг серҳасалалиги ҳаммамизни ҳайрон қолдиради. Кўпинча уй юмушларига ҳам аралашиб кетарди. Ҳали қарасангиз, болтада ўтин ёриб, тешада кўмири чакиб тандир тагига тахляяпти, ҳали плитаними, кир ювиш машинасиними тузатаяпти, ҳали ер чопиб гулхона учун юлдуз шаклида жой тайёрлайяпти. Борингки, бу одам эшик олдини супуришу, бувим кир юганда сув иситиб беришгача аралашаверади. Кейинги кунларда Попукни боғчага обориб опкелиш ҳам унга қолди.

Дам олиш кунлари бўлса бувимни ҳам, ойимни ҳам аралаштирмасдан, якка ўзи «паловхон тўра ясаш»га киришади. Шунда ойим билан бувим кулишиб:

— Эркак киши хотинларнинг қозон-товоғига аралашавермайди, уят бўлади,— дейишса, Султон амаки:

— Биз ўрганиб кетганимиз. Саҳрода яшаган одам бирорнинг кучидан фойдаланишин билмайди. Бутун тирикчилигига ўзи қарайди,— дейди.

Билиб турибман, бувим дастёрдан ёлчиб қолганига хурсанд, шундоқ бўлса ҳам:

— Қўя қол, болам. Гўдаклар билан ўралашганинг ҳам етар. Бирпас чўзилиб дамингни олгин,— деб ғамхўрлик қилади.

Ойим ҳам бувимнинг гапини қувватлаб:

— Кўп уринмай қўя қолинг. Бош оғриғингиз зўрайиб кетмасин тағин,— деб қўяди.

— Қасалим хийли тузук, она. Бўш вақтимда қарашиб турай. Ҳали замон ишга жўнайман,— дейди Султон амаки.

— А, қаёққа тағин?— дейди бувим капалаги учиб.

Султон амаки киши билмас илжаяди-да:

— Маслаҳатлашамиз,— дейди дудмолгина.

Бувим билан мен ажабланиб қараб қоламиз. Лекин ойим бу гапга негадир парво қилмайди. Буни олдинроқ эшитиб юрганим дейман-да. Эшитиб юрган экан. Кечаси пайқаб қолдим. Ўрнимга ётганимдан кейин, Султон амаки билан ойим уйга кириб, алланимани маслаҳатлаша бошлишди. Султон амаки олдинига юмшоқ гапирди, бир нималар деб ялинди. Сал ўтиб жеркигандай бўлди. (Шунча вақтдан бери бунақа жеркиганини биринчи эшитишим). Йўғон овоз дўриллаб чиқди;

— Қамида бир йилга сўз бериб қўйдим. Сўз олтиндан қиммат-ку ахир!..

— Астароқ. Ойим эшитсалар, диллари оғрийди. Болалар ҳам билишмасин,— деб илтимос қилди ойим.

Яқиндан бери мендан гап бекитадиган бўлган ойим. Бунинг қизиқ сабаби бор: бир куни қўшнимиз кетмон сўраб чиқди. Ойим: «Кетмоннинг дастаси синиб ётибди», деди. Тўғри, бир вақт синган эди-ю, лекин Султон амаки дарров янги даста солиб қўйган эди. Ойим бундан бехабар экан, деб ўйладим. «Йўқ, ойи, кетмоннинг дастаси бутун», дедим-да югуриб ўтин-хонадан олиб чиқиб бердим. Қўшни севиниб олиб кетди-ю, мен балога қолдим. «Нега одамни изза қиласан, маҳмадона!— деб уришиб берди ойим.— Иккинчи катталарнинг сўзига ара-лашма, калтак ейсан!»

Хозир Султон амакига «секинроқ сўзланг» деди-ю, ўзи қаттиқ-қаттиқ гапира бошлиди. Қулоқ солмай деганим билан, қулогимга гаплари бемалол эшитилиб турса нима қилай?

Ана ойимнинг овози:

— Нега ўйламай-нетмай сўз берасиз? Инженерсиз, шаҳардаги заводга кирсангиз бўлмайдими? Чўли биёбонда қандай турасиз, докторлар узоққа бормагин деган? Яна у ёқда касалингиз зўрайиб кетса, нима бўлади? Жонингизда қасдингиз борми?

Султон амаки жавоб қайтаряпти:

— Қизиқ гапирасиз-а. Чўлга кетаётган шунча одамнинг жонида қасди бор эканми?

Ойим қизиқ-а: нега ҳадеб гапини қайтараверади.

Анча жим туришгандан сўнг ойимнинг овози чиқди:

— Майли, билганингизни қилинг...

Буни розилик билан айтдими, зарда билан айтдими, пай-қай олмадим. Султон амаки илтимосга ўтди:

— Бирга борсак-чи?

— Нималар деяпсиз?— деди ойим.— Менга зарур келибдими? Қиндик қоним тўкилган жойдан кечиб-а? Иннайкейин, болалар нима бўлади?

— Олиб кетамиз,— деди Султон амаки.

— А-а, ўйлаб гапирыпсизми?

Мен бу ёқдан: «Жон ойи, қаттиқ гапирманг. Тағин амакимнинг жаҳли қистаб «бўлмаса ўзим кетдим», деб қолса, унда нима бўлади. Ҳаммамизни ташлаб кетса-я!» дегим келди.

Ойим ҳайтовур қаттиқ гапирмади-ю, ялингандай деди:

— Ўзингизга ачинмасангиз, болаларга ачининг. Шундоқ

иссиқ уйим қолиб, гүдакларни чўлда сарсон қиласмишман-а? Бунақа хом хаёлларни қўйинг. Ўзингиз ҳам бормаганингиз яхши.

Султон амаки яна бўш келмади:

— Ваҳма қиласверманг. Чўлнинг ҳам ўзига яраша гашти бор. Боргандা биласиз. Бўлмаса ҳозир Попукни олиб кетайлик-да, Дамирни ўқиши тугагандан сўнг чақириб олайлик. Маъқулми?

Бу ҳам ойимга маъқул бўлмади. Яна қистайвергандан сўнг, ойим бу ердаги ишни ташлаб кетолмаслигини айтди.

Султон амаки:

— У ерда ҳам сизга лойиқ иш топилади,— деб кўрган эди, ойим очигига кўчди:

— Болалар бувисига ўрганган. Мен эплай олмайман буларни. Бир-биридан баттар шўх, қайсар. Қийнаб юборишади одамни. Бутунлай бувисига ташлаб кетишимиз ҳам инсофдан-мас.

«Хей, ойижон. Амакига нега ёмонлайсиз бизни? Попукка мени тенг қиласизми? Мен ўзимни ўзим эвлолмас эканманми? Қўлим ҳам тузалиб қолар! Агар биз учунгина қоламан деяётган бўлсангиз, бемалол бораверинг! Биз бувим билан ўтираверамиз!» деворгим келди менинг. Лекин «гапимизни эшитиб ётганимидинг, маҳмадона!» деб уришмасин, дедим.

Султон амаки бир нималар деб ғудиллади. Кейин жим бўлиб қолишиди. Менинг ҳам кўзим илиниб, уйқуга кетибман.

## 5. «ҚЕНГАШЛИ ТҮЙ ТАРҚАМАС»

**Н**онуштага ҳамма ўтириди-ю, ойим ўтирмади. Ҳар кун-гидек узоқ соч тараш, кўйлак дазмоллаш бугун эсига ҳам келмади. Бир пиёла чой ҳам ичмасдан ишга жўна-ди. Нега ундоқ қилди, а? Шошганиданми, ё бир нарсага зар-да қилганиданми?

Бувим унинг кетидан:

— Ҳой, болам, оч-наҳор қаёққа кетяпсан?— деганича ачиниб қолди.

Кунига биз билан чақчақлашиб чой ичадиган Султон амаки бўлса индамай ўтирибди. Чаккаси тиришиб, кўзи қизариб кетибди. Нима бўлди? Бош оғриғи тутиб, ухламай чиқдими-кан? Сўрай десам, тилим бормади. Негадир бирдан иштаҳам бўғилди. Бувим пишириб келган қўймоқнинг ярим тарелкача-сини зўрға ёдим-да, туриб кетдим.

Султон амаки соатига қаради.

— Юр, Попук, вақтинг бўлиб қолибди,— деб, уни боғчасига етаклаб кетди.

Бошқа кунлари Попукни боғчасига қўйғандан сўнг, тўғри уйга қайтарди. Бугун шу кетганча аллақаёқларда юриб, кеч-қурун Попукни кўтариб кириб келди.

Мен мактабдан аллақачон келиб, нима қилишимни билмай ўтирувдим. Султон амаки келса, бир теннис ўйнайлик деган эдим. У чарчаб келган эканми, тўғри менинг каравотимга бориб чўзилди. Мен ҳеч нарса дёлмадим. Кейин фотоаппаратимни олиб, кўчага чиқиб кетдим.

Бугун уйимизда сув куйгандай жимжитлик бўлди. Эртаси га ойим билан Султон амаки ўртасида тағин ғиди-биди қўзгалди. Бу гал ойим бувимни баҳона қилди.

— Ойимларга гапингизни айтган эдим, диллари оғриди: «Султонбойдан умидим шумиди! Ўғлим ўрнида ўғлим дегандим! Наҳотки, юзимга оёқ қўйиб кетса!» дедилар...

Султон амакининг дами ичига тушди. У индамай аллақаёққа чиқиб кетганда, ойим мени олдига чақириб:

— Ўтириб, маслаҳат бор,— деди.

Қўрқа-писа ўтиридим, афтига бақрайдим: ойим ҳеч қачон мен билан ҳеч нарсани маслаҳат қилмасди-ку? Қайтага ҳамма нарсани мендан бекитарди, бирон иши бўлса, ўзи ўйлаб олгандан кейингина менга айтарди, тўғриси, фақат буюради. Ҳозир менда бирдан фахрланиш пайдо бўлди. Томогим қичи-маса ҳам, қириб қўйдим. Зўракилик билан афтимни жиддий тутишга тиришдим. Ойим менга эътибор қилмади ва овози қалтираб кетди:

— Бизни ташлаб кетмоқчи аданг...

Худди электр токи ургандай, миямда бир нима шанғиллаб кетди. «Аданг!» Туғилганимдан бошлаб қулоғимга ўрнашган сўз. Бу сўзни ўзим ҳам, ойим ҳам ишлатмай қўйганимизга сўз. Бу сўзни ўзим ҳам, ойим ҳам ишлатмай қўйганимизга сўз. Бу сўзни ўзим ҳам, ойим ҳам ишлатмай қўйганимизга сўз. Ҳозир қулоғимга ғалати кирди. «Ташлаб кетмоқчи!» Буниси яна ғалатироқ. Тунов куни ўз қулоғим билан эшитиб олган гаплар орасида бунақаси йўқ эди, шекили. Ана, бордюю, шундоқ деган бўлсин. Унда нима бўпти? Ойимнинг ўзи ўша куни, «Билганингизни қилинг», демаганимди? Нега бугун ваҳима қиляпти? Бундан чиқди, Султон амакининг бутунлай кетиб қолишига ойим розимас, ҳа, розимас!

Мен таваккал қилиб айтиб юбордим:

— Чўлга олиб кетаман, десалар. ўзингиз қўнмадингиз-ку?

— Ҳа, муғамбир!— деди ойим бармоғини ўқталиб,— буни

ҳам эшитиб олувдингми? Қатталарнинг гапига қулоқ солмагин, деб айтмабмидим?

Балога қолдим. Секин қўзғалмоқчи бўлган эдим, ойим:

— Утири, ҳали маслаҳат битгани йўқ!— деб қўлимдан тортди. Энди яраси битиб келаётган қўлим санчиб кетди. Афтиими буриштириб олувдим, ойим аччиғидан тушди.— Ақлингни йиғ, ўғлим. Гапимга диққат билан қулоқ сол. Агар бордию, аданг чўлдан гап очиб, «Ҳаммангни олиб кетаман» деса, сен нима дейсан?

Нима дейман-а? «Йўқ, бормаймиз» десам, у хафа бўлади. Албатта хафа бўлади. Аслида-ку ўша ёқقا кўнглим чопиб турибди-я. Ўша, Султон амакилар ишлайдиган саҳрони, Султон амаки бажарадиган ҳунарни бир кўриб қўйсам ёмон бўлмасди-я. Лекин, «Майли, борамиз», дейишга ойимдан ҳайиқаман-да. Ақлим ишламай қолди. Елкамни қисиб, бақрайиб тураверганимдан сўнг, ойимнинг ўзи ўргатди:

— Бўлмаса у қулоғингу бу қулоғинг билан эшитиб ол: «Ҷўлингизга бормаймиз», деб туриб оласан. «Ўзингизни ҳам юбормаймиз» деб этагига ёпишасан. Попукка ҳам шундоқ деб ўргатасан. Икковинг оёқ тираб туриб олсанглар, шахтидан қайтар. Тушундингми, ўғлим?

Тушунганим билан бу осон ишми? Мен артистманмики, бирор ўргатгани худди ўшандоқ қилиб бажарсам? Ойимга миқ этмай, қараб турибман. Жавоб кутяпти у. То «хўп», демагумимча қутулмайдиганга ўҳшайман. Қулоғимни чўзиб бўлса ҳам «хўп» дедиради. Бу ташвишдан қулоқни чўздирмай кутула қолай дедим-да, «хўп» девордим. Ойим азбаройи хурсанд бўлганидан:

— Баракалла, ўғлим!— деб елкамга қоқиб қўйди.

Неча кунгача ойимнинг ўргатганиларини ичимда такрорлаб юрдим. «Ҷўлингизга бормайман!» Ўзи икки оғиз сўз-у, шуни овоз чиқариб айтмоқчи бўлсам, ҳеч тилим айланмайди. Султон амакининг ўзи ҳам бу тўғрида менга гап очмасди. Балки у кетиши фикридан қайтгандир? Докторлар: «Сенга чўл ҳавоси тўғри келмайди» деб қолдирганимкин? Докторларга маслаҳат солиб ўтиармиди у? Айтганидан қайтмайдиган кишига ўҳшайди.

Ўйлаганимча бўлди. Бугун у жуда эрта турди. Ҳар куни киядиган оппоқ кийимларини қалинроқ одми кийимларга алмаштириди. Ўйдан брезент жилдлик чамадонини олиб чиқди. Ойим билан озгина, бувим билан узоқроқ гаплашди. Попукни

осмонга кўтариб, пешанасидан икки марта, меникidan бир марта ўпди. Кейин хайрлаши. Попук:

— Менам бояман, менам,— деб эргашган эди, Султон амаки:

— Борасан, борасан. Кейин олиб кетаман,— деди.

— Маяжни-чи, маяжни обеясизми?

— Морожний ҳам обераман,— деб кулди-да, қўл силкит-танича чиқиб кетди...

...Бир ҳафта деганда хат келди. Султон амаки чўлга эсон-сомон бориб, ишга тушганини ёзибди. Лекин қаерда, қанақа ишлигини аниқ қўрсатмабди. Қисқа қилиб: «Ёнар дарё қуряп-миз», дебди-қўйибди. «Ёнар дарё»си нима экан, деб биз ҳай-рон бўламиз. Мунча қисқа ёзмаса-я! Вақти бўлмагандир-да. Янаги хатида аниқроқ ёзар, деб кутган эдим, ёзмади. Анча кун ўтди. У кетган вақтда эрта пишар ўригимиз довуччаси қиндан чиқсан эди. Ҳозир данак қотирди. Токимиз куртак ёзаётган эди, бугун ток оши едик. Бувим ош еб туриб, эслади:

«Эссиғина, Султонбой ўғлим паловхон тўрани яхши қўрар-ди. Бўлганда, ток ошини мақтаб-мақтаб ерди-да». Кунига овқат маҳалида шунаقا эслайди: «Тириклилиги қандай кеч-ётган экан-а боламнинг. Қаровсиз қийналиб қолаётгандир».

Бувим уҳ тортади-да, ойимдан сўрайди:

— Ҳой, Анорхон, хат келдими? Нега узоқлаб кетди-я? Узинг жавоб ёздингми?.. Ҳали ҳам-а? Ҳафсалангга балли-е. Нақ шўрликнинг кўзи тўрт бўлиб жавобингни кутаётгандир!

Шундан сўнг тушунаман: Султон амаки ўша хатида, «уй-ичи, болалар тўғрисида хат кутаман», деган эди. Ойим жавоб ёзмабди. Шуни кутиб Султон амаки бошқа ёзолмагандир. Ё иши кўпайиб, кўли тегмай қолдимикан? Тўрт оғиз хат ёзишга ҳам кўли тегмас эканми. Ё бизни эсламай қўйдимикан, а? Йўғ-е. Нималар деганди хайрлашаётганида? «Борасизлар, кейин олиб кетаман», демаганмиди?

Шу ваъда эсимга тушиб туради. Ҳар эсимга тушганда, юрагим орқамга тортиб кетади. Очиги, кўргим келади. Унинг қизиқ-қизиқ ўйинлари кўз олдимдан кетмайди. Мен-ку соғин-ганимни ҳеч кимга билдирамайман-а, аммо Попукнинг харха-шаси ўтиб тушади. Эрталаб ўринидан тура солиб:

— Адамга қачон боямиз?— деб ғиншийди.

Унга сари бувим уҳ тортади.

— Шунаقا қилиб кечаю кундуз ташвишда яшагандан кў-ра, бора қолсанг бўлмасмикан-а, қизим? Ҳоҳла болаларни олиб кет, ҳоҳла менга қолдир,— дейди ойимга.

— Бўлмайди-да,— деб ойим, нима учун бўлмаслигини очиқ айтди.— Болаларни ташлаб кетсам, сизга жавр бўлади. Олиб кетсам, энка-тинкамни қурилади.

Ана, келиб-келиб айб яна бизга тушяпти. Нима қилиш керак? Ойимнинг боргиси келаётган бўлса-ю, биз йўлини тўсамизми? Ўзимнинг ҳозир боришга қўзим етмаса ҳам:

— Ойижон, биздан хавфсирамай қўя қолинг,— дедим.— Айтганингизни қиласиз, сизни қийнамаймиз.

Ойим кўнмади. Менинг айтганимга кўниб бўпти! Шундан кейин бувим гап бошлади:

— Болаларни менга ишониб кетавер бўлмаса, қизим. Бинойидай олиб ўтираман. Вақтида хат-хабар юбориб турсанг бўлди. Ёз чиқса бир гап бўлар. Султонни ёлғиз кўйма, жонгинам. Хўп де сўзимга. Кенгаши тўй тарқамас, дейдилар.

Менга бу маслаҳат ёқди. Ойим бораверсин. Биз ҳозир эмас, ёзда борсак, ўйнаб келамиз. Хурсанд бўлганимдан Попукка:

— Роса ақлли-да акангни бувиси, а?— деб юборибман. Кошки Попук тушунса бу гапларга. Ўз ўйини билан овора у: Лайкага галстукимни «жилов» солибди-да,чув-чув деб миниб юрибди.

— Тентак-е, Султон амакининг «от-отакам» ўйпни хумор қилибди-да.

Дарров галстукни ечиб, Лайкани сиртмоқдан озод қилдим. Сал бўлмаса Попук у бечоранинг бел-мелини синдириб қўярди-я!

Бувим ҳали ҳам ойимдан жавсб кутарди. Ойим ўйлаб-ўйлаб олгандан сўнг, менга эшиттириб гапириди:

— Дамирингиз бешинчини эсон-омон битириб олсин-чи, кейин кўрамиз...

Буни эшитдим-у, бирор тарсаки ургандай, чўчиб тушдим.

— Ҳа, ойижон, бешинчини битирмайди деб қўрқяпсизми ҳали?

— Қўрқаётганим йўқ, ўғлим. Лекин битиришдаям битириш бор-да.

Ҳа, тузук, битириб олишимга қўзи етмаяпти. Султон амакининг олдига кетолмаётганига сабаб бир чекаси шумикин? Ҳамма гап менга, менинг ўқишимга боғлиқмикин? Нахотки Султон амаки билан ойимнинг хафалашиб қолишлираги мен сабаб бўлсан?.. Йўқ, йўқ, бундай бўлиши мумкинмас, ҳеч мумкинмас!

## 6. ТАШВИШ УСТИГА ТАШВИШ

**X**ар нима бўлсаям ҳаракатингни қилавер, Дамир-жон. Бешинчини битиргандаям «аъло» билан битиришга интил!

Тўғриси, бу айтишга осон. Ахир, бешинчидаги қанақа дарслар бор ўзи? Эҳе, битта арифметикани олинг. Қанча масала, қанча қоида. Қўшиш, айриш, бўлиш, кўпайтиришларни-ку билиб олдим. Агар мендан: «Бугун неча қадам йўл босдинг?» деб сўрасангиз, ўйламасданоқ айтиб бероламан: мактабга тор кўчамизнинг ўнг тарафидан чиқиб бордим — масофа 350 қадам (бир марта санаб кўрганман). Қайтишда бўлса ўртоқларим билан чиллак ўйнаганча, гузардан морожний олиб, чап тарафдан келдим. Бу ёғи ўнг тарафдаги масофага икки баравар келади. Ҳаммаси бўлиб бугун неча қадам босганимни билиш учун 350 ни иккига кўпайтириш, чиққан сонга 350 ни қўшиш керак, холос. Ҳа, айтмоқчи, нечта морожний олдинг-у, неча пул тўладинг, деб ҳам сўрасиз. 30 тийин тўлаб, иккита морожний олдим. 30 тийинни иккига бўлсак 15 тийин. Энди бу пулни қаердан олдинг, десангиз, бу ёғини ҳам айта қолай. Кунига сут-қатиқми, мевами олиб келиш учун бувим мени бозорга чиқаради. Бозоргача бўлган йўл автобусда икки остановка. Харажат пулига ойим ўн тийин қўшиб беради. Пиёда бориб келаман-да, бу пулни йигаман. Уч кунда қарабисизки, ўттиз тийин — ўзим билан Попукка морожний тайёр. Ана, пул ҳисобиyo, йўл ҳисоби десангиз, ҳаммасини билиб олдим, бўлди-да. Йўқ, бўлмас эмиш. Яна эринмаганлар «каср» деган нарсани ўйлаб топишибди. Бутун сонларнинг бўлаклари ёки улушлари эмиш бу: ярим, учдан бир, чорак, бешдан бир, ўндан бир... Куним шуларга қолдими? Нима қиламан-а бунақа майдада-чўйда ҳисобларни: мактабимизда доим кўзойнак тақиб чўт солиб ўтирадиган кишига ўхшаб бухгалтер бўлармидим.

Ишқилиб, хоҳласанг-хоҳламасанг бир-биридан баттар қийин топшириқларни юклайверишади.

Бу чалкаш масалаларни қанақа одам ўйлаб чиқарган экан, мияси айниб қолмаганига ҳайронман. Бирор ўйлаб чиқарадиган, сен бош қотирадиган. Бош қотира-қотира «4» баҳо олсанг, бу каммиш. Кейинги вақтда кунига икки маҳал дарс тайёрлаш ҳам озлик қилиб, кечалариям ўтирадиган бўлдим. Кўчага чиқиб футбол ўйнаш-у, ўртоғинг билан теннисда мусобақалашиш, суратчилик қилишга вақт қани. Бунинг усти-

га масалани ечолмай қолганингда йўл кўрсатиб юборадиган одам йўқ. Султон амаки эсимга тушиб кетади. Унинг жилмайиб қарашлари, «аҳвол қалай, ўртоқ ўқувчи?» деб дарсларимни суринтириши, бўш вақтида болалардай қизиқиб тенинса мен билан олишишлари... Ҳа, «Жўжалар», деб ҳазиллашишлари-чи? Олдинига бу ҳазили менга унча ёқмаганиди, борабора Попук қатори менга ҳам ўрганиш бўлиб кетганди. Ҳаммадан ҳам, бир куни мен ҳовузча бўйидаги каравотда ўзимни уйқуга солиб ётганимда оёқ учидаги олдимга келиб ўтиргани, пашша таламасин деб устимга секингина оқ чойшабни ёпиб қўйгани-чи! Шуларни эсласам, Султон амакини ҳозироқ кўргим келиб кетади. Жуда қадри ўтади. Бир келиб кета қолса бўлмасми, дейман. Менинг дарсимга ёрдам бермаса ҳам, Попукни ўйнатмаса ҳам, ўзи бир қўриниб кетса бўлгани эди. Борди-ю ҳозир келиб кетиши қийин бўлса, қисқагина хат ёзив бувим билан ойимни тинчитиб турса бўлгани эди. Эсидан чиқардими, ё биздан кечиб юбордими-а? Уз хаёлимдан чўчиб тушаман. Худди яқиндагина топиб олган қимматли нарсамни яна йўқотиб қўйгандай бўламан. Хат келиб қолар деб ўзимни тинчитаман. Бувим бўлса, уззукун хат кутади-да, кечга бориб уҳ тортиб қолади.

— У ёзмаганга яраша сенлар ёзсанг-чи, болажонларим!— деб зорланади.

Ойим чурқ этмайди. Афтидан ёзмайдиганга ўхшайди. Узим ёзсан-чи? Унг қўлим ишнинг белига тепиб турибди-да. Тўғри, энди уни оз-оз ишлатяпман-у, аммо тузукроқ хат ёзишга ярамайди. Чап қўл ундан баттар. Шунча ишлатиб кўрганим билан ўрганмади, ҳафсалам пир бўлди. Бир амаллаб хат ёзишга-ку ярап. Эгри-буғри, чатоқ чиқса Султон амаки сабабини тушунади. Лекин ён-веридаги бирор одам: «Қани, ўғлингиз қанақа хат ёзибди», деб қолса-чи. «Ия, ўғлим аълочи дердингиз, хати шуми ҳали!» деб уялтириб қўймасмикин?..

Эртасидан хат ҳам, бошқа нарса ҳам эсга келмай қўйди. Чунки бувим касал бўлиб қолди. (Уҳ тортаверганидан хавотирим бор эди). Ҳадеб чап биқинини ушлайди. Ойим борида унча билдиримайди-ю, ойим кетганда диванга ёнбошлайди.

— Нима қилди, буви?— деб сўрасам, у:

— Ҳеч нарса, болам. Сал чарчабман,— деб қўяди.

Бир вақт келиб қарасам, бувим диванда чўзилиб ётибди. Ранги кетган, пешанаси терлаган, қўллари қалтирайди. Оғир-оғир нафас олади. Қулоғига секин:

— Нима қилди, буви?— дейман.

Гапиришга ҳоли келмай, бошини сарак-сарак қиласы. «Хеч нарса», деб мени тинчтимоқчи бўлади. Мен қаттиқ қўрқиб, нима қилишимни билмай қолдим... Эсимга доктор қўшнимиз тушди. Уни чақириб чиқдим. У дарров укол қилди-да:

— Энди уринмасдан тинч ётинг. Сизга парвариш керак,— деб тайинлаб қўйди.

Ойим келиши билан бувим тағин туриб кетди. Касалидан ҳеч гапирмади. «Гапирсам, қизим ташвиш тортади, қийналади», деб ўйласа керак. Одати қизиқ-а бувимнинг: ўзи қийналсаям, бирор қийналмаса бўлгани. Шу ётган жойида ҳам Султон амакининг ғамини ейди:

— Касал қурсин. Ишқилиб, у ёқда Султонбой соғ юрган бўлсин. Бугун ҳам хат келмади-я, Дамиржон?

Энди ўзим хат ёзишим керакка ўхшайди. Бувимнинг касалини билдирай. Шундан сўнг зора жавоб ёзса, ё бир келиб кетса. Қойил фикр!

Буни ўйлашга ўйладим-у, аммо ёзишга қўлим тегавермади. Авваллари ишим кўп деб юрган эканман. Мана энди кўринг: ўқишига бориш, дарс тайёрлаш. Попукни ўйнатиш, уй иши... Ҳа, бувимга қарашибасам бўлмай қолди. Унинг ётганини кўрганимда раҳмим келади-да.

— Буви, чой қўйиб берайми? Е қатиқ ичкингиз келяптими?— деб сўрайман.

— Йўқ, қўзим. Барака топ. Дарсингта қарай қол,— деб қўяди бувим.

Бувимнинг инқиллаб-синқиллаб картошка артаётганини кўрсам, чапақайлаб бўлса ҳам артишиб юбораман. Лекин ниёз артишга тобим йўқ— қўзингдан ёш оқизиб юборади. Энг ёмон кўрган нарсам — йиғлаш.

Шунаقا қилиб, вақт деган нарса етишмай қолди. Мактабга югуриб бораман-у, югуриб келаман. Ўйинлар, тўгаракларга ҳафсалам ҳам қолмади. Бу ишим Солиҳга ёқмади.

— Хўш, сен нима учун звенодан четлашиб юрибсан?— деб сўрайди.

— Уйда ишим кўпайиб кетди,— десам, у ишонинқирамай:

— Қанақа ишлар экан, очиини айт-чи?— дейди.

— Бувим касал.

— Бувингни касалини сен боқармидинг? Бошқа сир бордир-а, айт очиини!

Мен буни энг яқин кишимиз — уйга келиб турадиган синф раҳбари Ҳалима опамга ҳам айттолмайман. Неча марта Ҳалима опам: «Дамиржон, аҳволлар қалай?» деб сўраганда ҳам,



Ҳаким Назир набираси Даврон билан.

«аҳвол яхши», деб қўя қолдим. Ҳозир Солиҳ, «очигини айтасан», деб тиқилинч қилиб туриб олган эди.

— Бор, бор, мен билан ишинг бўлмасин,— деб жеркиб ташладим.

— Нима дединг? Тўхтаб тур ҳали,— деб энгагини қисимлаб қўйди.

Эртаси звенода менга топшириқ берадиган бўлишди. Нима эмиш, бир боланинг «икки»сини «уч»га чиқаришга ёрдам берармишман. «Вақтим йўқ», дегандим, звено сбори чақириб, мени роса гап билан дўўпослашди. Фақат ўзимни ўйлаб звенони менсимай қўйганмишман, аълочиман деб гердайиб кетганмишман. Вой, нодонлар-эй, нимамга гердаяман? Тўғри, қишки каникулга чиққанимда, ҳамма баҳом «беш» эди. Ҳозирчи, ҳаммасимас. Узим ҳаммасини «беш» қиласман деб тиришиб ётибман-ку. Иннайкейин, гердайиш нималигини бола бўлиб билган эмасман. Суриштирмай-нетмай айблайверар

эканда. Жаҳлим қистаб, тишларим ғижирлаб кетди. Аммо индолмадим. Солиҳга бир ўқрайдим-у шартта синфдан чиқиб жўнадим. Солиҳ кетимдан югуриб, йўлимни тўсди.

— Нимага берухсат жўнаяпсан? Нима учун менга ўқраясан? Айт очигини!

Қарасам, худди муштлашадигандай кўкрагини кериб туриби. Унинг одати шунаقا — боксчиман деб чираниши яхши қўради. Худди бокс тушадигандай муштини туғиб, тирсагини чиқариб, семиз гавдасини полвонларча лапанглатиб юради. Гердайган деб уни айтса бўлади. Ҳозир бўш келсам, мени қўкраги билан итариб юборадиган. Агар тегса мен ҳам тушираман деб лунжини кўзлаб турибман. Ўзидан-ўзи чап қўлим мушт бўлиб кетди.

Солиҳ буни кўрди-ю:

— Ия, ҳали шу митти гавданга мен билан муштлашмоқ-чимисан!— деб елкамга туртди. Мен ҳам туртдим. Бирдан боксга олиб иккала муштини ишга солди. Мен ҳам муштлаrimни ишга солмоқчи бўлдим. Йўқ, ўнг қўлим ярамади. Оёғидан чалишга ҳаракат қилдим. У фирромлик қилди, мени олдинроқ юмалатиб қўйди. Мактабдан чиқсан болалар тепамга келиб:

— Оббо митти-ей! Оббо миттивой-ей? Юрагингни қара! Шу айнқ полвон билан олишиб ўтирибсан-а! Бешинчи синфда донғи чиқсан чемпион билан-а!— деб хахолашди.

Қўлим, елкаларим оғригани майли-я, болаларнинг «митти, митти!» деб калака қилишгани алам қилиб кетди. Югуришда кейин қолсам, сим дорга осилолмасам ҳам, шунаقا дейишади. Қўлим билан оёғим-қалтароқ бўлса, нима қилай!

Шу-шу Солиҳ билан юрмайдиган бўлдим. Илгари у бизнисига кириб турарди. Мен унга тениис ўргатмоқчи бўлиб юргандим. Энди у уйимизга кирмай қўйди. Менинг ҳар хил юмушларга ўралашиб зерикаётганимни кўрган бувим:

— Болам, ўртоғингни чақириб ўйнай қолгин,— деди.— Аnavи дўмбоқ ўртоғинг бор-ку, нега кирмайди?

Солиҳни айтмоқчи. Дўмбоқ бўлмай қурсин.

— Солиҳ билан пом чиқдик, буви. Ярамас, фирром...

— А? Нега? Ул-бул талашдиларингми?— деди бувим хавотир олиб.— Қўй, болам, ўртоғингни ёмонлашга ўрганма. Яхшимас — бирорин камситиш. Узингни эр билсанг, ўзгани шер бил, деганлар.

Тушунолмадим. Нима Солиҳни шер демоқчими? Солиҳни кўргим йўқ. Уйимга кирмай қўя қолсин. Бошқа ўртоқларим

етарли. Лекин улар ҳам кам киришяпти. Нега унақа? Улар мендан хафа эмас-ку. Ҳа, уларнинг ҳам иши кўпайиб кетганимикин менга ўхшаб? Ўйимизга кам киришгани майлику-я, бир хил ўйинларга мени чақирмай қўйишгани чатоқ бўлди. Дам олиш куни болалар тоққа экспурсия қўлмоқчи, деб эшидим. Солиҳ рўйхат қилибди-ю, мени қўшмабди. Қўшганда ҳам, бари бир, уйдан чиқолармидим? Шундоқ бўлса ҳам Солиҳдан сўрагим келди:

— Нима учун мени ёзмадинг?

— Биз кучли болаларни ёзамиз. Сен тоққа чиқолмайсан,— деди у.

Ҳавасим келганини, алам қилганини билдирамасдан:

— Шу тоғ ҳам гап бўптими! — дедим. Тоғ мактабимиз майдонидаги дараҳтлар орасидан офтобда симобдай йилтираб кўринади. — Ӯшами? Машинага тушсанг, бирпасда етасан. Қараб туринглар, мен шундоқ жойларга борайки, ҳеч қайси-ларинг тушларингда кўрмагансизлар.

— Қаерга экан, айтавер очиғини,— деди Солиҳ менсими-гандай бўлиб. Билиб турибманки, қизиқяпти.

— Айтиб бўпман!

— Ҳа, бўлди, айтмасанг ҳам биламан. Мирзачўлга бормоқ-чисан, холам бор деган эдинг. У ер нима бўпти, қип-қизил чўл.

— Қип-қизил чўлмиш. Кўрмаганмисан, гапирма.

— Кўрган бўлсанг, гапир-чи!

Бултур Мирзачўлда кўрганим обод қишлоқлар, мевазорлар эсимга тушиб тилим қичиди-ю, яна айтгим келмади.

— Ана билмайсан, чунки кўрмагансан. Биз тоғ остида қурилаётган денгизни, дарёнинг тоғ тепасидаги бошланиш жойларини томоша қиласмиз. Кўрмаган армонда қолади.

— Мен ундан ҳам антиқа жойларни кўриб келайки, оғзи-ларинг очиilib қолсин.

— Кўрамиз!

У билан ади-бади айтиб ўтиришга вақтим йўқ эди. Бувим эсимга тушиб, уйга чопдим. Келсам, бувим инқиллаб-синқиллаб ҳовли супуряпти. Қўрқиб кетдим. Тағин касали тутиб қолмасин дедим-да:

— Мен супура қолай. Сиз ётинг,— деб супургига қўл узатдим.

Бувим биқинини ушлаб, менга жилмайди.

— Барака тоғ, қўзим. Бугун, шукур, хийли тузукман. Ҳовли супуриш ўғил болага ярашмайди. Ундач кўра ўтириб адангга хат битгин. Ҳа, шундоқ. «Жуда соғиниб кетдик, адажон. Нима

бўлди сизга? Омон-эсон юрибсизми? Хатингизга интизормиз, адажон», деб битгин.

Ўзим ҳам шу бугун аҳд қилиб қўювдим. Стулга ўтириб, хат ёза бошладим. Чиройли чиқсан деб уринаман: гоҳ чап қўлим билан ёзаман, гоҳ ўнг қўлим билан. Бувим айтган сўзларни ёзил бўлдим-да, ўйланиб қолдим. Тағин нималар десам экан? Ҳа, «бувим касал бўлиб қолдилар, сизни кўп ўйлаб ташвиш қиласптилар!» дейман. Буни ҳам ёздим. Энди-чи? Ҳа, «она тилидан баҳомни «беш»га чиқаряпман. Ёзувим тузаляпти, мана кўринг», дейман. Хурсанд бўлади. Ёздим. Ҳаммаси бўлиб яrim бетча бўлди. У ёғини нима билан тўлдираман? Варақ-варақ хат ёзганлар гапни қаёқдан топаркин-а?

Енимга бувим келди. Хат ёзганимни билиб, севинди.

— Кани ўқи-чи, чирофим. Нима деб бошладинг? «Адажон» деб бошладингми?

— Ҳа, ҳа, сиз айтганча,— дедим. Ҳақиқатда эса, «Амаки» деб бошлаган эдим. Ҳаммасини ўқиб берганимдан кейин, бувим:

— Йўқ, йўқ,— деди.— Мени касал деган жойингни ўчир. Узоқдаги одамни ташвишга солиш яхшимас. Учир ҳозир.

Учиришга мажбур бўлдим. Энди хатни бошқатдан, тоза, чиройли қилиб кўчириш керак. Шундай қилаётган эдим, ойим ишдан қайтди. Оддимга келди-да, хатни олиб ўқиди. Ўқиётиб негадир афти тиришик кетди.

— Дарс тайёрлайсан десам, вақtingни шунга сарф қилиб ўтирибсанми!— деб менга қаттиқ ўқрайди-да, хатни йиртиб ташлади. Бувим билан мен афрайганча қолдик. Эссизгина, қанча уриниб, бирор кўрса кулмайдиган қилиб ёзувдим-а!

— Нега ундоқ қилдинг-а, қизгинам?— деди бувим.

Ойим димогида бир нималар деди. Қулоғимга «унутган одамга ҳам хатми?» дегандай бўлиб кирди. «Нега ундоқ дейсиз, ойижон?» деб сўрамоқчи бўлдим-у, авзойи бузук бўлганидан юрагим бетламади... Сал туриб қарасам, ойимнинг ўзи қилган ишига пушаймон бўлдими, пиқ-пиқ йиғлаляпти...

## 7. МЕНИ КИМ ҚУТҚАРДИ?

**Э**ҳ, ойижон, ойижон! Нега тағин хафа бўлдингиз-а? Наҳотки, шундоқ бўлади деб ўйлаган бўлсам-а? Ахир сизни хурсанд қилмоқчи эдим-ку.

Ким ойисини хурсанд қилгиси келмайди. Жон деб истайди ҳамма. Лекин-чи, истагани билан уддасидан чиқавермас экан.

Ойилар кўп нарсани талаб қилишадими дейман-да. Кучинг етиш-етмаслиги, ҳафсаланг келиш-келмаслиги билан иши йўқ. «Айтганимни қиласан», дейди — тамом. Боринг, ана — кучингиз ҳам, ҳафсалангиз ҳам етсин, аммо вақтингиз бўлмаса-чи? «Вақт ҳар кимнинг ўз қўлида. Гап ундан тўғри фойдаланишда», дейди ойим. Тўғри фойдаланиш учун нима қилишинг керак? «Ўзингни тута билишинг, бошқара олишинг керак», эмиш. Қачонки, миянг бир жойда турмаса, ўзингни қандай ушлай оласан? Мия беданамаски, тўр қовоққа қамаб олсанг.

Айниқса эшик қоқиб ёз келди-ю, хаёл тўрт ёққа сочилиб, вақт етишмай қолди. Қийналиб-қийналиб бўлсаям аҳдимни бажаришга бел боғладим.

Ўқишининг охирги куни ҳам келди. Бугун йиллик баҳомиз эълон қилинади. Ишқилиб ҳамма фандан «Беш» бўлай-да!

Бошқаларни билмайман-ку, мен жар ёқасида тургандайман. Пуф деса қулаб кетадигандай. Йўқ, қулаб кетмадим. Баҳолар эълон қилинганди, бўйим бир қарич ўсгандай бўлди. Йўқ, ундан анча баланд, осмон баравар кўтарилгандай бўлдим. Шу кўтарилганимча қушдай пириллаб уйга учдим.

Ховлиққанимдан ҳаллослаб, ўпкам тиқилиб қолган экан, бувим жон ҳолатда дивандан туриб кетди:

— Ҳа, ҳа, қўзим! Бирор қувдими, айт!

— Жойида! Жойида! — дейман-у, у ёғини айтолмайман.

Оғзимга пиёлада сув тутди. Ича туриб, воқеани айтдим.

— Вой, хайрият, хайрият-эй, қутулибсан! — деб мени бағрига босди бувим.— Ана энди еган-ичганинг ичиннга тушиб, бемалол ўйнайдиган бўпсан.

Ойим мендан тезроқ хабар олиш учунми, шанба бўлгани учунми, бугун ишдан эрта қайтди. Унга ҳам ҳовлиқиб айтиб бердим. Севиниб кетар деб турсам, йўқ, оддий хабардай қарши олди.

— Энди борамиз-а оий?

— Каерга?

— Ҷўлга.

— Мен сенга ваъда берибмидим? Жуда боргинг келяп-тими?

— Шунча кутай, шунча овора бўлай-да, тагин сиз...

— Овора бўлган бўлсанг, бирор учун овора бўпсанми?

Дамим ичимга тушди.

Нималар бўлаётганидан бехабар Лайка ўзича суйилиб оёғимга суйкала бошлаган эди, уни тепиб юбордим. У вангиллаганича думини қисиб нари кетди. Попук бўлса:

— Ата, тилла қўнғиз тутиб бейинг! Учийгим қиставотти,— деб хархаша қиласарди.

— Бор, бор, ҳамманг ҳам!— дедим-да, кўчага чиқиб кетдим.

Кетимдан бувим:

— Қўзим, йироққа кетма. Машина, ҳаптабусларга яқинлашма. Болаларга қўшилиб, катта сувга тушма,— деб тайнин лаб қолди.

Катта кўчага чиқибоқ, автобусга тушдим. Комсомол кўлига кетдим. Каникул бошланган. Боғда болалар кўп. Айниқса, катта кўл қирғоги қий-чув. Болалар қумда ағанашган, бир-бирларини қувишган, тўп тепишган, балиқлардай биланглашиб сувда сузишган. Мен қараб туармидим! Ечинибоқ ўзимни сувга отдим. Қун иссиқ. Сув муздаккина. Жуда маза. Одам чиққиси келмайди. Сузишни унча билмайман. Аввал юзароқ жойларда чўмиламан. Қейин болаларга қизиқиб, чуқурроқ жойларга интиламан, шўнғиб-шўнғиб чиқаман. Сувдан чиқа солиб, иссиқ қумга чўзиламан, болалар билан ўйнайман.

Қун қизигандан-қизияпти. Қорним очди. Энди қайтсаммикин десам, ҳеч ким кўлдан чиққиси келмайди. Қизиқиб, яна сувга ўзимни урдим. Бир тўда бола ким ўзиш ўйнашга киришди. Қўлнинг ўртасига қараб сузиша кетди. Балиқдай биланг-биланг қилиб, гоҳ униси ўзиб кетади, гоҳ буниси. Үнга сари, қирғоқдагиларчуввос кўтаришади. Ўзиб кетган боланинг номини айтиб:

— Яша, бўш келма, қойил!— деб, чапак чалишади. Худди футболдагининг ўзи.

Мен ҳам қизишиб кетибман. Сузиб бораётганларга қараб интилибман. Нима, кўлчилиги ўзим тенги болалар шунаقا сувгандан, мен қоларканманми. Кучим борича қўл-оёғимни шалоплатиб, анча жойга бориб қолибман. Шу вақт гулдир-гулдир қилиб кўл ўртасидан «Пионер» кемаси ўтиб қолди. Бирдан сув қаттиқ чайқалиб, тўлқин турди. Тўлқин кўтарила-кўтарила биз томонга етиб келди. Етиб келди-ю, ўшишув ўйнаётган болаларни худди пўкақдай ҳар ёққа улоқтириб ташлади. Арғим-чиқ учгандай болалар сувда баланд-паст бўлиб, гоҳ йўқолиб, гоҳ кўриниб орқага қайтишарди.

Бу — ҳам қизиқ, ҳам қўрқинчли эди. Яхшики, мен берироқдаман. Лекин тўлқин менга ҳам етиб келди, тўсатдан тортиб кетди. Илгари кўчамиздаги ариқда чўмилганимда ҳеч бунаقا бўлмасди. Ҳозир оёқ-қўлларимни эволомай қолдим. Оғзи-бурним сувга тўлди. Қўзим ҳеч нарсани кўрмайди, қуло-

ғим эшитмайди. «Вой-дод!» деб бақирмоқчи бўламан, овозим чиқмайди. Ўзим сувнинг устидаманми-остидаманми билолмайман.

Бир вақт кўзимни очсам, қумдаман. Устимда болалар уймалашган. Шовқин-сурон. Мени улоқ-улоқ қилишяпти:

— Қулоғидан торт! Оёғини осмонга қил! Бошини силкит!

Мени циркдаги дорбоз боладай хўп ликиллатиб, ағдартўнтар қилишди. Шалвираб қолдим. Кейин ётқизиши. Илиқ-қина қум ёқиб, мудрабман. Шовқиндан уйғониб кетдим. Ўрнимдан турай дейман, гавдамни кўтаролмайман. Ўзим нима аҳволдаман-у, болалар хаҳолашарди. Майна бўлиб қолдим шекилли-а, уларга.

— Бўлди эркалик қилиб ётиш. Уйинг эмас бу. Тур, кетдик!

Таниш овоз. Солиҳ. Чап қўлтиғимдан у, ўнг қўлтиғимдан яна биттаси кўтариб, мени етаклаб кетиши. Йўл-йўлакай Солиҳ жавварди.

— Сен миттига ким қўйди кўлда сузишни! Ҳазилми бу сенга. Олдин уйингдаги ҳовузчада сузишни машқ қилиб олгин-да, кейин тушгин катта кўлга.

Оббо, роса жигимни эзади шекилли боргунча.

Иккинчи бола индамайди-ю, пиқ-пиқ кулади.

— Нега куласан, ҳей бола? Тўғримасми сўзим? Қўлидан келса қатнашсин-да сузиш мусобақасига. Мана бизга ўхшаб...

Баҳона билан ўзини мақтаб, мени ерга урятти. Бола энди жим туролмади:

— Ўзи бечоранинг бўладигани бўлди-ку. Нима қиласан дакки беравериб,— деди у.

— Менга ақл ўргатмоқчимисан?— деб Солиҳ унга ўшқирди.— Сувга чўқканни қутқардим деб чираняпсанми? Сен бўлмасанг ҳам ўзимиз қутқариб олардик! Ҳа, ўзинг кимсан, қайси мактабдансан? Очифини айт-чи!

Шундан кейин, мен ўнг ёнимдаги болага яхшироқ тикилдим. Бегона бола. Мендан каттароқ. Қотма, кўқ кўз. Юзи, пешанасига ҳурлайиб тушган сочлари сап-сариқ. Қўриниши мўмин-ювош. Анча жойгача Солиҳнинг саволини эшитмагандай борди. Солиҳ яна «Очифини айт!» деб қистагандан сўнг, секин деди:

— Нима қиласан суриштириб?

— Билишим керак.

— Нима учун?

— Шунинг учун!— деди Солиҳ гап тополмай.

— Қизилқумданман,— деди бола энсаси қотгандай.—  
Қизилқумни биласанми?

Солиҳ ажабланиб боланинг бошидан оёғигача қараб чиқди-да, яна сўради:

— Қизилқуминг қаерда?

— Географиядан хабаринг йўқми?

— У ёғи бизнинг иш,— деди турқини ўзгартмай Солиҳ. Тўғриси, Қизилқумни у ҳам, мен ҳам билмасдик.— Географияни билсанг, ўзинг айт-чи: Қизилқум қайси республикада?

Бола пиқиллаб кулган эди, Солиҳнинг жаҳли чиқди. Болага хунук қаради-да:

— Нима, ўйнашайсанми биз билан. Шаҳаримизда нима қилиб юрибсан, қишлоқи! Боравер келган жойингга!— деб юборди.

Боланинг кўзлари пир-пираб, лаблари гезарди.

— Нима, нима? Оғзингга қараб гапир!— деди овози қалтираб. Шунда унинг «ғ»ни «ғ», «қ»ни «қ»га яқин қилиб айтганини сездим. Бирдан Солиҳнинг олдига ўтиб, йўлини тўсди. Тишлари фижирлаб, муштлари туғилди. Азбаройи қаттиқ туғилганидан ориқ қўлининг суюклари оқариб кетди. Энди менга у, мўмин-ёввош бола бўлибмас, бирорга ҳақини ўтказмайдиган, ёмон гапни кечиролмайдиган бола бўлиб кўринди.— Ким қишлоқи?— деди Солиҳнинг энгагига муштини тираб.

«Хорма, Солиҳ!» деб турибман ичимда. Солиҳ ҳам дарров муштини ишга солди. Ўзим шалвираб, кўнглим озиб кетаётгани учун аралашмай, бир чеккада турровердим. Кўз очиб юмгунча ола-тасир «жанг» бошланиб кетди. Солиҳ илгари менга ишлатган фирромлигини ишлатиб кўрди, бўлмади. Бола бало экан. Шошириб, довдиратиб қўйди. Солиҳ гоҳ у ёққа, гоҳ бу ёққа гандираклаб кетар, деворга, сим ёғочга суюниб қоларди. Яхшики, йўловчилар келиб ажратиб қўйишиди. Солиҳ шолғомдай қизариб, қалт-қалт титраб, пишқирганча ўтириб қолди. Ўтирган жойида ҳа деб кучаярди.

— Тўхтаб тур, қишлоқи, абжағингни чиқараман! Сен мени билмас экансан! Тўхтаб тур, ҳали!

— Мана тўхтаб турибман. Кела қол, кучинг бўлса,— деди бола ҳам ҳарсиллаганча.

Мен боланинг қўлидан тортдим. Солиҳ эргашар десам, юраги бетламади. Бола мени ёлғиз кетмасин дедими, бирга юрди. Энди у ўзини босиб олган, башараси аввалгича ёввош бўлиб қолган эди. Қўнглимдан шу гап ўтди: «Фирромликини билмайдиган, ҳалол бола кўринади. Ўртоқ бўлсанг арзийди».

Шундоқ деб айтгим келди-ю, кейин айтарман дедим. Уйга таклиф қилдим.

— Йўқ, зарур ишларим бор,— деди тортиниб.

Қистаб қўймадим. Қизилқумлик ажойиб бола билан яхшироқ танишиб олгим келарди. Иннайкейин, уйга у билан кирсам, ойим камроқ уришар...

## 8. ҲАЙВОНОТ ДУНЁСИДА

**О**йим хўб аччиғланиб, калтаклайдиган бўлиб ўтиргандир десам, бошқача бўлиб чиқди.

— Қаёқларда шаталоқ отиб юрибсан, ўғлим. Қидирмаган жойим қолмаса-я!— деб олдимга келди. Мен ўзимни дадил тутишга интилдим. Шундоқ бўлса ҳам, ойим афтиимга қараб чўчиб қетди.— Сенга нима бўлди, рангинг қум ўчиб, лабларинг гезариб кетиби?— Мен индамадим. У тахмин қилди.— Ҳа, ўлардай чўмилганга ўхшайсан-а?

— Тайнламабмидим, қўзичогим: йироқقا кетма, катта сувда чўмилма, ров бориб, ров кел, деб-а!— деди у ёқдан бувим куйиниб.

Энди, ойимнинг кўзи болага тушди. Бола йўлакда мўлттайиб туарди.

— Кел, укажон, тортинмай келавер, бу ёқقا,— деб ойим икковимизни ҳовузча бўйидаги столга бошлади. Иссиқ чой олиб келди. Кетидан овқатга уннади. Биз бола билан индамасдан чой ича бошладик. Бир-биrimизга, қизиқ бўлди-а, деб ишшайишиб қўямиз. Сал ичим исигандан кейин гап бошлайман:

— Қизилқумданман дедингми?— Қизилқумнинг қаер, қанақа жойлигини билмайман-у, лекин билгандай кўринаман.— Нима иш билан келған эдинг?

— Ўзим,— дейди бола тортиниброқ.

— Гапиравер. Ўртоқ бўлдик-ку. Айтмоқчи, отинг нима?— Саволни қалаштириб, уни гапиришга мажбур қилдим.

Болани биринчи кўрганимда сочи, афти сариқ бўлганидан рус ё татармикин деб ўйлагандим. Оти — Бўрон экан. Асли тошкентлик бўлиб, геолог дадаси билан Қизилқумга бориб қолган экан. (Ҳа, Солиҳ «қишлоқи» деганда хафа бўлгани шундадир.) Аввал куни Тошкентдаги қариндошиникига келибди. Бекор келмабди. Қизилқумдан кийик боласи келтириб, ҳайвонот боғига топширибди.

— Кийик боласини қаердан олдинг?— дедим ишонинқирамай.



— Адашиб келган экан, тутиб олдик.

Кийик боласини ким билан, қандай қилиб тутганини тұла билгім келади. У бұлса «отам билан», деб қисқа жавоб беради. Бола буны шунчаки арзимас бир нарсадай қилиб гапиради. Менга бұлса жуда ғалати воқеа бўлиб кўринади. «Тағин қуруқ аравани олиб қочаётган бўлмасин» дейман ичимда. Шу пайт бувимнинг «бирор тўғрисида ёмон фикр қилма!» дегани эсимга тушади-ю, яна ишонмайман.

— Ростдан айтаяпсанми шуларни?

Саволим ёқмадими, бола елкасини қисди-да, ўрнидан турди.

— Шошмай тур, тенинис ўйнаймиз.

— Билмайман.

— Үргатиб қўяман.

— Вақтим йўқ.

Бўроннинг кетаётганини кўриб, ойим:

— Ҳой, укажон, тўхта. Овқат еб кет,— деб йўлини тўсди.

Бола ноилож қолди. Мен уни тенинс тахтасига бошлаб, ўзимча ўйин қоидасини тушунтирган бўлдим. Бўрон дарров уқиб олиб, ўйинга киришди. Ўйин баҳона-ю, гапга соляпман. Қизилқумдан, кийик овидан сўраяпман қайта-қайта. У тушунириб ўтиришга эринди-да:

— Ишонмасанг, ҳайвонот боғига бориб кўра қол,— деди.

— Ўзинг бирга борасанми?— дедим.

— Майли. Эртара,— деди.

Бўрон кетгандан сўнг ойим у боланинг кимлиги, у билан қаерда танишганимни сўраган эди. Мен, кўлда чўкканим, боланинг қутқаргани қолиб, бошқа томонини айтдим.

— Қизилқумдан бўлса, балки...— деб ойим негадир ўйланқиради.—«Ёнар дарё»ни ўша ёқда дейишади...

Шу вақт ойим Султон амакини эсладими йўқми, билмайман. (Кейинги кунларда ойим бувим билан бир-икки марта уни эслашиб гаплашганини эшитган эдим). Ойимнинг ҳозирги сўзи менга Султон амакини эслатди. Чиндан ҳам «Ёнар дарё» ўша ёқда бўлса, Султон амаки ишлаётган жойлар ҳам ўша ёқдамасмикан?

Эртаси Бўрон билан ҳайвонот боғига кетаётib шуни сўраб олмоқчи эдим. «Ҳайвонот боғига борамиз» деганимизни Попук эшитган экан, «мен ҳам», деб ёпишди. Попук-ку томоша пайида. Лайка нима қиласи бурнини суқиб. Ҳайдасам, кетмайди. Хуллас, одамни ўз ҳолига қўйишмас экан-да.

Йўлда пайт топиб, Бўрондан сўрайман:

— Ўша ёқда «Енар дарё» бор дейишади. Тўғрими шу?  
Бўрон менга кўзларини пирпиратади.

— Буни кимдан эшитдинг?

— Ойимдан.

— Ойинг кимдан эшитган?

Нима десам экан? Уйлаб турувдим, ёнимиздан «пат-пат» қилиб мотоцикл ўтиб қолди. Уни кўрди-ю, Попук: «Ака, пат-пат обейинг, пат-пат обейинг!» деб шовқин солди.

— Гапнинг белига тепмай тур,— деб оғзини бекитдим-да, Бўронга айтдим.— Адамдан.

— Аданг ўша ёқдами?— Бўрон қизиқиб тўхтади. Ҳа, деб бош қимирлатсам, кўзларини бақрайтиради.— Ия, қизиқ бўлди-ку. Нима иш қилади аданг?

— Машиналарга катта у киши.

— Қизиқ бўлди-ку!— деди яна Бўрон, ўзини тутолмай кулиб.— Қанақа машиналарга катта?

Бўронга ҳайронман, мунча сўроқни кўпайтирмаса. Ё шу қизиқишида бир гап бормикин, а? Мен Султон амакининг қанақа машиналарга катталигини қаёқдан билай? Шуни ўйлаб бораяпман. Аммо Попук ўйлашга ҳам қўймайди. Елкамга миниб олгани етмагандай, икки юзимни дўмбира қилиб chaladi, «Туёмбой! Туёмбой!» деб қичқиради. «Туям бор» деганими, ё трамвайнин кўриб айтгяптими?

Лайкани аранг ҳайдаб, ўзимиз трамвайга чиқдик. Тиқи-линч экан. Гапимиз узилиб қолди. Ҳайвонот боғига етиб, трамвайдан тушсак, Лайка яна олдимизда! Думини ликиллаб-тиб, ҳарсиллаганча тилини осилтириб турибди. Қандай етиб келганига ҳайронмиз.

— Бунинг эси бутун экан. Катта бўлганда овга ўргатсанг бўлади,— деб Бўрон Лайкани кўтариб олди. Бошини силаб-силаб эркалади.— Роса чарчабсан-а жонивор, югуравериб. Үпкангни бос.

Ҳайвонот боғига анчадан бери келмаган эдим. Киришим билан томошага қизиқиб кетдим. Бўрон ўзи топширган кийик боласини сим катаклардан қидира кетди. Биз бўлсак, ҳали дараҳтларга осилиб дор ўйнаётган маймунлар олдига, ҳали ўйнашиб бир-бирини ғажиб қўйяй деяётган йўлбарслар катагига югурмаз. Болалар ташлашаётган ёнгоқ, қандларни узун хартуми билан илиб олаётган филни, икки оёғида туриб музикага ўйнаётган айиқларни томошча қиласиз.

Бўрон бир кўриниб, бир кўринмай, томошабинлар тўпига шўнгиф юрибди. Ҳар кўринганда:

— Ҳа, топдингми? — дейман.

У бошини сарак-сарак қилади. Бир вақт роса диққати ошиб келди.

— Мен топширган кийик боласи ҳеч қайси катакда кўринмайди.

Боши қотиб турди-турди-да, яна борни айланиб кетди. Анчадан кейин, шалпайиб қайтди. Энди у менга нима дейишга ҳайрон. Мен Бўронга қанчалик ишонмай, «кийик тўғрисидаги гаплари ёлғонмасмикин», деган фикр калламга келиб турди. Ўзига бу ўшубҳамни сира сездирмайман.

Роса айланиб чарчадим. Кўпроқ Попук чарчатди. Тез-тез елкамга чиқиб турди. «Мояжни» жанжалини қиласди. Морожний олиб, бир чекада еб турдик. Шунда Бўроннинг диққатлигини ёзиш учун бояги гапга қайтдим:

— Сен нега ҳадеб адамни суриштирдинг, а?

— Адангними? — деди ҳушини йифиб олиб у. — «Ёнар дарё»да бўлса кўрганмикинман, деяпман-да.

— А, а? — дедим, — ҳали сен «Ёнар дарё»ни кўрганмисан? Уз кўзинг билан-а?

— Бўлмасам-чи? — деди Бўрон парвосизгина ва нарироқда бир таниши кўриниб, ўшанга эргашди. Мен уни тутиб:

— Ҳозир айтасан, қанақа «Ёнар дарё?» — деб қистайман.

«Хўп, ҳали», деб Бўрон ўша одамга етиб олади. Бу ёқда морожнийни еб бўлган Попук, энди:

— Сомса! — деб хархаша бошлади.

— Оғзинг жим турмас экан-да! — деб бақирган эдим, йиф-лаб берди. Лайка ҳам унга қўшилишиб вовиллаб юборди. — Жим, жим! — деб унисининг оғзини ёпсам — буниси бошлайди, бунисиникини ёпсам — униси.

Одамлардан гап эшита бошладим. Бир милиционер хотин бўлса азза-базза дастрўмолига Попукнинг бурнини, сўлакайини артиб қўйди. Қўлига битта сомса олиб бериб, кейин мени уриша кетди:

— Ойисига обор, ойисига! Еш болани ёш болага топширан она қанақа она экан!

Бирорнинг ойиси билан милициянинг неча пуллик иши бор-а, деб хит бўламан. Попук жиннивой бўлса, ори келди шекилли, сомсанни отиб юборди. Лайка пайидан экан, хоппа илиб олди-да, овози ўчди. Попук энди:

— Ойимга тетамиз, — деб йиги солди.

— Бирпас жим тур, — деб нарироққа бораман. Аланглаб Бўронни қидираман. Тополмайман.

Попук барада чинқириб юборгандан сўнг, эшикка чиқишига мажбур бўлдим. Попук трамвайга қараб чопди. Мен ушлаб, орқага тортаман. Зора Бўрон кўриниб қолса дейман. Охири бўлмади. Попук билан Лайка дардисарни деб, Бўронни адаштиридим. Энди нима бўлади? Уни қайтиб кўроламанимийўқми? Ўйлаб ўтиришга вақт қолмаганди. Трамвайга тушадиган бўлдик. Лайка-чи? Трамвайга туширармиди уни! Бор-е, уйни топса топиб борар, топмаса ўзидан кўрсин.

Кўчамизга келдик. Кўп ўтмасдан Лайканинг қораси кўринди. Трамвай билан олдинма-кетин етиб келибди. Ҳарсил-лайвериб тили бир қарич осилиб кетган. Ҳар ҳолда эсинг бутун-да, қурғур. Қатта бўлсанг овчи қиласман!

## 9. ХУШХАБАР

**К**орним кўчиб кетган ҳовлидай бўлиб қолган эди. Шунга қарамай, томоғимдан овқат ўтмасди. Ҳайвонот боғида кўрганларимизни гапириш Попукка қолди. У ойим билан бувимга чучук тили билан, пойма-пой сўзларди. Бир томошибининг қизиқчилик қилиб айтган гапи эсида қолган экан: маймунни — чала одам, йўлбарсни — полвон мушук деб тушунтириди. Филни — бурни узун тая, кийикни бўлса шохли тойча деб, кулги бўлди.

— Попугинг тўғри айтаяптими? — деб сўраб қўяди кулгидан ўзини тўхтатолмаган ойим.

Ақёл-ҳушим Бўронда бўлганидан, гапни айлантирмаслик учун:

— Ҳа, — деб қўя қоламан.

— Ҳалиги ўртоғинг айтганини кўрсатдими? — деб қизиқади ойим.

— Ҳа, — дейман. Бўроннинг обрўсини туширмаслик учун.

— Анча уддабурон бола кўринади-я? Ҳзи қани?

— Ҳозир келиб қолади.

Шу гап оғзимдан чиқди-ю, чиндан ҳам Бўроннинг келишига ишониб қолдим. Тиқ этса эшикка қарайман. Кўчага чиқиб пойлайман. Қелавермагандан кейин қидириб, комсомол кўлига бордим. У ерда болалар чўмилаётган, самолёт учайдиган, волейбол ўйнашаётган жойларни, кема пристанини айланаб чиқдим. Кўринмайди. Ҳафсалам пир бўлиб қайтаётганимда, болалар темир йўли тарафдан:

— Дамир, ҳов Дамир! — деган овоз келди.

Таниш овоз. Қарасам — Бўрон. Югурдим.

У станцияни кўриб юрган экан.

— Одамни сарсон қилдинг-ку. Қаёқقا йўқолдинг?

— Үзинг-чи,—деди у баланд келиб.—Дарров жуфтакни ростлаб қолибсан. Ошна ҳам шунақа бўладими? Мен бир танишни учратдим. Кийикчамни олиб қолган ўша киши эди. «Кийигимни нега катакка қўймадинглар? Керак бўлмаса ўзимга тан» десам, у қизиқ гап айтди: «Хотиржам бўл, кийикчанг худди онаси қорнида ётгандай роҳат қиласпти. Шерикла-ри қаторига қўшиб, уни ўқитяпмиз. Саводи чиқиб, гапга тушу-надиган бўлгандан кейин, катакдан жой олади». Олдин ин-дамасдан ташлаб кетаверган экамман. Энди бўш келмадим. «Бўлмаса, амаки, менга тилхат ёзиб беринг», дедим. «Ҳа, бу пухта гап. Узинг ҳам пишиққина бола кўринасан», деди. Идорага бошлаб кирди-да, бир қофоз ёзиб берди. Мана.

Бўрон чўнтағидан қофоз олди-да, ўқий бошлади:—«Берил-ди ушбу справка гражданин Б. Титовга шул тўғридаким, мазкур гражданин бизнинг ҳайвонот боғимизга бир нафар кийик боласи келтириб топширди. Ҳайвонот оламидаги жони-ворлар оиласига янги меҳмон қўшилганлиги учун ёш овчи Б. Титовга ташаккур билдирилади...»

Кейин кийикчанинг олти ойлик бўлгани, оғирлиги, бўйи кўрсатилган эди.

— Ӯҳў!— дедим бу аломат хатдан оғзим очилиб.

Айниқса «Б. Титов» деган жойи мени ҳайрон қолдирди. Еки Бўрон жўрттага шундай деб ўқидими? Қоғозни қўлимга олиб, унга тикиламан: «Б. Титов». «Б» дегани Бўрон бўлса, «Титов» и ким бўлди?

— Нега унақа?

— Нимаси «унақа?» Тўппа-тўғри-ку!— дейди Бўрон.

— Нега энди «Титов?»

— Шунақа-да фамилиям.

Ақлим шошди. Бир йўла анча савол туғилган эди: дадаси рус бўлса, нима сабабдан унинг оти ўзбекча? Иннайкейин, анави космонавт Герман Титовнинг қариндош-париндоши эмасми?

Очиғи, ҳозир мени ҳаммадан олдин «Ёнар дарё» қизиқти-раётган эди. Бўрон кассадан иккита билет олиб чиқди-да:

— Қани, юр,—деб поездга бошлади. Яна биррас тўхтаб, чиройли вагонлар, уларнинг эшигига билет текшираётган темирйўлчи формасидаги кичик кондукторлар, шошилишган ҳовлиқишиган ўйловчиларга ағрайди.

Вагонлар олдида турган навбатчи қўлидаги сариқ байроқ-

часини силкитди. Сигнал чалинди. Паровоз пишқирди. Биз шошиб вагонга чиқдик. Вагон лиқ тұла. Жойлар талаш. Чувур-чувур. Мен бу поездда күп юрганман, шунинг учун ҳеч нарасага парво қилмай, Бўронни гапга солмоқчи бўламан. Бўрон шовқин-суронга алаҳсийди, дараҳтлар оралаб бораётган поезд ойнасидан ташқарини томоша қиласди.

— Ҳой, менга қарасанг-чи,— дейман уни туртиб.— Ҳар балога афраяверасанми? Айтгин, «Ёнар дарё» қанақа?

— Миямни қотирдинг-да,— дейди Бўрон ташқаридан кўзини узмасдан.—«Ёнар дарё»ни икки оғиз сўз билан тушунтириб бўлмайди-да.

— Қе, ўртоқ, айта қол,— дедим ялиниб.

— Барис бир тушунмайсан-да...— Бўрон бир оз таранг қилгандан кейин, қисқача деди:— Ҳов Бухоро тарафдаги Қизилқумда зангори олов кони чиққан, эшигандирсан? Уша кондан дарё қазиб келишяпти зангори оловни оқизиш учун, тушундингми?

— Қўйсанг-чи, олов қандай оқади дарёдан?

— Оқади! Дарёга жуда каттакон, сен билан мен сиғиб кетадиган пўлат қувурлар ётқизишияпти. Уша қувурлардан ҳамма ёққа олов оқиб боради — сенинг кўчангу йўйингга ҳам...

Бўроннинг гапларига оғзим очилиб турган эди, поезд таққа тўхтаб, ҳамма бир-бирига урилиб кетди. Шовқин-сурон кучайди. «Қўёш» станциясига келган эдик.

Бу ердан осмондай кўм-кўк кўл, «Пионер» кемасининг байроқлари, узоқда ўрдаклардай сузишаётган болалар яққол кўринди.

— Яна мусобақалашамизми?— деди Бўрон, ўшаларга хаёли оғиб.— Е қўрқиб қолдингми? Бир мақол бор: бўридан қўрқкан ўрмонга кирмайди. Дадам кўп ишлатарди шуни.— Бўрон негадир чукур хўрсиниб олди. Афтига тикилсам, кўзларида қайғуга ўхшаш белги. Нега унақа? Унинг ҳам дадасига бир нима бўлганмикин-а? Шунда у бирдан сўраб қолди:

— Дадангнинг фамилияси нима?

— Арслонов.

— Э, тўхта! Қанақа ўзи? Бўйи новчами?

— Новча. Степа амакидай...

— Пешанасида ортиғи борми?

Елкамни қисдим. Шунча бирга бўлиб Султон амакининг пешанасига тикилмаган эканман. Тавба, одам яқин кишисидаги камчиликларни кўрмас эканми, деб қўйдим. Е, Бўрон бутунлай бошқа одамни айтяптимикин?

— Афти-чи? Негрга ўхшаганми?  
— А-а?— дедим, бу саволи ҳам ғалати эшитилиб.— Қора-  
чароқ-да, отлари Султон.

— Отини билмайман,— деди бу ёғини тағин лаиж қилиб.—  
Узи яқинда борган. Яхши инженер, дейишади. Ушами-ўша-  
масми даданг, қайдам.

— Ушадир,— дедим ишонгим келиб.

Поезддан тушдик. Тағин йўқотиб қўймай деб, Бўроннинг  
тирсагидан олиб олдим.

— Юр, уйга. Бу гапни айтиб, бувимни хурсанд қиласиз.

Ичимда ўйладим: бувим-ку хурсанд бўлади-я! Ойим қан-  
дай бўларкин? У ҳам хурсанд бўлар. Соғингандир бизга  
ўхшаб. Бир-икки марта тушига ҳам кирибди— бувимга айт-  
ганини эшитдим. Агар ўйламаса тушига киравмиди. Бирдан  
хәлимга янги фикр келди:

— Қачон қайтмоқчисан?

— Йндинга. Ҳа?— деди афтимга тикилиб.— Боргинг кел-  
яптими?

— Олиб кетсанг борардим...

— Хоҳ, ойингиз кўчага зўрға чиқаради-ку, Қизилқумга  
жавоб берармиди?

— Жавоб олсам-чи?

— Олиб бўпсан!

Ўйлаб кетдим.

— Бўлди, жавоб оламан! Қандай қилиб бўлса ҳам...

Бўрон чўмилгани қолди. Ўзимнинг ҳам чўмилгим келиб  
турувди-ю, уйга шошилдим.

Хурсанд кириб борсам, ойим билан бувим:

— Ҳа, ўртоғингни топдингми? Мунча оғзинг қулоғингда?—  
дэйишди.

Мен, Қизилқум, «Ёнар дарё», Султон амаки тўғрисидаги  
гапларни айтмадим. Айтганимда ойим қизиқса-ку тузук, қизиқ-  
маса унда йўлимга ғов тушади. (Хатни йиртиб ташлаганидан  
бери Султон амакидан гап очишга безиллаб қолганман).  
Ундан кўра гапни бошқа ёқдан айлантира қолай.

— Ойи, отпускага қачон чиқасиз?

— Маълуммас.

— Мактабдагилар экскурсияга кетишяпти. Мен ҳам борай.

— Қайси тарафга?

— Тоққа.

Ойимга ёқинқирамасдан турган эди. Ҳар вақтдагидай  
бувим ёнимни олди.

— Майлига. Якка ўзи кўча чангитиб юргандан кўра, ўртоқларига қўшила қолсин. Мук тушиб ўқий-ўқий чарчади, қўзичоғим. Яйраб, дам олиб кела қолсин.

Экскурсияни гапириб қўйдим-ку, кетидан пушаймон бўлдим. Ойим хўп деса, болалар қўшармикин? Агар бир-иккита бола «қўшмаймиз» деса, Ҳалима опам бор-ку, қўштириб қўяр. Лекин-чи, қўшишсаям иш чатоқ бўлади, қўшишмасаям.

Дилимдагини худди билгандай, ойим маслаҳатни бошқа ёққа буриб юборди:

— Ундан кўра холангниги бориб кела қолгин. Кўп вақт бўлди кўришмаганимизга ҳам. Чакиравериб эси кетди. Ўзи келмоқчи эди, дараги йўқ. Хабар олиб келасан.

Бўлди! Мирзачўлга рухсат! Бўлди! У ёғи осон! Қанча-қанча нарсаларга илож топган—бунга илож тополмасми迪 Дамир?!

Суюнганимдан ойимнинг бўйнидан қулоқлаб олдим. Ойим ҳам мени маҳкам ачомлади. Попук туғилгандан бу ёғига ойим қўпроқ уни ачомларди-ю, мен анча четга чиқиб қолгандим-да: Ҳозир бираро роҳат қилдим. Дарров мени уйқу босди. Ойиси ачомлаганда ҳаммани ҳам шунақа уйқу босадими-йўқми, билмайман.

Одам хурсанд бўлса чарчаганини ҳам билмас экан. Ўзимни қўярга жой тополмайман.

Яна Бўронни излашга тушдим. Боғ эшигига учратдим.

— Қўлингни бер. Маслаҳат битди!

— Алдаётганинг йўқми?— деди Бўрон ишонмай.

— Ишонавер, беш кунга рухсат олдим.

Бўрон ҳам бу хабардан хурсанд бўлиб кетар, деб турсам, парво қилмади. Қайтага ваҳма солиб, самолётда учиш, қум сахросида юришнинг қийинлигидан гапириб кетди.

— Тағин йиглаб, менга дардисар бўлиб юрмагин?

— Йўқ.

Шундан сўнг у мени бирга олиб кетишга кўнди.

Сир очилиб қолмасин деб, бу сафар Бўронни уйимга судрамай қўя қолдим.

Эртасига аэропортда учрашадиган бўлиб хайрлашдик.

Уйда сафар тайёргарлигим қизиб кетди.

Эсимга Бўроннинг Арслонов тўғрисидаги ғалати саволлари тушади. Тағин қўнглим хирадашади. Айтиётган кишини Султон амакимикин-бошқамикин, деб иккilanaman.

Ҳеч кимга билдиримасдан, оёқ учида ичкари хонага кирдим. Папкадан, стол тортмасидан Султон амакининг суратини қиридирдим. Топсам, пешанасида ортиғи бор-йўқлигини билиб

олардим. Афтига яхшироқ тикилардим. Бўрон уни ҳабашга ўхшатиб ўтирибди-я!

Ҳеч қаердан суратини тополмадим. Бор эди шекилли-а? Еки аччиқ устида ойим уни ҳам хатта ўхшатиб йиртиб ташладимикин? Нега унақа қиласверади? Е ундан кечиб юбордими, а? Йўғ-е! Нималар деяпман! Бу миям қурғурнинг тешиги катта бўлиб қолдими дейман, ҳар бало кириб келаверади. Худди хира пашшадай ёпишиб олиб, ҳадеганда чиқиб кета қолмайди. Биттасини қува-қува зўрға чиқарсан, ўрнига бошқаси кириб келади.

Қизилқумга, Султон амаки олдига кетаётганим ростми кан-а? Еки охирги минутда бир чатоқлик чиқиб, йўлим тўси лармикан? Тўсилемаса, таваккал қилиб кетавераман-да. «Қизилқум йўли оғир, қийналиб, йиғлаб юрма», дейди Бўрон. Нима, мен Попукманни сал нарсага йиғлаб? Бўроннинг ўзи жуда катта кишимиди? Мендан атиги икки ёш катта-да. У бориб-келиб юрган жойларга мен боролмайманми? Иннай-кейин-чи, у билан бирга юрган одам қўрқмаса бўлади. Зўр, билағон ҳам раҳмдил бола. Ишонсанг бўлади!

Лекин, бу қиласётган ишимни ойим бугун билмаса, бир кун билади, ўзим билдираман-ку, албатта. Унда нима бўлади? Кечиравмикин бу қилиғимни? Кейинги кунларда ундан «чапақай», «қайсар» деган гапларни эшитмай турувдим. «Энди эсинг киряпти десам, тағин чапақай иш тутибсан-да!» деб хафа бўлмасмикин? Нима қилас, бўлмаса, ҳаммадан ажралиб, уйда қимирламай ўтиравераманми? Султон амакининг қаердагини билиб турсам, бирор олиб бораман, деб турса ҳам-а! Йўқ, нима бўлса бўлар. Мен бекордан-бекорга, ўзимча ўйнагани кетаётганим йўқ-ку, ахир!

## 10. ОСМОНДАГИ ҲОДИСА

«**Е**з кечаси бир тутам», дейди бувим. Тўғри айтади. Бир ухлаб турсанг, тонг отиби-қолибди-да. Аммо бу кеча шунақаям узайиб кетдики, кети кўринмади. Қўзга ҳам уйқу кела қолмади. Эрталабга яқин чаласини ухлаб оларман десам, ойим билан бувим гира-ширада туриб олишди. Патир ёпишди. Бўғирсоқ пиширишди. Буларнинг ҳиди димоғимга киргандан кейин-ку, уйқу деган нарсадан тариқча қолмади. Бунинг устига ойим ҳадеб уйғостади.

— Ҳой, Дамиржон! Тура қол, ўғлим, шунча ухлаганинг етар. Сафарга кетаётган одам бунақа бегам бўлмайди.

Кулгим қистайди. Шундай бўлсаям, ўзимни ухлаганга солиб ётавердим. Жўрттага шундай қилаётубман. Чунки, ойим, «сени ўзим автобусга обориб қўяман», деган. «Овора бўлиб нима қиласиз. Ўзим кетавераман, йўлни биламан-ку» десам, «Кузатиб қўйган яхши бўлади», деди. Кечаси билан уйқум келмаганига битта сабаб — шу. Ишга кетадиган вақтига қанча қолдийкин? Секин чойшаб четидан айвон деворидағи соатга мўралайман. Ҳали бир соат бор кетишига. Қандай бўлмасин ишга шошилтириб қўйишим керак. Ойим бувим билан ҳонуштани тайёрлаб бўлиб, мени яна чақирди. Аввал яхшиликчá, кейин жаҳл билан. Ҳадеганда туравермаганимдан сўнг, ўзи келиб чойшабимни тортди.

— Қани, тез ювиниб, кийина қол. Вақтим бўлиб қолди.

Имиллабгина кийиндим. Кунига совун ишлатишга эрина-диган одам бугун узоқ совунлаб ювиндим. Бемалол артина-етиб, соатга қарайман: ярим соатча вақти қолибди ойимнинг.

— Бўлди, ивирсима,— дейди ойим.

Чой ичаётубман-у, хавотирдан ичимни ит таталаяпти. Бу ёфи нима бўлади? Қанақа қилиб ажралиб қоламан энди? Ҳа, бўлди! Шартта туриб, фотоаппаратни қидираман. Турган ери бу ёқда қолиб, бошқа жойларни титкилайман. Уни елкамга илган еримда ичини очиб кўраман. Ҳамма нарсаси жойида бўлса ҳам, ҳовлиқиб:

— Плёнкаси қаёқда қолди?— дейман-да, подвалдаги лабораториямга югураман.

Ойим аллақачон кийиниб, патир билан бўғирсоқ солинган халтани кўтариб турибди.

— Эсинг қурмагур, ахир шу ашқол-дашқолингни кеча тайёрлаб қўйсанг бўлмасмиди-я!— дейди тажанглиги тутиб.

Мен:

— Ҳозир, ойижон, сабр қилинг, ҳозир,— дейман-у, яна вақтни чўзаман.

Охири бошқа баҳонам қолмади. Ойим жовраганча мени кўчага судраб, бувим билан хайрлашишга ҳам қўймади. Бувим бечора кетимдан қутоқ очганча, Попук: «Мен ҳам бояман!» деб йиглаганча қолди. Лайка бўлса, ҳайдасам ҳам, кетимдан қолмасди.

Ойим мени эргаштириб ғизиллаганча бораркан, оғзи тин- масди:

— Қайсар бўлмай кетгур, вақтида турмай мени кечиктир-динг. Ишим тиқилинч эди бугун. Кечиксам, заказчиларим кутиб қолишади.

— Ойижон,— дейман пайтдан фойдаланиб,— ундоқ бўлса, сиз кетаверинг. Заказчиларингиз диққат бўлиб қолишмасин.

Ойим қулоқ солмайди. Миям бошқа баҳона топиш билан банд. Катта кўчага чиқиб, трамвай остановкасига етганимизда, лоп этиб эсимга халтадаги блокнот тушади.

— Эҳ, блокнотим эсадан чиқибди-ку!—деб типирчилайман.— Кечак атайлаб магазиндан олиб келган эдим-а. Яхши блокнот эди. Тўхтаб туринг, ойижон, икки минутда олиб келаман.

— Қўя қол, блокнот зарурми сенга.

— Зарур, ойижон, жуда зарур. Кўрган-билганиларимни ёзиб боришим керак. Мактабдан буюрган. Ҳозир.

— Қўй, бошқасини оларсан. Ана келяпти!— дейди узоқдан кўринган трамвайга қараб.

— Жуда яхши блокнот эди. Ҳеч қаердан топиб бўлмайди унақасини. Қўйворинг, ойижон!— деганимча, амаллаб қўлидан сирғилиб чиқаман.

— Тўхта, бўлмаса мен шунисида кета қоламан. Кейинги сида ўзинг бораарсан,— деди ойим ноилож.— Йишқилиб кўзингга қара, ҳазир бўлиб юр. Холангга кўпдан-кўп салом айт. Мени хавотир олдирмай, вақтида қайтгин, жон болам.

Қўлимга халтани тутқизди, пешанамдан битта ўпди-ю, қўлини силкита-силкита трамвайга чиқиб кетди.

Негадир ичимдан йиғи келди. Филт этиб кўзимга чиқаётган ёшни зўр билан ютдим. Нега унақа бўлди-а?

Аэропортга етганимда, ваъдалашган вақтимиздан анча ўтган эди. Нафасим оғзимга тиқилганча аэропорт биносига кириб бордим. Олазарак бўламан. Бўрон кўринмайди. Бир вақт касса ёнида кўринди. Мен қанча ҳовлиқмай, у шунча бемалол. Турқини ўзгартмасдан нима дейди денг:

— Ўзим ҳам ўйловдим-а, боролмайди, деб. Кузатгани чиқдиларингми мени?

— Билет олмадингми менга?

— Олгандим. Энди биттасини қайтараётувдим.

— Нима?— дебман, жон ҳолатда билет тутган қўлини ушлаб.— Ҳазилни қўйсанг-чи, ўртоқ. Бирга кетамиз!

— Нега бўлмаса уни эргаштириб чиқдинг?

Ёнимга қарасамки, Лайка тилини осилтириб, думини ли-киллатиб турибди-да!

— Вой, қурғур, шу ергача келдингми? Кет, кет ҳозир! Бу ер сенга ҳайвонот боғимас. Жўна, мохов!

Бу ёқдан ҳайдасам — у ёғимдан келади, у ёқдан ҳайдасам — бу ёғимдан. Нима қилдик-а энди бу хирани.

— Ҳайда, ҳайда тезроқ. Милиция кўрса штраф қиласди,— деди Бўрон.

Икковимиз биргалашиб қувамиз. Қўзини шамралат қилиб, аэропорт ҳовлисига ўзимизни урдик. Шу вақт баланд бино пешанасидаги карнайдан эълон эшитилиб қолди:

— Пассажир гражданлар! Тошкент — Бухоро маршрути бўйича учувчи 151-рейсли самолётга пассажирлар чиқарилмоқда...

Бўрон мени самолётга олиб чиқадиган йўлак томон бошлиди. Шунда оёғимга тағин Лайка ўралашиб қолди.

— Ҳайда, ҳайда,— деди Бўрон биқинимга туртиб.

Тўғриликча ҳайдасам, кетмайди. Биқинига тепувдим, вангиллаб юборди-ю, одамлар «аэропортга ит бошлаб келган ким?» деб шовқин солишиди. Лайка олхўри кўзларини менга мўлтиллатиб, кетмай тураверди. Мён уни кўтариб олдим-да, ташқарига чопдим.

— Ҳой, узоққа кетма,— деб Бўрон кетимдан қичқирди.

Лайкани баланд зинадан кўчага отган эдим, фиқ этиб асфальтга тушди-ю, жони оғриганига қарамай, яна келиб оёғимга суйкалди. Мендан ажралса, худди ўладигандай жони чиқиб кетяпти.

— Олиб кета қоламизми, а?

— Эсинг борми? Самолётга итни туширармиди?— деди Бўрон.

Яна радиодан эълон қайтарилди.

— Юр, тез!— деди Бўрон, темир панжараги эшик томонга юриб.

Мен, Лайканинг кўзини чалғитиб жўнай десам, шиммиминг почасидан тишлаганча сургалди. Раҳмим келиб кетди. Уни кўтариб гулзор панасига ўтдим. Халтамга солиб олмоқчи бўлдим. Бўрон, Лайкани ташлаб кетолмаслигимни билди-да, чуқур саватдаги нарсаларни бўшатди. Лайкани саватга жойлаб, устига газета ёпиб қўйди. Саватини узатди-да, дўқ урди:

— Бир нима бўлса ўзинг жавобгарсан. Сени олиб юриб балога қолмасам эди! Кетдик!

Яна бир минут кечиксак, темир эшикни ёпиб қўяркан. Ҳайтовур ўтиб олдик. Ўзимча Лайкага пўписа қиласман: «Дамингни ўчириб ётсанг-ётганинг, сирни очадиган бўлсанг, самолётдан улоқтираман, абжаинг чиқади».

Самолётга етдик. Эхе, унинг ваҳимасини кўринг. Ҳовлимиз устидан учиб ўтганда турнадай кўринарди. Уйимиздан ҳам катта экан-а? Тумшуғи-чи, тумшуғи акуланинг бошига ўхшаб кетади! Баркашдай ойна кўзлари, устига автомобиль сифиб кетадиган узун қанотларини тузукроқ кўриб олай дегандим, бўлмади. Хаёлим саватга оғаверди.

Филдиракли, томдай баланд зинадан самолётга чиқдик. Йўлакдаги кийим иладиган жойга сават билан халтани қўйдик-да, секин жойимизга бориб ўтирдик. Самолётга биринчи чиқишим бўлгани учун, ҳамма нарса қизиқ кўрина-ди-ю, сўрлмайман. Ўғринча иш қилаётгандай, Бўронга қа-райман-у, тилимни қисаман.

Шу вақт ҳаво ранг қалпоқ, ҳаво ранг кўйлак кийган бир чиройли хотин ўртага келди. Кулиб туриб ҳаммага алланима-лар деди. Эсим бошқа ёқда бўлгани учун гапирганини анг-лолмадим. Савол назари билан Бўронга қарайман. Бўрон қулоғимга шивирлайди:

— «Бухорога бир соату чоракда етамиз. Ердан уч минг метр баландликда учамиз. Биз учадиган баландликда ҳаво йигирма даража совуқ» деяпти.

Енги калта кўйлакдаман. Этим увишиб кетди.

— Совуқ қотиб қолмаймизми?

— Қўрқма, самолёт пеккасини ёқади.

Самолёт вағиллаб кўтарилди. Ойнадан қараб турсак, ҳа-демай ер паастга чўкиб кетди. Самолёт ёnlарида бўлса катта-катта тоғлар кўчгандай бўлди.

— Вой-бўй! Бу нима ўзи?

— Секин! Булутлар...

Булутлар, денгизда муз кўчгандай, жуда тез сузиб юрибди. Гоҳо улар орасидан ярқ этиб қуёш ёриб чиқади. У жуда, жуда яқин, шундоқ ёнгинамизда ёнади. Унинг ўткир шуъла-си самолёт қанотини оловдай ловиллатади. Сал ўтмай, осмон-ни яна булутлар چулғайди, қуёш юзини тўсади. Ҳамма ёқ, ту-ман ичиди қолгандай, хиравлашади. Бўрон билан икковимиз-нинг кўзимиз ойналарда-ю, қулоғимиз йўлакда. Индашга ён-веримиздагилардан ҳайиқамиз. Булардан кўра ҳам, овозимизни Лайка эшишиб ғиншимасин, деймиз.

Бунақа вақтда соат ҳам имиллаб юрадими дейман. Қор-ним очиб кетди. Эрталаб нонуштанинг мазаси бўлмаганди-да. Халтадаги бўғирсоқдан егим келди. Шивирлаб сўрасам, Бўрон ҳам жон деб турибди. Секин-секин юриб, йўлакка бор-дим. Халтани очдим. Патирдан олаётган эдим, Лайка газета-

нинг тирқишидан кўзини мўлтиллатиб турган экан, ғингшиб қолди-ку! Эсим чиқиб, оёқ учида орқага қайтдим. Қисимимдаги бўғирсоқлар сочилиб кетди. Лайка бўғирсоқни менга ташлади деб ўйладими, бошини чиқариб, сўнг саватдан сакраб тушди-ю, бўғирсоқни териб, курсиллата бошлади. Қўрқиб нафасим ичимга тушди, пешанамдан тер чиқиб кетди.

— Расво қилдинг! — деди пицирлаб Бўрон.

Самолётни ола-ғовур босди; юмшоқ креслога бош қўйганча журнал, газета ўқиб кетаётган кишилар бирдан Лайкага ўғирилишди:

— Ҳой, ит қаердан пайдо бўлди?

— Бу қандай бемаънилик?

— Нега стюардесса чиқишида текширмаган?

Стюардесса — ҳаво ранг қалпоқли хотин келди. Ҳозир мени тутиб олади, деб бўйнимни ичимга олиб турибман. У бўлса, негадир Лайканинг бошини силаяпти, боятича кулиб:

— Хурматли пассажирлар! Бу, бизнинг самолёт тарихида учраган фавқулодда ҳодиса! Тўппа-тўғрисини айтинглар, кимники бу? — деди.

Ҳеч ким индамади. Хотин саволини қайтарди:

— Хурматли пассажирлар! Экипаж илтимос қиласи, айта қолинглар! Бўлмаса итни эгасиз деб ҳисоблаймиз. Ақлли, зотли ҳайвон экан, давлат ҳисобига ўтказамиз.

«Айта қол!» деди биқинимга туртиб Бўрон.

«Шундоқ ақлли, зотли итдан ажралиб қолавераманми?» деб ўзимга ҳам алам қилиб турибди. Лекин тилим айланмасди.

— Қўрқма, айтавер!

Бўронга суюниб, таваккалига:

— Менини! Менини! — деб юбордим.

Бунинг кетидан келадиган ғалвани ўйламаган эканман. Ҳамма ҳар чеккадан мени кулгига олди:

— Дубдуруст довюрак экансан-ку, жиян, самолётда овга чиқибсан.

— Ити билан космосни текширмоқчи бўлганларда, қаҳрамон!

— Масхарабозлик қилиб пассажирларни тонг қолдирмоқчи бўлгандингизми?

Олдимдаги креслода маза қилиб хуррак отаётган бир ҷол ҳам шовқин-суронга уйғонди-ю, менга қўлини пахса қилиб, ўшқирди:

— Ширин уйқуни буздинг-а, ярамас бола! Ким ўргатган

сенга бунақа номаъқулчиликни? Адабини бериш керак бу ўзбошимчани.

Мен креслога кириб кетгудай бўлиб ўтирибман. «Ҳозир самолётдан тушириб юборса-я!» деб ваҳимага тушаман. Менинг титраб-қақшаётганимни кўриб:

— Кўрқма, қўрқма,— деб овутмоқчи бўлади Бўрон.

Ичимда ўйлаяпман: «Лайка қўлдан кетса ҳам майли-ку, уйимга хабар еткизиб қўйишмаса бўлгани».

Самолётдан тушдик. Стюардесса, бир қўлтирида ит, бир қўли билан мени ушлаб олган. Энди қовогини солиб, қошлирини чимирган. Кетидан халта билан саватни кўтариб, Бўрон келяпти.

Хотин мени аэропортнинг эшигига «Бошлиқ» деб ёзилган бир хонасига бошлади. Форма кийган савлатли киши (учувчими, милиционерми, билолмадим) хотиндан воқеани эшитиб олди. Аввал у кўзимга сержаҳл кўринди. Мени ўтқазиб қўйиб, қовогини чимириб, деди:

— Қойил иш қилибсиз-ку, йигитча. Чора кўрмасдан иложимиз йўқ. Қани, ўзингизни танинг-чи. Исл, фамилиянгиз?

Отимни айтдим-ку, фамилиямга тўхталиб қолдим: Носиров десаммикин, Арслонов десаммикин?

— Арслонов,— дедим.

Арслоновнинг қаерда, ким бўлиб ишлашини суриштира кетди. Мен айтиб беролмай қийналаётган эдим. Эшик тирқишидан мўралаб турган Бўрон:

— Айтавермайсанми: «Ёнар дарё»да инженер,— деб юборди, бошлиқни ҳам, мени ҳам ҳайрон қолдириб.

— Қани, йигитча, бу ёққа киринг-чи, бу ёққа,— деди унга бошлиқ..

Бўрон халта, саватларини кўтариб кирди. Энди бошлиқ жаҳлидан тушиб, юзи кулиб турарди.

— Сиз ким бўласиз, йигитча?

Бўрон юмшоқ курсига ўз уйидай bemalol ўтириб олди. Томоги қуруқшагандай қайта-қайта йўталди. Бошлиқ унга стаканда сув узатди. Бўрон сувнинг ярмини шимириб, ярмини менга берди. Кейин исм, фамилиясини келишитириб айтди:

— Боря Титов!

Бошлиқ лунжини шишириб, елкасини қисди. Энди бир нарса деб сўрамоқчи бўлиб турганди. Бўрон илиб кетди: ўзининг Қизилқумдаги машҳур чўпоннинг шогирди экани, унинг «максус топшириғи билан» Тошкентга бориб келаётганини гапириб, бошлиқни бақрайтириб қўйди. Мен ҳам ичимда:

«Чиндан билагон. Уринлатяпти. Вақти келса опқочишни ҳам ўхшатаркан», деб турибман.

Бошлиқ, алланарсани ўйлаб туриб, сўради:

— Аниқроқ қилиб айт-чи: Арслонов деганинг қанақа инженер?

— Газопровод қураётган колонна инженери-да!— деди Бўрон, бошлиқ бўла туриб шуни ҳам билмайсизми дегандек қилиб.

Бошлиқ, қийин масалани ечгандай, енгил нафас олиб:

— Э, ҳа, бўлди. Ўша Арслоновми?— деб ўрнидан туриб кетди.— Ҳамма ёққа достон бўлган «Ёнар дарё» қаҳрамонни-я? Шундоқ демайсанми? Таърифини эшитганман. Ўзини ҳам Бухорода бир мажлисда учратганман! Демак, бу болакай ўша қаҳрамоннинг ўғли дегин? Ўшандай одамнинг ўғли бўла туриб, қилган интизомсизлигини қаранг-у. Ярашмайди сизга, сира ярашмайди. Мен ҳозирча жавоб бераман. Шу шарт биланки, бунақа беодобликни иккинчи қилмайсиз. Келишдикми, йигитта?

«Қутулдим шекилли», деб хурсанд бўлиб турсам, бошлиқ қўшиб қўйди:

— Дадангизни таниймиз. Кўришганда айтиб қўямиз бу ҳодисани.

Шу ёғини чатоқ қилди-да. Ҳа, майли, ишқилиб уйимга хабар етказмаса бўлгани. Бошлиқ бизни чиқариб юборяпти-ю, у ёқ-бу ёққа аланглайман: Лайка қани? Уни қамаб қўйишимми? Лайка ёнимиздаги хонада экан. Кетимииздан уни ҳам ҳайдаб чиқаришди.

— Ҳа, мохов, қамоқдан қутулдингми? Шунча овора-сарсон қилдинг-а одамни!— деб Лайкани қулогидан чўзаман. Оғзига бўғирсоқ солиб қўяман.

Ўзимиз ҳам бўғирсоқ қавшаб борамиз. Ичимда ўйлаб кетаяпман: «Бошлиқ нечук осонликча жавоб бера қолди-а? Арслоновни у қаердан таниркан? Унинг номини эшитганда, нега бирдан афти бошқача бўлиб, муомаласи ўзгарилиб кетди? Арслоновдан қўрқармикин? Инженер зўрми, милиция зўрми?

Кейин Бўронга дейман:

— Бўлган ишни адамга билдиrmаймиз-а?

— А? Нима керати бор бекитишни? Шунаقا гап яшириш одатинг ҳам борми?— деб Бўрон менга тикилди.— Агар шунақа одатинг бўлса, ўртоқчиликни йифиширамиз-а, билиб қўй.

Мени ғам босиб кетди. Сал юрганимиздан кейин, бирдан Бўрон тўхтаб:

— Эҳ, почтадан ўтиб кетибмиз-ку. Ойингга телеграмма берсак бўларди, «эсон-омон ётиб келдик», деб. Почтага қайтамиزمис?— деди. Юрагим шиф этди. Бўрон яна юрди.

— Қишлоқ почтасидан берармиз-а? Юр, тезроқ. Шамол бошланяпти. Автобусдан қолмайлик.

## 11. САҲРО ШАМОЛЛАРИ

**М**ана автобусда кетяпмиз. Нотаниш шаҳар кўчалари орқада қолди. Дала йўллари бошланди.

Бора-бора кўз илғамас кенгликларга чиқдик. Кенглиқда баланд-паст қум тепалар. Улар жуда-жуда кўп, уфққача ёйилиб кетган. Улар сариқ-қизғиши раёнда товланади. Шамолда қум даласи денгиздай жимир-жимир қиласди. Тўлқинланади. Чайқалади. Тинимсиз ҳаракатланиб, кўзингни тиндиради.

— Бошланди,— деб қўяди Бўрон. Лекин нима бошланганлигини айтмайди.

Шамол кучайиб, автобус ойналаридан кириб туради. Иссиқ, нафасни сиқадиган шамол. Худди кун ботаётгандай ҳаво бўзарив кетади. Гоҳ-гоҳида қум кукунлари автобус ичига ту-тундай уради, одамлар ойналарни бекитиб қўйишиди. Кўп ўтмасдан автобус ичи ҳаммомдай дим бўлиб кетди, томоғим толқон ютгандай қуруқшайди. Тер ҳидлари димоғимни ачита бошлади. Одамлар бурунларини бекитишади, паровоздай виш-виш қилиб нафас олишади. Мен чанқаб, бўғилиб кетяпман.

Ташқарида ғувиллаб шамол қутуради. Ҳамма ёқни қум бўрони қоплайди. Осмон кўринмай қолди. Автобус қандай йўл топиб бораётганига ҳайрон бўламан. Лайка эсимга тушди. У саватда, бўларича бўлгандир. Шу тобда ким қаарди унга.

— Ҳа, ишлар қалай?— деб қўяди Бўрон илжайиб ва дарров дастрўмолини оғзи-бурнинг тутиб олади.

— Жойида,— деб қўяман мен ҳам зўрга илжайиб. Ичимда-чи: «Бошланиши шу бўлса, у ёғи нима бўлар экан?» деб ваҳима қиласман.

— Сен ҳам оғзи-бурнингни беркитиб ол. Бўлмаса ичингга қум киради. Сувга шўнгитиб, ичингни чайиб юрмай тағин.

Кўл воқеаси эсимга тушди. Бўронга қўшилиб куламан. Ёнимизда келаётган бир йигит бизга қизиқиб қолди. У, бароқ-

қош, кўзи чақчайган, афти ишшайган. Еш бўлса ҳам сичқон думидай мўйлов қўйган. У ташқаридаги бўронни-ю, ичкари-даги иссиқни писанд қилмайди. Ҳаммага гап отиб келарди.

— Офарин, чаккимасссанлар-ку, ошналар. Бирорвлар ўлай деса, сенлар кулагай дейсан,— деди бизга.— Шундоқ қиёмат об-ҳавода қаёқдан келиб, қаёқни ихтиёр қилдиларинг? Сават-пават кўтариб чиққанларингдан, сийларинг тўй-пўйга юбордими деб қўйдимов.

Йигитнинг қизиқ гаплари ҳаммани ағрайтириб қўйди. Биз кулиб юбормаслик учун тескари ўғирилиб олдик.

— Қани, томоқни ҳўллаб олайлик-чи, бапуржа отамлашамиз.— У шими чўнтағидан шиша олди. Кафти билан орқасига пақ-пақ уриб очди. Қофоздан «рюмка» ясади-да, қуйиб ичди. Худди ачиқ дори ичгандай олдин афтини буриштириди, кейин «ҳай, ҳай!», деб тилини чапиллатди. Мўйловини силаб қўйди. Яна ўша «рюмка»га жиндек қўйди-да, менга узатди.

— Олинг, ошнам. Лиқ этиб буруннинг остига отиб юбингчи, азбаройи шифо, деб.

Мен қайтардим. У зўрлади.

— Кўлим қайтган йигитлардан эмасман. Улфат деган мард бўлади. Юз граммгина. Қемага тушганинг жони бир, деган гап бор. Ҳа, ола қолинг, ошна, қўлим толди.

Йигит бу гапларни кулмасдан айтяпти. Қўлидаги қоғоз «рюмка» ивиб, суви силқиб кетяпти. Бўрон бўлса, «ичавер-майсанми!» деб мени туртяпти. Кўнмаганимдан сўнг, у шартта олиб ичиб юборди.

— Офарин, ана бу йигитнинг иши бўлди! Балли, раҳмат,— деди йигит Бўроннинг елкасига қоқиб. Яна янги «рюмка» ясаб, қўйди-да, менга узатди.— Мана дўстингиздан ўринак олинг. Мард бўлинг сиз ҳам.

Мен яна қайтарган эдим. Бўрон қулоғимга: «ичавер, яхши лимонад экан», деди. Кулиб юбордин. Кулгидан ўхчиб-ўхчиб, лимонаднинг ярмини тўқдим. Йигит яна қуйиб берди. Яна ичиб, раҳмат айтдим. Уртамиизда бўлган ҳангомани тушуна олмаганлар бизга ажабланиб қарашарди.

Йигит энди биздан кетаётган жойимизни суриштириди.

Бўрон «Ёнар дарё» қурувчилари посёлкасига кетаётгани-мизни айтиб берган эди, йигит бирдан елкамизга қоқиб:

— Э, офарин, бизнинг дўстларимиз олдига кетаётган экан-сизларда!— деб қолди. Бўрон айтмасданоқ, йигит газопровод-чиларнинг номларини санаб кетди. Султон амаки билан-ку эскидан таниш экан. Йигитнинг ўзи Газқайнар деган жойда

ишлиб, газопроводчиларнинг ишидан ҳам хабардор бўлиб тураркан.— Офарин, «Ёнар дарё»ни кўрмоқчимиз денглар-а? Арзийди кўрсанглар. Жойида! Аммо-чи,— деди бошмалдоғини баланд кўтариб,— томошанинг кони Газқайнар шахри азимда. Уни кўрмабсан, оламга келмабсан. Хўп десаларинг, олиб кетай. Учкilarинг келса — осмон баравар доримиз, футболга ишқивоз бўлсаларинг — стадионимиз бор. Чўмиламан десаларинг, кўлимиз нақд — ичидаги танга балиқлари билан.

Йигит «томуша кони»ни шундоқ мақтадики, ҳамманинг оғзи очилиб қолди. Мен бўлсам ўйлайман: бу қум саҳросида қанақа «шахри азим» бору, қанақа «томуша кони?» Тўғрими-кан, ё бу ёқдаги одамлар шунақа қуруқ аравани олиб қочаверармикан? «Бормаймизми?» деб Бўронни туртсам, «Борганин», деб қўя қолди. Мен йигитдан сўрадим:

— Шамоли ҳам зўрми?

— Ҳай, ҳай сўрама.

— Бундан ҳам-а?— дедим ташқаридаги қутураётган шамолга имо қилиб.

— Шамолнинг оғзи ўшоқда-да. Унинг олдида бу шамоллар ип эшолмайди. Ҳай, ҳай, ўнча-мунча одамни ямламасдан ютади.

Вой-бў ваҳмасини! Бўронга «Шунақами?» десам, «ҳим», деб бош қимирлатди.

— Қўйсанг-чи! Қанақа қилиб ютади одамни, кўрганми-сан?— десам, Бўрон яна «ҳим», деб бош қимирлатадио ранги қум ўчиб, хўрсиниб қўяди. Нега унақа бўлди, тушунолмадим.

Шу вақт машина тўхтадию, Бўрон «тушамиз», деб қолди. Сават билан халтани кўтариб тушаётганимизда, мўйловли йигит:

— Арслоновга салом айтинглар. «Али чемпион салом айтди», десанглар билади. Ўзларинг бир айланиб конимизга боринглар,— деди.

— Конда чемпион нима қиласди, а?— дейман тушаётниб.

— У ерда чемпиони ҳам, дорвози, артисти ҳам бор,— деб қўяди Бўрон.

Гапи ғув-ғувда қулоғимга аранг киради. Энди шамолнинг шарпасига эмас, қоқ ўзига дуч келган эдик. Бўрон халтадаги лаш-лушлари ичидан битта эски кўк шапка олди-да, сойбонини орқага қилиб кийди. Шапка каттароқ бўлгани учун ҳурпайган сочи устидан кўзи, қулоғигача босиб тушди. Шапканинг икки чеккасидан тасма осилиб турарди, уни ўт ўчирувчиларнига ўхшатиб томоғи остидан ўтказиб боғлақ олди.

Шамол мени довдиратиб қўйди. Дўппим учиб кетай деганидан бир қўлим бошимда. Бир қўлим билан саватдан Лайкани чиқарай дейман, чиқа қолмайди. Сулайиб ётиби. Қўрқиб кетдим.

— Лайка, Лайка! Тур, бу уйингмас! — деб уни туртдим. Қўзини пириллатди — қум тиқилиби. Раҳмим келиб, бир чақмоқ қанд тутсам, олмади. Ерга қўйсан, ғоз-ғоз турган чақалоқдай гандираклаб кетаверди.

— Машинанинг дами элитган,— деди Бўрон.

— Юр, қани юр! — деб йўлга тушдик. Лайкани шамол орқага сурibi юмалатиб юборяпти. Ўзимнинг бўлса дўппим учиб кетай дейди.

— Дастрўмол билан дўппининг устидан бошингни бойлаб ол,— дейди Бўрон. Боғлаб оламан.

— Лайкани саватга солиб ол,— дейди Бўрон. Солиб оламан.

Ана энди ҳаммолдай юкларни орқалаб кетяпмиз. Қаёққа кетаётганимизни билмайман. Чунки ҳеч қанақа йўлнинг ўзи йўқ. Бу яқин орада одам қораси тугул, тиккайган нарса ҳам кўринмайди: на уй, на дараҳт, на чайла. Ҳамма ёқ қум, шағал.

— Қаёққа кетяпмиз, Бўрон?

— Суриштирмай юравер,— деб у олдинлаб кетади. Орқамиздан ботаётган қуёшнинг хира шуъласи тушади, Бўроннинг соябони орқага ўтирилган шапкасида бир нима йилтиллади: юлдузчами? Ҳа, юлдузча!

— Бўрон! — дейман бақириб.— Шапка кимники?

— Суриштирмай юравер,— дейди-ю, кетаверади.

Анча олдинлаб кетади. Уига яхши-да. Ўрганган ерлари. Иннайкейин, оёғида қўнжли ботинка. Мен бўлсам, шиппак билан келаверибман. Энди шиппак тирқишлидан кирган қум-шағал оёғимни шилиб юборяпти. Аммо Бўронга оғиз очолмайман. Очсан, ҳойнаҳой: «Айтмабмидим йўли оғир деб», дейди. Тишимни тишимга босаман. Охири Бўроннинг ўзи буни пайқаб қолади-да, дейди:

— Гимнастика ўйнайдигандай оёғингга кийиб келган нарсангни қара-ю! Ечиб, қоқиб ол-э!

Ечиб, қоқиб оламан. Бир оз юргандан сўнг яна қоқаман. Яна, яна! Безор бўлиб кетдим. Шамол хиёл бўшашибди. «Бўлди энди шунча опичганим!» деб Лайкани ерга отдим. У бир юмалаб саватдан чиқди-ю, жони оғригандан юра кетди. Энди сал енгил тортдим-у, лекин оёғимнинг оғриғидан қутулолмайман. Ҳеч юролмай қолдим: «Бор-е!» деб охири шамолга тескари

қараб, бир тошга ўтириб олдим. Бўрон кўрди-ю, аввал май-набозчиликка олиб:

— Йиғлолмайди калт-кал, йиғлолмайди кал-кал!— деб чапак чалди. Аламимдан ўпкам тўлиб кетди. Охири деди:— Ўтирсанг, оёғинг баттар оғирлашади. Советмасдан юравер, бира тўла бориб дам оламиз.

Турай дейман, оёғим без-без қилиб туролмайман. Бўрон бўлса, ачиниш ўрнига кулади.

— Опич!— деди кейин орқасини ўгириб.

Ҳазиллашяптими десам, астойдил қистаяпти.

— Бор-э, бу нима қилифинг! Майнавозчиликка қўлдимми энди!— дедим-да, аччиқ билан юриб кетдим.

Ликонглаб юришимга қараб турди-да, Бўрон хаҳолади:

— Ҳайт, ҳайт, оёғи куйган товуққа ўхшайди-я! Циркда ўйнасанг ҳам бўлади!

— Бор-э!— дедим. Энди ростакам жаҳлим чиқди, кўзимга ёш келди. Умримда йиғлаган бола эмасдим-а! Ешни секин сидириб ташладим. Бўрон билганга ўхшайди. У олдимга келди-да:

— Саҳрого энди келдик, ҳалитдан бўшашма. Қани, шиппагингни ечгин-чи,— деди. Ўз ботинкасини ечиб, қўймай менга кийидирди. Ботинкаси оёғимда шалопласа ҳам, анча яхши бўлди. Лекин менинг шиппагимдан Бўроннинг товони чиқиб қолди. Шунда ҳам парво қиммади, ҳакачаклаб Лайка билан қувиша кетди. Ҳайрон қоламан унга: чарчаш нималигини билмайди-я! Мен унинг ҳозирги ҳакачаклаб кетишини ёғоч оёққа ўхшатсаммикин, чигиртканинг сакрашига ўхшатсаммикин, ўзига айтиб бир кулдирсаммикин деб ўйлаб кетаётсам, у:

— Урра, урра!— деб қичқириб юборди.

Нима экан деб атрофга алангладим. Жуда узоқда, ботаётган қўёшнинг сомондай сариқ яллиғи тушиб турган жойда асалари уяларидай қутичалар кўринди. Яқинлаштанимиз сари бу қутичалар вагонларга ўхшаб кетди.

— Ия, Бўрон, поезд ўтадими бу саҳрода?

Бўрон қаттиқ хаҳолаб, тушунтириди:

— Фидираб юрадиган посёлка бу. Қурувчилар посёлкаси.

Бир оз юрганимиздан сўнг, қум тепалар орасидан кўзимга офтобда ялт-юлт ёниб бир нималар кўринди. Ўзундан-узоқ чўзилиб кетган қувурларга ўхшайди. Қувурларнинг ён-верида ҳар хил машиналар қалашиб турибди.

— Ана ўша «Ёнар дарё», яъни газопровод трассаси ўтган жойлар, илгари ҳам айтган эдим-ку?

— Айтганинг билан мен бошқача ўйлагандим-да. Ўзинг «олов оқади» дегандинг-да!

Бўрон қотиб кулди.

— Қойил бешинчи синф ўқувчисига. Шу чоққача ўз уянгдан ташқарига чиқмаганинг билиниб турибди!

«Кулмай қўя қол. Билмайсан. Дадам мени Москвага оборомоқчи эди»... Йичимда шундок дедим-у, Бўронга чурқ этмадим. Бўрон бўлса, нега даминг чиқмай қолди, деб менга қаради-да, яна баттар кулди:

— Афтингни қара, ҳақиқий масхарабоз бўпсан-ку. Шундай бораверамизми?

— Ўзинг-чи, ўзинг!— Унинг афти башараси ҳам нимранг упа чаплагандай эди. Бошидаги қўк шапкасининг ҳам ранги бўзариб кетган. Фақат юлдузча милт-милт ажралиб турарди.

— Дадангнинг олдига шу аҳволда борсанг танимайдида,— деди Бўрон.— Уст-бошимизни қоқиб олайлик.

— Ундан кўра чўмилиб олсак-чи?

— Тошкентингмиди бу — ҳар қадамда кўл, ариқ бўлса. Ичишга сувни зўрга топамиз-ку бу саҳрова!..

Ўзи чанқаб қуриб келаётган томоғим бу гапдан кейин баттар қақраб кетди. Энди сувни қаердан топиб ичаман, деб вахима босди.

Яна сал юрган эдик, тошлар ва қамишлардан ясалган чайла учради. Чайлала бойлоқлик турган қора от бизни қўриб кийшнади. Чайла тепасидаги айрига қўниб турган каттакон қўш қанотини пар-пар силкитиб нақ устимизга сапчигудай бўлди. Мен чўчиб орқамга тисланиб турувдим, Бўрон: «Қўрқма, ўзимизнинг қўлга ўргатган бургутимиз»,— деди-да, мени эшик ёнидаги катта катак олдига судради. Катакда думи узун, сап-сариқ юнги тилладай товланган чиройли ҳайвон типирлаб турибди. Тулки!.. Ҳайвонот боғи эсимга тушиб кетди. Тулки қулоқларини динг қилиб, шаҳло кўзларини бизга айёна қадади. Бўрон унга тегажаклик қилиб қўл силкитади, ҳар силкитганда тулки четандан сапчиб чиққудай бўлади.

— Ху, айёр ўлгир! Шеригингни ташлаб келдим. Бемалол яшайвер энди.— Кейин менга тушунтиради Бўрон.— Шу ўлтурда кийик боласини чиқиштирмаган, ҳадеб овқатини еб қўяверган... Ҳу ўлгур...

Бўроннинг Тошкентга ташлаб келган кийигига ачинаётгани яққол сезилиб турарди.

Овозимизни эшишиб чайладан бетлари кепчикдай, узун соқоллари жўхори попилдириғидай қизғиш, қўк яктак устидан

қават-қават белбоғ бөглөгөн бир чол чиқди. У чўлоқланарди. Чиқа солиб:

— Кел, бўтам, соғ-саломат келдингми?— деб Бўронни қўчоқлади. Кейин менинг елкамга қоқди. Бошқа сўз айтмасдан, бизни чайлага киргиздию, ўзи қумғон кўтариб чиқди. «Мингаймас одамга ўхшайди», деб орқасидан қараб қолдим. Бир оёғи ёғоч экан. Кетидан анқайганимни кўриб, Бўрон:

— Бизнинг бобой, билиб қўй,— деди.

— А-а?— деб ажабланиб қолдим. (Эсимга «Титов» фамилияси тушди, ҳайронлигим ошди).

— Қолхознинг бош чўпони. Отлари ҳам Чўпонбобо,— деб қўшиб қўйди Бўрон.

Яна от кишинади. Лайка бегонасирабми, вовиллади. Бўрон югуриб чиқди-да, отга беда солиб, Лайканинг олдига суяқ ташлаб келди.

— От кимники?

— Бобойники-да!

— Қандай қилиб минадилар?

— Нима деб ўйлајпсан бобойни! Катта чавандоз. Улоқда бирорни олдига туширмайди. Урушда герой бўлган. Будённий армиясида хизмат қилган.

Оғзим очилиб қолди: содда бир чўпон-а... Ишонмай турганимни билди-да, Бўрон ниманидир ўйлаб қолди. Чайла бурчагида турган яшикни титкилашга тушди. Ўндан битта дала сумкаси чиқди. Сумкани очиб ағдарган эди, конверт, блокнот аралаш суратлар тушди. Суратлардан бирини менга узатди. Мен суратга ағрайганча қолдим: бир одам эгнига шинель, бошига солдатча шлём кийган, отни гижинглатиб турибди. Катта қўй кўзлари билан қайрилма қошлари худди Чўпонбобоникидай. Фақат соқоли йўқ, ёш.

— Ана шунаقا!— деб Бўрон мақтангандай бўлди. Кейин яна битта сурат кўрсатди. Бунисида уч киши: биттаси Чўпонбобонинг ҳозирги туришидай — соқолли, яктакли, бошида кигиз қалпоқ. Ёнидаги киши мўйловдор, юлдузчали шапка кийган, русга ўхшайди. Учинчиси бўлса жиккаккина, кўзлари ёввош бир бола.

— Ия, бу бола ўзинг эмасми?

— Ўхшайманми?

— Ҳа. Аnavи мўйловлиси ким?

Бўрон чурқ этмади, кўзларини пирпиратиб чётга қаради. Гапни чалғитиш учун:

— Бобо нега мунча узоқлаб кетдилар-а?— деб ташқарига

чиқиб келди.— Сувлари йўқ экан. Чой қидириб кетганга ўхшайдилар...

Бўрон бобойга ачиниб, ўзи бора қолмаганига афсусланди. Мен ҳам роса чанқаб, қорним очиб кетган эди.

Анча вақтдан кейин Ҷўпонбобо ҳаллослаб қумғон кўтариб кирди. Суратга кўзи тушди-да, уни қўлига олиб, тикилди. Ҳудди соғинган одамини учрагандай:

— Эҳ, дўстим Титов, қадрдонгинам,— деб ўзича сўзланди,— кўп одамохун эди, раҳматлик... Урушга ҳам бориб келган. Кейин шу саҳрова ўн йилча кезди биз билан. Мен йўл кўрсатувчи эдим. Титов одамлар билан бирга саҳрони илматашик қилди. Ер тагидан хазина топадиган олим эди у.

Мен тушунмасам ҳам, бош қимирлатдим. Бобо чой дамлаб, қулоғимга:

— Кум бўрони ютди у шўрликни,— деб шивирлади. Ўртоғим кириб қолиб, у ёғини айтольмади. Ўртага бир яшикни хонтахта ўрнида қўйиб атрофига пўстаклар солди. Яшикка газета ёзиб, нон қўйди. «Ол, ол», бошланди. Менинг миямни «қандоқ қилиб бўрон одамни ютади?» деган савол тимдалаганча қолди.

Бобойни мингаймас киши деб янгишибман. Жуда гаплашадиган чиқди. Бўрон олдида гапни дарҳол бурди:

— Шунаقا қилиб, меҳмон бола, Арслоновнинг ўғлимани, дегин-а? Яшавор, йигитлар сultonининг ўғли! Қеләётибоқ саҳро шамолини татиб кўрдингми? Қийналмадингми ишқилиб?

Ҳамма ёғим оғриб, оғим безиллаб турган бўлса ҳам, сирбой бермадим.

— Ҳечқиси йўқ, ўрганиб қоласан. Бу ерга келган одам саҳро табиати билан олиша-олиша пишиб кетади.— Бобой пиёллада менга чой узатиб, гапни улади:— У ёғини сўрасанг, даданг ўз ўғлимдай бўлиб қолди. Зерикса, гаплашгани чайлага келади. Ҳар замонда ўз қўли билан ош қиласди. Аммо пазанда йигит экан, паловхонтўрани дўндириб ташлайди-да, тўғриси,— деди бобой кўзларини юмб чой ичаркан.— Палов билан кўк чой йиғлаб кўришади-да. Аъзойи баданингга мўмиёдай сингиб кетади, жонивор. Дадангни ўзим ўргатдим кўк чойга... Бош оғриғи касали бор экан, кўк чой даво бўлади унга...

Юрагим шигиллаб кетди: «яна касали тутибди-да!» Бобой салмоқланиб гапиради. Гаплари қизиқарли эди-ю, энди миямга кирмасди. Бўронни «юр», деб туртдим. Бобой дарров сезди.

— Бўлмаса дадангни олдига бора қол. Соғиниб, диққат

бўлиб юрувди ўзиям. Дарвоқе, эрталаб машинада район тонга ўтиб кетган эди, қайтдимикин-а?— деди. Бўронга тайинлади:— Мехмон билан қайтиб келинглар. Шу ерда ётасизлар, дурустми?

Бораётиб, ўйлайман: «Софиниб юрувди, деди. Қимни соғинади? Бизними? Ойим: «кечиб кетди, унуганди», деди-ку. Унугтан одамни соғинармиди? Иннайкейин, диққатлиги нимадан экан-а? Султон амаки уйимизда ўтган гапларни бобойга гапирдимикин? «Ўғлимдай бўб қолди» деялтику, гапирса гапиргандир-да».

## 12. ФИЛДИРАБ ЮРУВЧИ ПОСЕЛКАДА

— **Ф**илдираб юрадиган посёлка мана шу,— деди Бўрон, вагонлар олдига етганимизда.

Посёлка эмиш. Қип-қизил саҳро-ку бу ерлар ҳам. Ҳа, жиндаккина фарқи борга ўхшади. Бу ерда қум камроқ. Иннайкейин, сал қиялама бўлиб, пастроқларида сийраккина ўт, янтоқлар ўсган. Лекин булар ҳам иссиққа чидолмай жизгинак бўлиб кетибди.

Вагонлар ўнтача келади. Уларнинг тепасидан бир-бирига электр симлар тортилган. Бўрон ўзини бу жойларнинг эгасидай тутиб, битта-битта тушунтиради:

— Булар уйлар,— деди ўргадаги янгироқ вагонларни кўрсатиб.— Анавилари ошхона, устахона, клуб, омбор. Мана Арслоновнинг уйи.

Кўк вагон. Эшиги очиқ. Яқинлашишимиз билан тўхтаб қолдик. Ичкаридан бир хотиннинг шанғиллагани эшитилди:

— Қап-катта одам бўла туриб тайинингиз йўқ экан-ку! Сизни атайлаб даволагани олиб борсак, ўшандоқ жойни ташлаб келсангиз-а! Сўрамай-нетмай-а. Уят эмасми, ахир! Аввалим бор нима қилишарди сизни саҳроба юбориб? Жонингизга жавр қилиб?

— Ўзингиз-чи, ўзингиз?— дерди эркак товуш бўғилиб.— Хотин бошингиз билан нима қилиб юрибсиз бу ёқларда?

— Менинг йўлим бошқа!

— Менинг йўлим ҳам!

— Сиз касалсиз, ахир, тушунинг, гипертония билан ҳазиллашиб бўлмайди,— деди хотин, кейин сал овозини пасайтириб ялинишга ўтди:— Қани ўртоқ инженер, кийина қолинг, қайтиб кетамиз. Бош врачнинг буйруғи шу.

— Сиздан сўрайман, опажон. Мени ўз ҳолимга қўйинг. Эртага ўзим борарман,— деди эркак ҳам овозини пасайтириб. Буниси аниқ Султон амакининг овози эди.

— Киравермаймизми?— дейман ичим ҳаприқиб.

— Тўхтаб тур. Катталарнинг гапига мушайт этмайлик,— деди Бўрон мени тутириб.

Мен унинг қўлидан сирғилиб, вагонга отиламан. Ҳаммомдагидай гуп этиб юзимга дим ҳаво урилади. Вагон парда билан иккига бўлинган. Адёл-пардани очиб кирсам, енгил брезент каравотда боши боғлиқ, соқоли ўсиқ Султон амаки ўтирибди. Ранги сарғайиб кетган. Унинг олдида, қон босими ни ўлчайдиган асбобни қўйиб, оқ ҳалатли ёшгина хотин ўтирибди. Юрагим шиф этиб кетди. Султон амаки бизни кўрибоқ, кўзининг пахтаси чиқиб, ўрнидан сапчиб турди.

— Ия, ия, Дамиржон! Қандай шамол учирди?— деб, олдимга келди, белимдан ушлаб кўтариб қўйди. (Уйдаги қилиғи: «Пўшт, Стёпа амаки келяпти», дегани эсимга тушди). Кўтарганда бошим бир нимага чиқ этиб тегди. Қарасам, вагон шифтига осилган электр лампага теккан экан.— Ким билан келдинг?

Орқамда турган Бўронга имо қилдим.

— Ия, ха, Боря? Нечук кўринмай қолдинг десам, Тошкентдамидинг? Қандай қилиб топишдиларинг? Нимада келдиларинг?

Мен қисқача айтиб бердим.

— Кўрқмадингми, қийналмадингми самолётда?

Мен «Йўқ», деб бош чайқаган эдим, қулоғимга Бўрон: «Айт, Лайка воқеасини!» деб шивирлади. Қандай қилиб айтаман, деб қийналиб турувдим, доктор хотин, асбобларини йиғишириётуб, гап қўшди:

— Дадангни кўргани келибсан-да, укажон? Шундан-шунга-я, эссиэгина! Сенинг ўрнингда бўлсам, дадамни ҳам юбормасдим бу ерларга, ўзим ҳам келиб ўтирмасдим.

Афтига тикилдим: бу гапни ҳазил қилиб айтдими, чинданми — билиб бўлмайди. У Султон амакига дорилар қолдирди-да:

— Эртага касалхонага боринг, кутамиз,— деди. Кейин менга:— Келганинг бир ҳисобда тузук бўпти. Дадангга қараб турасан. Дорини эсларига солгин. Ташқарига чиқармагин. Хўлми?— деб тайинлади. Гапларига кулгим қистаганча, кетидан қараб қолдим.

— Эшитдингми, Дамиржон, мени сен боқишинг керак-

миш,— деб илжайди Султон амаки.— Докторлар ваҳимачи бўлади-да. Касалингга касал қўшади. Бўш келсанг, сени чақалоқдай йўргаклаб қўйишдан ҳам тоймайди. Қани, ўтиринглар-э!

Султон амаки бошига боғланган рўмолчани олиб ташлади. Шунда Бўроннинг тунов кунги гали эсимга келиб, Султон амакининг пешанасига тикилдим: ортиқ-портифи йўқ,Faқат пешанаси устида сочи орасидан билинар-билинмас хол кўринади, холос.

Стол атрофига ўтиридик. Султон амаки уйда аҳвол қандай деб суриштиреди: Менинг ўқишлиаримни, бувимни, айниқса Попукни кўп сўради. Энди ойимга гал келган эди, эшик фиқ этиб очилди-да, икки қўлида икки сопол товоқ кўтарган киши:

— Ассалому алайкум, хўжайн!— деб кириб келди.

Султон амаки хоҳламайгина:

— Кeling, Toғa,— деб қўйди.

«Toғa» худди эҳтиёт бўлмаса, қўлидан тушиб синадигандай, косани авайлаб столга қўйди. Султон амакининг соғлигини қайта-қайта сўрагандан сўнг, қатиғини мақтаб кетди:

— Атайлаб ўзларига ивитдим. Эшитганмисиз-йўқми, Зарафшон дарёси лабида Бўстон қишлоғи бор. Отига яраша — жаннатнинг ўзи. Ҳавосию мевасидан тортиб сут-қатиғигача машҳур. Асли ўша ерликмиз-да биз. Буни ичсангиз, бамисоли Бўстоннинг сермаза қатиғини ичгандай бўласиз. Дардингизга шифо бўлади.

Гаплари ҳам, ўзи ҳам ғалати. Қари десам, овози ингичка, соқоли йўқ. Еш десам, юзларини кампирникидай ажин босган. Унинг узундан-узоқ сўзини Султон амаки ижирғаниб эшилди. Сўнг уни алақситиш учунми ё вагон жуда исиб кетганиданми, кичик ойнани очиб юборди. Toғa бўлса парвосиз, гапини чўзарди.

— Хўш, Toғa,— деди Султон амаки, Тоғанинг сўзини кесиб,— бузилган машинанинг ремонти битай дедими?

— Ҳим, хўжайн, озгина қолди,— деди Toғa худди ёлғон гапираётгандай ишшайиб.

— Качон битади? Иш тўхтаб қолди-ку?

— Эртага битиб қолар, хўжайн.

— Аниқми?

— Худо хоҳласа, хўжайн,— деди Toғa яна боягича ишшайиб.

Султон амаки энсаси қотиб кулди. Кейин энди бораверсан-гиз бўлади дегандай, Тоғага бир сўмлик узатди.

— И-и, хўжайин,— деди Тоға аввалгидан баттарроқ чи-йиллаб.— Мен сизни холисона кўргани кирганман-а. Уят бў-лади. Қўйинг пулни.

Султон амаки қўймай, унинг кители чўнтағига пулни со-либ қўйди. Тоға билмаганга олди.

— Қани, ичиб юборинглар-чи,— деди Султон амаки коса-ларни бизга суреб.

Чанқаб, қорним очиб турувдим. Қатиқни хўриллатиб ич-дим.

— Қалай, ширин эканми, жиян?— деди Тоға ишшайиб.

Бош қимирлатдим. Чиндан ширин экан. Аммо қимматга тушди-да!

Тоға энди кетармикин деб турсак, яна ҳам очилиб, «хўжа-йин»лай бошлади:

— Хўжайин, қорнингиз очган бўлса, аччиққина мастава қилиб берайми? Чойга қалайсиз?

Шу вақт эшикни устма-уст чертиб икки йигит кирди. Улар-ни кўрибоқ, Тоға сирғалиб чиқиб кетди.

Султон амаки ўрнидан туриб уларни хурсанд кутиб олди.

— Үзим ҳам чақиртиromoқчи эдим. Кел, Вася,— деб ўзи-дай баланд бўйли рус йигити билан кўришди. Кейин:— Кел, Мамед,— деб бурни ялпоқ, қоши қалин, кўзлари катта йигит-га қўл узатди.

Биз жой бўшатиб, пастроқдаги яшикка ўтирдик. Бўрон қу-логимга: «Вася — катта механик, адангни ўнг қўли, Мамед — зўр экскаваторчи, ҳам шофёр», деб қўйди. Йигитлар, Султон амакининг соғлигини, касалхонадан нега тез қайтганини сў-рашди. Султон амаки уларга мужмал жавоб қилди-ю:

— Ишлар қалай?— деб сўради.

Вася билан Мамед бир-бирларига кўз қирини ташлашиб, жавоб беролмай туравериши.

— Кўргани келганларингга раҳмат-у, менга трассадаги ишлардан гапириб беринглар-да. Куни билан бош оғриб ёта-вериб, ичим пишиб кетди.

Тоға тунука чойдиш олиб кириб, индамай чиқиб кетди. Сул-тон амаки темир кружкага чой қуя туриб, Васядан сўради:

— Қани, айт-чи, ўртоқ механик: колонна ўрнидан жилай деяптими? Сув масаласи қалай бўляпти?

Вася у ёқ-бу ёққа аланглаб, индамай турарди. Мамед ор-тиқ жим туролмади:

— Тоға ремонтни чўзди. Эртага битирса, колоннани ўрни-дан жилдириб юборардик. Лекин ботқоқликда яна иш тўхта-

ладиганга ўхшайди-да!.. Сув масаласи ҳам аввалгича чатоқроқ... Кечадан бери бўронда қум кўчиб, водовознинг йўлини тўсиб қўйибди.

— Ўқўп ваҳима солаверма!— деди уни туртиб Вася. У ташвишга туша бошлиган Султон амакини тинчлантирмоқчи бўлди:— Чорасини топамиз. Эртага ўнглаб юборамиз ҳаммасини.

Султон амаки тинчланмади. Яна суриштираверди. Вася бўлса бир нималарни тушунтириб, ўзиникини исботламоқчи, қандай бўлмасин Султон амакини хотиржам қилмоқчи бўларди. Гапни бошқа ёққа буриб: колонна кутубхонасига янги китоблар келгани, аллақайси бир машинистнинг хотини ўғил туққани, бугун ошхонага ўн яшик «Тошкент суви» келгани, яна бошқа хил янгиликлардан сўзларди. Султон амакига бу ёқмадими:

— Бу янгиликларинг учун-ку раҳмат. Лекин сен мендан асосий гапни бекитяпсан,— деди норози оҳангда: Кейин бирдан этигини кия бошлади. Мени эсноқ босаётганини кўриб, меҳрибонлик билан деди:— Сен, ўғлим, чарчаб келгансан, ётиб дам олавергин.

Уялиб уйқум ҳам қочиб кетди. Нима, ҳамманинг олдида ётиб ёш боламанми! Бўрон секин қулогимга:

— Ундан кўра юр чайлага, бобой кутиб ўтирибдилар,— деди.

Мен Султон амаки билан тузуккина гаплашолмасдан кетсам қанақа бўларкин, деб ўйланиб турган эдим. Бўрон ўз таклифини Султон амакига ҳам айтди.

— Бўлмаса рухсат,— деди Султон амаки.— Эрталаб вақтлироқ туриб келгин, шу ерда нонушта қиласиз.

— Кетдик,— деди Бўрон эшик томон юриб. Менинг бўлса оёғим тортмай қолди. Чунки Султон амаки отланяпти. Қаёққа отланяптикин шу бемаҳалда? Уни ташлаб кетгим йўқ эди. Султон амаки шуни пайқагандай:

— Бора қол, ўғлим, бора қол ўртоғинг билан,— деб қўстарди.

Вагондан тушиб кетаётганимизда, «ғилдираб юрувчи посёлка» четида трактор гулдурай бошлади. Трактор пешанасида прожектор ярқираб, посёлкани ёритди. Вагонларда лампочкалар ёнди.

— Тоға движокни юргизиб юборди,— деди Бўрон. Шунда мен, Тоғанинг фақат қатиқчи бўлмай, машинага ҳам алоқаси борлигини билдим.

Султон амакининг вагонига қараб-қараб қўяман. Кўк ва-

гоннинг кичкинагина кўзи юлдуздай чақнаб турибди... Ия, ана юлдуз ўчиди қолди. Уч киши вагондан тушгани, проҗектор яқинида турган усти брезент машинага чиқиб чўлга жўнаб кетишгани яқъол кўринди...

— Қаёққа кетишлати улар?

— Трассага,— деди Бўрон, кундузи узоқдан кўрсатган қувурлар томонга қараб.

— Кечаси нима қилишади у ерда?

— Ишлашса керак. Кундузги жазирамада ишлаш қиёни-да.

— Нима иш қилишади?

— Эзма-чурук бўма, одамнинг қорни очиб кетяпти!— деб жеркиди Бўрон.— Кейин ўз кўзинг билан кўрасан ҳаммасини.

Доктор хотин Султон амакига қимиirlаманг деган эди-ку. Нима қилади-я бориб? Касали зўрайиб кетмайдими? Одамлар ҳам қизиқ. Кўриб туришибди-ку касаллигини, нега тағин уринтиришади? У бормаса, иш битмас эканми жуда?

Буларни Бўрондан сўрагим келади. Лекин нима деб бошлиман. «Дадам», деб бошласам, ҳалиям тилим келишмайди. «Султон амаки» десам, Бўрон ҳайрон қолиши мумкин. Султон амакининг ўзи мени «ўғлим», деяпти. Яна одамлар олдида. Худди «кўриб қўйинглар ўғлимни», деб фахрлангандай. Қани бизни унугани? Ойим бекорга гумонсираяпти. Шундоқ бўлгандан кейин, мен нега «дада», деб айтольмайман? Тўғриси, уйдаги гапларни ҳаммадан бекита-бекита ичим тўлиб кетди. Қийналаман, ичимни бўшатгим келади. Ахир, одам ўзининг яқин ўртоғига сирини айтмаса, кимга айтади? Бўрон менга ўртоқдан ҳам ортиқ бўлиб кетдику, «Дўст», деб шунақасини айтса керак-да. Бўлди, ҳаммасини айтаман унга — ойим билан Султон амакининг қаттиқ аразлашганини, бундан бувим, ҳаммамиз хафалигимизни, Султон амакининг бедарак кетгани, ундан хабар олай деб ойимга билдиримай йўлга чиқсаними — ҳамма, ҳаммасини! Ойдинда чайлага бора туриб, тилимга шу гап келди.

— Даданг қанақа эди, Бўрон?

— А-а?— деб менга анқайди Бўрон.— Яхши эди.

— Қанақа «яхши» эди?

— Жуда яхши эди-да,— деди, саволларимдан ҳайрон қолиб,— сенинг дадангга ўҳшаган.

— Тўхта-чи,— дедим. Олдинда кетаётган эди, тўхтади.— Даданг билан ойинг ҳеч аразлашганми?

— Ҳей, уйқусираяпсанми ўзинг?

Индамай қолдим. Бўрон оғзимни узоқ пойлади-да, охири:

— Нима демоқчисан, очиқ айтавермайсанми?— деди.

— Ҳеч нарса, ўзим,— дея олдим.

— Мужмал бола экансан, думи хуржунда қиласан гапни.

Нега тўғри гапиравермайсан?— энди қизишиди Бўрон.— Ҳу станцияда айтмабмидим, «ўртоқ бўладиган бўлсанг, гап бекитма» деб. Эсингдан чиқдими дарров?

На «ҳа» дедим, на «йўқ».

Бир-бirimизга индамасдан қум-шагал кечиб кетаётган эдик, гира-ширада олдимииздан отлиқ Чўпонбобо чиқди.

— Кўп ҳаялладиларинг, болакайлар. Овқат ҳам ланж бўб кетди,— деди бобо от жиловини тортиб. Кейин мендан сўради:— Даданг қалай, тузукми?

— Трассага чиқиб кетди,— деди мендан олдин жавоб бериб Бўрон.

— Шу маҳалда-я? Ҳа, дарвоqe, трассада бир ишкал чиқкан деб эшиздим...

Бобо, прожектор нурида кўп қаватли бинолардай чўзиқ-чўзиқ соя ташлаб турган вагонларга тикилди-да:

— Касал нарсага ким қўйибди кечаси тентирашни. Бориб уришиб қўймасам бўлмайди. Сизлар чайлага бориб овқатланаб туринглар,— деб отнинг жиловини силкиди.

Кап-катта одамни худди ёш болага ўхшатиб гапиргани менга жуда ғалати кўринди.

— Биз ҳам борамиз,— дедим хавотирга тушиб.

Бўроннинг боргиси келмай турарди. Бобо ҳам кетаётиб, қайтарди:

— Қўй, болам, бевақт юрсанг даданг уришади.

Мен отага эргашдим. Бўрон ҳам юрди. Бобо ноилож отни тўхтатиб, бизни мингаштириб олди.

Посёлка оралаб ўтиб, қум тепалари оша қоп-қоронғи сойликка тушиб кетдик. Ҳали отнинг түёклари остида қум-шагаллар ғижирлаган бўлса, энди қуруқ ажриқлар чарс-чурс қилиларди. Узоқдан милт-милт ёниб чироқлар кўринди. Чироқлар у ёқдан-бу ёққа тинимсиз ҳаракатланади.

— Улар трассада эмас, траншея тепасида юришибди-ку,— деди бобо чироқ кўтарганларни кўрсатиб.

Берироқда «газик» турган экан. Бобо бизни машина панасида қолдириб ўзи отдан тушди-да, одамлар олдига борди. Одамларнинг қўлидаги фонарчалар янги қазилиб, тупроғи уйиб ташланган траншеяни, ундаги милт-милт сувни ёритиб турса ҳам, аммо одамларнинг афтини кўрсатмасди. Чўпонбобо

улар билан саломлашди. Улардан бири ёнидагиларга траншеяниң охирида, тупроқ уюмiga ботиб турган машинани күрсатиб, қаттиқ-қаттиқ гапиряпти. Овозидан танидим — Султон амаки.

— У нима деяпти? — деб Бўронни туртдим.

— Қулоғинг битиб қолдими дейман. Даданг Васяни уришяпти: «Нега бу чатоқликни менга дарров айта қолмадинг!» деб.

— Қанақа чатоқлик экан?

— Ҳов анави полвонни кўряпсан-а? — деб Бўрон ҳалиги машинани кўрсатди. У энди кўзимга яққол кўринди — экскаватор экан, хартумининг ярми тупроқ уюмидан чўзилиб чиқиб турибди. — Уша ботқоққа ботиб қолибди-ку!

— Ўзинг бу ерларда сув йўқ демабидинг? Ботқоқ қаердан?

Бўрон жавоб беролмай қолди. Мен катталарнинг гапига қулоқ сола туриб, боя Чўпонбобо айтган «ишкал»нинг нималигини тушундим: бу сойлик саҳронинг чуқур ери экан. Сойликдан бир неча чақирим наридаги баландликда сув омбори бор экан. Ушандан сизиб келган, ҳам баҳорда тўпланган сувлардан бу сойда ботқоқлик ҳосил бўлибди. Катталар, шу сизот сувни тездан йўқотилмаса, полвон машина траншея қазий олмайди, қувурларни ётқизиш ҳам амри маҳол, деб ташвишга тушишяпти. Бу ишкалдан тез қутулиш чорасини қидиришяпти. Ҳамма Султон амакини қуршаб: «Нима қиласиз?» деб маслаҳат сўраяпти.

— Ўзларинг нима дейсизлар, қани? — деди Султон амаки.

— Менимча, ўртоқ инженер, — деди биттаси, — бундай қиласак: траншеяниң ҳар ер-ҳар ерида ёнга қарата ариқлар қазисак, сизот сувни оқизиб юбориш мумкин бўлар дейман.

— Полвон ҳам, бошқа машиналар ҳам ботиб қолаётган бўлса, ариқларни нима билан қазисиз? — деди Мамед.

— Қўй билан қазир экансан-да! — деди култига олиб Вася.

— Бу нарса ишни белига тепади, баттар чўзиб юборади, — деди Султон амаки. — Тошбақа қадам билан газопровод қурилишини имиллатишга, оғайнилар, ҳеч ҳаққимиз йўқ. «Бу газопроводчиларни азамат одамлар деб эшитардик, ёппа-ёз куни ботқоқда ботиб ўтиришибди-ку!» деган таънани эшитишга тоқатимиз борми!

У Чўпонбобога маслаҳат солди. Бобо бир нималар деб тушунтириди. Шундан сўнг Султон амаки ўз таклифини ўртага қўйди:

— Менимча, бобойнинг фикри тўғри, оғайнилар. Бу ерга икки-учта насос машина келтирсак, шулар ёрдамида траншеяда тўплланган сизот сувларни йўқотиб борсак. Шунда экскаватор ҳам ишлайверади. Колоннамиз бу сойликка етиб келгунча, траншея хийла қуриб тайёр бўлиб туради. Шундай эмасми, Вася?

— Шунда иш тўхтамайди, Султон Арслонович, уятга ҳам қолмаймиз!— деб маъқуллади Вася.

— Лекин насосни қаердан топамиз, Султон ака?— деди ташвишга тушиб Мамед.

Султон амаки ўйланиб турди-турди-да, кейин:

— Ўзимизга яқинроқ Газқайнарга борсакмикан? Уларда ҳамма хил машинадан топилади. Вақтинча фойдаланишга сўрасак, йўқ дейишмас дўстларимиз.

— Хат ёзиб берсангиз, мен бораман,— деди Вася.

— Ўзим борсаммикин,— деди ўйланиб Султон амаки.

— Йўқ, сиз касал одамсиз. Ўзимиз борайлик,—деди қатъий қилиб Вася.

Улар тортиша-тортиша «газик» олдига келишди. Бобо ҳам етиб келиб, отига бизни мингаштириб олди. От устида ўзимча ўйланиб кетдим: ҳаммалари Султон амакини ҳурмат қилишаркан, касал деб аяшаркан-у, лекин бари бир усиз ишлари битмас экан!..

### 13. «ОБИ ҲАЁТ»

**А**лланиманинг тарақа-туруқидан уйғониб кетдим. Чайлада бир ўзим қолибман. Бўрон ҳам, Чўпонбобо ҳам ўринларини йиғишириб, қаёққадир кетишибди. Қулоғимга самолёт учгандай гув-гув овоз келади. Бирдан яна тарақа-туруқ бўлади. Эсимни йиғиб ололмай турдим. Кейин билсам, чайланинг четан эшиги очилиб-ёпилаётган экан.

Бу — шамолнинг иши. Ҳа, ташқарида кечагидай қаттиқ шамол. Ҳавога қарайман. Тонг отган-отмаганини билиб бўлмайди. Туманми? Йўқ, ҳавони қум тўзони қоплаган. Ҳув узоқ-узоқда, саҳро қирғоғида бўзариб кўринган нима?— Ой ботяптими, қуёш чиқяптими?

Қум бўрондан юз-қўзимни тўса-тўса «посёлка»га бордим. Кўк вагонга чиқишим билан Тоғага дуч келдим. У тунука чойдиган билан бўш товоқларни кўтариб чиқаётган экан.

Мендан:

— Даданг қаёқда, хабаринг борми?— деб сўраб қолди.

— Мен қаёқдан билай? — дедим. Бирдан кечаси Султон амакининг «Газқайнарга борамиз», дегани эсимга тушди. Нашётки ўзи кетган бўлса ўшоқقا?..

— Кечаси билан чўл кезиши одатини чиқарди бу тинмаган одам. Трассада ҳам иш оғирлашиб кетди. Иннайкейин, жиян, кундузги иссиқда касали зўраяди. Доктор кундузи юришга йўл қўймайди.

Мен ўзимни қаёқча уришимни билмай қолдим.

— Бўронни кўрдингизми, Тоға?

— Ҳозиргина тепа орқасига ўтиб кетишиди. Чўпонбобо билан тағин бир нечта бола, кетмон, белкураклар кўтариб олишган.— Тоға рўпарадаги баландликни кўрсатди.

— Ушоқда бобой ўзича «қудуқ очамиз», деб юрганимиш. Қўнглида сув топиб одамларга яхши кўриниш. Беҳуда уринади. Сув анқонинг уруғи бу ерларда, аммо газ десанг ҳар қадамда.

Бўрон бугун менга ҳамма ёқни кўрсатмоқчи эди. Индамай кетиб қолгани қизиқ. Мендан қаттиқ хафа бўлдими? Кетидан борсаммикин, деб турувдим, каттакон темир бочка ортиб келаётган машина кўринди (Кеча Мамед айтган «водовоз» шу экан), унинг кетига илингандек пақир, банкалар тарақлаб келарди. У посёлка ўртасида тўхтади. Қабинадан Васька бошини чиқариб, мени имлади. Олдига бордим. Рулда Мамед ўтирибди.

— Даданг ухляяптими? — деб сўради яқинимга келиб Вася. «Йўқ», деганимдан сўнг, елкасини қисди.— Кечаси уринган, ухляяптими десам, қаёқча кетдийкин-а аzonлаб? Газқайнарга ўзи жўнаворган бўлса-я?

Вася бўшашиб, кабинага қайтди. Машина тепасида ўтирган бир бола мени имлади.

— Бу ёқча чиқ, Дамир!

— Кимсан, ўзинг?

— Мен Қўлдош бўламан.

Ха, отини эшитганман. Бўрон бир-икки марта гапирган эди.

— Чиқа қол, Дамир, катайса қилдириб келаман,— деди Вася ҳам. Чиқа қолдим.

— Сув олиб келганимиздан кейин Бўронларнинг олдига обораман. Қизиқ янгилик бошлайти улар,— деди Қўлдош.

Бу дуккибош, сепкил юз бола ҳар гапида тиржайиб турарди — ўзича кулаётганими ё одамни масхара қилаётганими, билиб бўлмайди. Бунисидан ҳам, катталарга ўшаб гапиришини ёқтирамадим. Нима бўлса ҳам, шамолдан бекиниб вагон-

да ўтирганимдан кўра, машинада айланганим ҳам тузук. Султон амаки қайтгунча келармиз.

Бочка ёнида гаплашиб кетдик.

— Сени яхши танийман. Вагонда суратинг турибди. Приёмник устида, кўргандирсан,— деди Қўлдош менга яна ишшайиб.— Ўртоқ Арслонов кўрсатганлар: «Мана буини ўғлим Дамиржон, буниси қизим Попук», деб. Бу йил бешинчини битирдингми? Бўрон билан мен олтинчини битирдик. Мендан атиги битта «икки» чиқди.

— «Беш»инг ҳам борми?

— Бизнинг муаллимлар ҳеч кимга «беш» қўйишмайди. «Беш» қўйсак, талтайиб кетасизлар, дейишади.

Мен «икки» олсам, уйқум келмасди. Қўлдош бўлса, ҳеч парво қилмагандай гапиради. Жуда беғам бола кўринади.

— Бизда «икки» олганни синфдан-синфга ўтказмайди.

— Кузда топшириб ўтиб кетаман. Бўрон ёрдамлашмоқчи,— деб қўйди Қўлдош, секингина.

Мен қизиқиб нимадан икки олганини сўрай девдим, шамол зўрайиб, гапиргани қўймади. Мамед юрадиган йўлидан адашдими, машина қаттиқ силкина берди. Банка, пақирлар, худди тунука томга тош отгандай шарақлаб борарди.

Машина таққа тўхтади. Мен ағдарилиб тушдим. Қапалағим учиб кетди. Лекин ҳеч ерим оғримади. Худди тўшакка ағанагандай юмшоқ қумга тушибман. Қўлдош хаҳолаганча тушиб келиб, кийимларимни қоқиб қўйди. Қарасам, қум тепа олдиди турибмиз.

— Вой-бўй!— деди Қўлдош ҳовлиқиб.— Дарёга борадиган йўлимиз тўсилиб қолиби-ку!

Вася билан Мамед пастга сакрашди.

— Ваҳима қилганингча бор экан, Мамед,— деди Вася, қум тепанинг у ёқ-бу ёғига кўз югуртириб.

— Кеча бунчалик баланд эмасди. Бир амаллаб ошиб ўтган эдим,— деди Мамед.

— Энди сувни қаёқдан топамиз?— деди Мамедга тикилиб Вася.— Бутун ишимиз тўхтайдиган бўлди-ку, қардош?

— Сув азоби қурсин, жонга тегди,— деди уҳ тортиб, папирос чекиб Мамед.

Шу вақт орқадан машина овози эшитилди. Ҳадемай «ГАЗ-69» етиб келди. Ундан ҳаммамизни ҳайрон қолдириб, Султон амаки тушди.

— Ия, ия, Султон Арслонович, қандай қилиб бизни топиб келдингиз? Аzonлаб қаёққа кетиб эдингиз?

Султон амаки Газқайнарга бориб, иккита насос ундирганини, насослар ҳали замон етиб келишини гапирганда, Вася билан Мамед хурсандликдан сакраб юборишиди.

— Хўп соз бўпти-да, Султон Арслонович. Ботқоқдан тез жиладиган бўбмиз-да, соғ бўлинг!

Султон амаки уйқудан қолгани, қаттиқ чарчагани учун кўзлари қонталашиб кетган бўлса ҳам, лекин чеҳраси очиқ эди. Бирдан менга кўзи тушиб қолди.

— Сўрамасдан тентирайвериши? Чайладан ахтариб юрибман-а сени, Дамир!

Менинг номимни эшитибми, машина ойначасидан Лайка бошини чиқариб, ҳурди. Оббо қурғур-эй, охири эганг билан тошиб олибсан-да!..

Султон амаки, баланд қум тепани кўрди-ю, чеҳраси тундлашди. Уч киши алланарсаларни маслаҳатлашишиди. Мамедга узоқ бир сойни тушунтириб, сўрашди:

— Топа оласанми?

— Топа оламан. Хотиржам бўлинглар,— деди Мамед.

— Бўпти бўлмаса! Дамир, сен ҳам ўртоғинг билан ўйнаб кела қол,— деди-да, Султон амаки Васяни ўз машинасига ўтказиб, тез орқасига қайтди.

Мамед «водовоз»ни чапга бурди.

— Энди қаёққа боради?— дейман Қўлдошга.

— Қўйвер. Қатайса қилганимиз қолади,— дейди Қўлдош хурсанд бўлгандай.

Яна қанча тепалардан, саксувулзорлардан ўтдик. Кўп юрдик. Бир сойлик кўринди. Машина пастга тушиб борди. Сойликнинг остида шилдираб сув оқарди. Шишадай тип-тиниқ. Худди бизнинг Комсомол кўлидаги сувга ўҳшайди. Мамед билан Қўлдош умрида сув кўрмагандай, ётиб сувдан шимиришиди, ювениб олишди-да, ишга тушишиди. Қўлдош икки пақирлаб сув ташийди. Мамед машина устида туриб, пақирни бочка оғзига куяверади. Қўлдош ҳар пақирни узатганда, Мамед «молодец», деб қўярди. Бирпасда Қўлдошнинг юзлари қип-қизарип тер қўйиб кетди.

— Қарашиб юборайми?— деб сўрайман. Шунчаки сўраган бўлсан ҳам Қўлдош жон деб турган экан, пақирнинг кичикроғини қўлимга тутқазди.

Ким ўзарга сув таший бошладик. Мен ҳам ҳар борганда, Мамеддан «молодец» эшитиб турдим. Олдинига бу қизиқарли кўринди. Салдан кейин чап қўлим чарчади. Ўнг қўлим билан ташишга тушдим. Кафтимининг оғриғи кейинги кунларда би-

линмай қолган эди. Беш-олти пақирни ташидиму яра ўрни зирқираб кетди. Бочкаси құрғур ҳали-бери түладиганга ўхшамайды. Мамед «молодец, Дамир!» деб қўйса ҳам, лекин Қўлдош парвойи палак. Бир вақт у афтигма тиржайиб:

— Пиш-ш!— деди.

— Нима «пиш?»— дедим алам қилиб.

— Шолғоминг чиқиб кетибди-ку, оғайни! Хом экансан. Жаҳлим қистади. Челагини отиб юбордим.

Тепадан Мамед кулиб:

— Ўзинг жинде бўлганинг билан зарданг катта-ку!— деб қўйди.

Бочка тўлгандан сўнг, Қўлдош оғзи қопқоқли каттакон сут бидонга сув тўлдира бошлади. Унга беш челакча сув кетди. Энди қандай кўтараркин, деб турибман. У, «кўтаришмайсанми» дегандай, менга тиржайди. Мен билмаганга олдим. Бир вақт қарасам, ўзи бидоннинг икки қулоғидан кўтарганча, пишиллаб чиқяпти. Сойдан чиққунча, уч-тўрт марта ерга кўйиб олди. Юзи қип-қизариб, чакка томирларигача ўйнаб кетди. Шунда мен унинг чап юзида ялтираган ямоқлари борлигини билдим. Ачиндим. Кўтаришиб юборсам, деб турувдим, Мамеднинг ўзи кўтаришиб, машинага боғлаб қўйди.

Кела-келгунча Қўлдошга индамадим. У ҳар хил гап билан мени юпатишга уринди. Мен ундан хафа бўлганимни, кафтиминнинг қавариб кетганини айтиб ўтирамадим-да:

— Катайсанг шумиди?— дедим.

— Кунига шунаقا,— деди у.

— Нега шунаقا?

— Шунаقا-да.

Мен тушунолмасам ҳам, бошқа сўрамадим.

Қайтишда шамол сал тинди. Анча йўл босдик. Саҳродан посёлкага кириб келаётганимизда, посёлкадан ҳайбатли куракларини офтобда ярақлатиб икки зўр машина чиқиб кетаётганини кўрдим. Машиналардан бирини Вася ҳайдаб кетяпти.

— Бульдозерлар ҳалиги кум тепани сургани кетишияпти — даданг юборган,— деб қўйди Қўлдош.

Водовоз келиши билан вагонлардан кишилар: хотинлар, болалар сакрашиб тушди. Ҳаммасининг қўлида пақир, чойнак, кастрюль. Худди ари болга ёпишгандай, гувурлашиб, машинани ўраб олишди.

Бир-бирларига:



Бутуниттифоқ ёзучилар IV съездид. 1967 йил, май.

— Хайрият-э, оби ҳаёт келди, оби ҳаёт! — деб севинишарди. (Мунчалик буларда сув азиз бўлмаса-я).

Оқ пешбанд, сурп қалпоқ кийган семиз хотин бўлса (ошпазга ўхшайди), Мамедга бидиллаб кетди:

— Сувни кечагидан ҳам кечиктирдинг-ку, кавказ боласи. Қозонга ўт ёқолмай ўтирибман-ку. Тушлик кечиска, ким жавоб беради? Бошлиқларга айтиб таъзирингни бердирмасам!

Мен буларга алақсиб турувдим. Қўлдош кўринмай қолди. Қарасам бидоннинг белидан арқон ўтказиб орқалаганча, нарида лапанглаб кетяпти. Бирпас аграйдим-да, қаерга бораркин, деб кетидан эргашдим. Бир бостирмаға қараб борди. Бостирма ёнида Тоға кўринди. Қозиққа боғланган оқ эчкининг тагини супуряпти. Атрофида товуқлар тезак титиб юрибди. Қўлдош инқиллаб-синқиллаб, бидонни ерга қўйиши билан Тоға ўдағайлади:

— Битта сувга шунча юрасанми! Эчкини сугориш, боқиши хаёлингга келмадими, зумраша!

Қўлдош бугун сув топиб келиш жуда қийин бўлганини гапирса ҳам, у ишонмади.

— Биламан, ўйинга алақсигансан. Бекорчи хўжалар билан лақиллашиб юргансан,— деди.

Мен боришимни ҳам, қайтишимни ҳам билмай, берироқда турувдим, Тоға кўриб қолди-ю, афтини ўзгартди.

— Э, меҳмон йигит, келинг, келинг,— деб мени чақирди.— Қани, Қўлдошбой, ўртоғингни ичкарига олиб кир, меҳмон қил!

Мен қулоқ солмай орқамга қайтдим.

## 14. АДАЖОН!

**К**ўй вагон олдида Султон амаки мени кутиб турган экан. Унинг оёғига ўралашган Лайка югурга келиб менга ўзини отди.

— Лайка бечорани қамаб кетган экансизлар, озод қилиб келдим,— деди кулиб Султон амаки.— Сен буни қандай олиб келдинг? Самолётга итни туширармикан?

Довдирағб қолдим. Самолётдаги воқеани айтами-айтмайми? Ортиқча ўйлашга вақт йўқ. Айтмасам, Бўрон айтади бари бир. Балога қоламан. Айта қолдим — ҳамма, ҳаммасини. У, хафа бўлиш ўрнига, қотиб-қотиб кулди.

Столга ўтиридик. Иштаҳаси бўлмаганми, мени кутибми, нонушта қилмабди. Чойи ҳам, қўймоғи ҳам совиб қолиби.

Гапимизга тағин бирор халақит бермасин, деб эшикнинг илгагини солди. У ёқ-бу ёқдан сўзлашиб ўтирик. Дарсдан олган йиллик баҳоларим, болалар мени қолдириб тоққа ке-тишгани, кўлда чўкканимда Бўроннинг қутқаргани, ҳайвонот боғига борганимиз, бу ёққа келаётганимда Попукнинг эргаш-танигача айтиб бердим. «Айтсан, тезроқ бирга қайта қолар-микин», деб бувимнинг касалини ҳам билдиридим. Ҳамма гап-ни очилиб эшигтан эди, бунисидан хафа бўлиб кетди. Пеша-насини қашиганча, узоқ ўйлади Кейин сўради:

— Ойинг яхшими, ишта боряптими?

— Ҳа,— дедим.

Яна бирпас пешанасини қашиб, у ёқ-бу ёққа алланглаб тур-ди-да, кутилмагандан деди:

— Ойинг сендан қаттиқ хавотир олиб ўтирганимиш. Қиди-риб бормаган жойи қолмаганмиш. Кетингдан самолётда кела-ётганмиш...

Нималар деяпти ўзи, деб эсим оғиб қолди, устимдан муз-дай сув қўйгандай бўлди. Султон амаки худди синамоқчидай кўзимга тикилиб олгандан сўнг:

— Ҳали бирпас мизғиганимда шундай туш кўрибман. Го-ҳида тушнинг ўнг келиши ҳам бор,— деб қўйди. Ҳа, ишқилиб туши экан-а, деб хиёл енгил тортдим. Кейин Султон амаки сў-ради:— Сени бу ёққа ойинглар юборишдими ё ўзинг бораман деб қистадингми?

Имтиҳонда оғир саволга дуч келгандай эсанкирадим. Сул-тон амаки афтимга илжайиб тикилган сари, бир нима сезяп-тими, деб юрагим пўкиллайди.

— Ўзим ҳам қистадим,— дедим охири таваккалига. Дуд-малроқ жавоб қилган бўлсам ҳам қулоғим, бирор чўзгандай, ловиллаб кетди.

Эҳ, Султон амаки, Султон амаки! Бу ёғини сўраб нима қи-лардингиз-а? Сизнинг уйдан кетиб қолганингиз, ойимнинг ҳа-деб хафа бўлавергани келишга мажбур қилди-да мени. Бўл-маса у ёқда ойимни хавотир олдириб, сизнинг олдингизда ўзимни қийнаб юармидим?

— Ойинг хат-пат ёзиб бермадими?

Овозим чиқмай, бошимни сарак-сарак қилдим.

Султон амакининг ранги аввалгида ҳам сарфайиб кет-гандай бўлди. Анчагача дами чиқмади. Ҳаёли ўзида бўлмага-нидан, совуқ чойни пуфлаб-пуфлаб ичарди.

Қандай қилсам Султон амакининг ҳаёли жойига келаркан, қовоғи очиларкан, деб ўйлайман. «Ойим сизга салом айтди-

лар», десаммикин? Иўғ-э, келишмайди. Буни кечаёқ айтганимда бўлак гап эди. Ёлғонлиги билиниб қолади. «Сизни келсин деб айтдила», десам яна ишониши қийин.

Султон амакининг ўзи гап очиб қолди:

— Дамиржон!— деди овози қалтираб ва бирпас жим қолиб.— Чин ўғлим бўлсанг, бир сўз չўрайман. Тўппа-тўғри жавоб айтасан, келишдикми?

— Химм,— дедим.

— Қани айтгин-чи: ойинг мени ҳеч эслайдими?

— Хим-м,— деб юбордим-у, лекин нима деб эслаганини айтиб ўтирамдим. Қейин бир оз дадилланиб, қўшдим.— Бувим ҳам доим эслайдилар, соғлиғингизни ўйлайдилар...

— Ростданми? Шундай экан, нега хат ёзишмади?

Султон амакининг рангига қон югуриб, қовоғи очила бошлиди. Шуни кўрдим-у, усти-устига дедим:

— Вақтлари бўлмади. Менга айтишувди ёзгин деб, келиштиролмадим...— Кулворай деб, яна ўзимни тутдим.— Ойим ҳам, мен ҳам бувимнинг касали билан овора бўлиб қолдик.

Султон амаки чуқур хўрсиниб олди-да:

— Ҳа, ундаи бўлса, тушунарли,— деб қўйди. Бу гапи қулоғимга: «Сабабли экан, кечирарли», дегандай бўлиб кирди. Қейин хавотирга тушиб, ўзига-ўзи деди:— Бориб, кўриш керак экан...

Яшавор, Дамир! Қелганинг бекор кетмайдиган бўлди!

Хозир кўзимга Султон амаки ҳар вақтдагидан кўра ғамхўр, раҳмдил кўриниб кетди. Севиниб, шошиб қолганимдан:

— Борасизми, ада?— деб юборибман.

Бу — биринчи «ада»лашим эди.

Айтишга айтдим-у, ичимдан чуқур хўрсиниқ келди, қулоғим шанғиллаб, кўзим тиниб кетди.

Султон амаки ҳам шундай бўлдими, билмайман: анча вақт индамай, қон талашган уйқусиз кўзларини менга тикиб қолди.

Бу тикилиши менга жуда ҳам юмшоқ, меҳрибон, ич-ичимдагини билиб тургандай яқин кўринди.

Кейин бирдан эгилдию кучли қўллари билан кечагидай қўлтиғимдан олиб осмонга кўтарди-да, деди:

— Сенга айтсам, ўғилгинам, ҳозироқ уйга қанот бойлаб борарадик! Аммо бу ердаги ишлар, ўзинг ҳам кўряпсан, оғирлашиб кетяпти, кўнгил узолмай турнибман.

«Бўлмаса қачон борасиз?» деб сўрамоқчи бўлиб турган эдим, ташқарида машина гудок берди. Эшик тақиллади. Қи-

шиларнинг ғўнгир-ғўнгири орасида: Султон Арслонович! Насос келди! Насос!» деган узуқ-юлуқ сўзлар эшитилди.

Султон амаки апил-тапил кийиндиу чиқди. У, устига аллақандай темир асбоблар ортилган юк машинасидаги одамлар ёнига ўтириб, траншея томонга жўнади.

Мен кетидан афрайганча қолдим.

Чайлдан хабар олай-чи, деб кетаётган эдим, бир сумка тўла газета кўтариб югуриб келаётган Бўронни кўрдим. Оёғида катта этик, дўқ-дўқ қиласди. (Кечадан бери унинг ботинкасини кийиб юрганим эсимга тушди).

— Ҳа-а?— дедим.

— Ҳа-а?— деди у ҳам.

Кеча сир беркитдинг, деб Бўрон мендан сал аразлаган эди. Ҳозир иккимиз ҳам гапни нимадан бошлишни билмасдик. Бўрон:

— Бўпти,— дедио ўтиб кетди. Султон амакининг вагонига, яна бошқа вагонларга кириб, сумкасини бўшатиб чиқди. Кейин қовоқ солиб сўради:— Қоқкан қозиқдай нима қилиб турибсан?

— Сени пойлаб турибман. Почтальонмисан?

— Почтальон ёрдамчиси,— деди-да, индамай йўлига кетаверди.

— Тўхта, ҳей, менга ҳамма ёқни кўрсатмоқчи эдинг-ку. Қани ваъданг?

— Ўзингни ваъданг-чи?— деди зарда билан.

— Кел бўлмасам. Қовоғингни солма лекин.

— Айтавер,— деди берироқ келиб, боягича бўзариб туриб.

— Мен адамга ҳамма гапни айтиб бердим...

— Ростданми?— деди Бўрон кўзларини катта очиб, лекин нималарни айтганимни суриштирмади.

— Ишонмасанг, ўзидан сўраб боқ.

— Ундай бўлса бўпти,— деди қовоғини очиб, менга қўлини узатиб.— Қани, юр, Тошқудукқа борамиз. Бобой болалар билан антиқа иш қиляпти.

## 15. МУЪЖИЗА ҚУДУҚ

**III** амол тинган. Офтоб чараклаб, бутун саҳрони ёндирип япти.

Туя ўркачларига ўхашаш қум тепаликларидан ошиб борсак, Чўпонбобо билан уч-тўрт бола белкурак, кетмонларда қум суришяпти. Бўрон югурга бориб, бобойнинг қўлидан кет-

МОННИ ОЛДИ-ДА, ИШГА ТУШДІ. БОБОЙ СОҚОЛЛАРИГА ЁМГИРДАЙ ОҚИБ ТУШАЁТГАН ТЕРНИ ЯКТАК ЭТАГИГА АРТДИ, БЕЛИНИ УҚАЛАЙ-УҚАЛАЙ, ДҮНГЛИККА ЪТИРДИ.

МЕН ҚАҚЦАЙИБ ТУРДИМ-ТУРДИМ-ДА, КЕЙИН БҮРОНДАН:

— НЕГА УНАҚА ҚИЛЯПСИЗЛАР? — ДЕБ СҮРАДИМ.

— ҚУДУҚ ОЧЯПМИЗ, — ДЕДИ У.

— ҚАНАҚА ҚУДУҚ, РОСТДАММИ? — ДЕДИМ, — БОЯ ТОҒАНИНГ, «ЧҮПОНБОБО БЕХУДА УРИНЯПТИ», ДЕГАНИ ЭСИМГА ТУШИБ.

БҮРОН БИР МЕНГА, БИР БОБОЙГА ҚАРАБ ОЛИБ:

— ҰЗИМ ҲАМ БИЛМАЙМАН, — ДЕДИ.

— БУ ЕРДА ҚУДУҚ БОРМИ-ЙҮҚМИ, ҲАЛИ. БЕКОРДАН-БЕКОРГА ҚАЗИБ ЁТИБМИЗ ДЕСАНГ-ЧИ, — ДЕДИ БОШҚА БОЛА, БЕЛКУРАГИГА ТАЯНИБ.

— ОҒЗИНГГА ПАЛОВ, ЁМОН НАФАС ҚИЛМА, БҮТАЛОГИМ. ЯХШИ НИЯТ-ЯРИМ МОЛ, — ДЕБ БОБОЙ ГАПГА ТУШДИ: — СЕНЛАРДАЙ БОЛА БҮЛІБ КЕТГАН. СОҚОЛИМ ШУ ЕРЛАРДА ОҚАРГАН. БИР ВАҚТ КОН ОЧУВЧИЛАР САХРОНИ ТЕКШИРА-ТЕКШИРА КЕЛИБ, ШУ ЕРДА БЕКАТ ҚУРИШГАН. АТРОФНИ ИЛМА-ТЕШІК ҚИЛИШГАН. БИР ЕРДАН ГАЗ ОТИЛІБ ЧИҚСА, БИР ЕРДАН СУВ ОТИЛГАН. ШИРИН СУВ ЧИҚҚАН ЕРДА ҚУДУҚ ОЧИШГАН. ҚИМДИР ҮНГА «МҮЖКИЗА ҚУДУҚ», ДЕБ НОМ БЕРГАН. ҚУДУҚ ОҒЗИНИ ҚУМ ТУШМАСИН, ДЕБ ХАРСАНГ ТОШЛАР БИЛАН МАХКАМЛАШГАН. ТОШҚУДУҚ НОМИ ҲАМ ШУНДАН. КЕЙИН, ГАЗ КОНИНИНГ КАТТА ОҒЗИ НАРИДА ЭКАН ДЕБ БЕКАТНИ ГАЗҚАЙНАРГА ҚҮЧИРИШГАН. Ана шунақа, бүталарапим...

— МҮЖКИЗА ҚУДУҚ НИМА БҮЛГАН? — ДЕДИ БҮРОН.

— МҮЖКИЗА ҚУДУҚ ҮЗОҚ ВАҚТ ҚАРОВСИЗ ҚОЛГАН. БОРА-БОРА ҚУМ БҮРОНДА КҮМИЛИБ, ҮРНИ ЙҮҚОЛИБ КЕТГАН. Ана шунақа...

— БҮЛМАСА ҮРНИНИ ҚАНДАЙ ТОПДИНГИЗ?

— МАНА БУ ШОХЛАРГА ҚАРАБ ТОПДИМ, — ДЕДИ БОБОЙ, ҚУМЛАРДАН ТУРТИБ ЧИҚҚАН ҚУРУҚ ЕҒОЧЛАРНИ КҮРСАТИБ. — УЛАР САКСОВУЛ ШОХЛАРИГА ҮХШАБ КЕТАРДИ. ҚУДУҚ СУВИДАН ФОЙДАЛАНИБ ШУ ЕРГА АНЧА САКСОВУЛ ЭКИЛГАН, БИР НЕЧТАСИ УНИБ ҚОЛГАН ЭДИ. ҮШАНИНГ ҚОЛДИҚЛАРИ БУ. Ана шунақа. БУ ЕРДАН МҮЖКИЗА ЧИҚМАСА МЕН КАФИЛ.

БИЛИБ ТУРИБМАН, БОЛАЛАР ЧҮПОНБОБО БИЛАН ГАПЛАШИШГА ҲЕЧ ЭРИНМАС ЭКАН. ЯНА БИР БОЛА ИШНИ ТҮХТАТИБ, ЖҮРТТАГА ҲАЗИЛ ҚОТДИ:

— БОРДИ-Ю ЧИҚМАСА, КИМ ЖАВОБГАР, БОБОЙ?

БОБОЙ ҲАМ ҲАЗИЛ БИЛАН ХИРЛЛАБ ЖАВОБ ҚИЛДИ:

— БЕЛКУРАККА СУЯНИШЛАРИНГДАН ҚОРИНЛАРИНГ ОЧГАНГА ҮХШАБ ҚОЛДИ-Я. МАЙЛИ, ЧИҚСА-ЧИҚМАСА ОҒЗИНГГА ПАЛОВХОНТҮРӘ!

Ҳамма кулди.

— Паловхонтўра билан қутулиб кетолмайсиз, бургут билан овга олиб чиқасиз бизни!

Чўпонбобонинг яна тили қичиб, хириллади:

— Қўли югурикнинг оғзи югурик, деган гап бор. Сенларники бўлса тескарисига ўхшайди. Шу имиллашларинг бўлса, паловхонтўра ҳам ланж бўлиб, ов ҳам инига кириб кетар, худо хоҳласа.

— Ҳой, бўлсанг-чи, ошдан қуруқ қолмайлик. Ҳой қимирласанг-чи, овни ундирайлик!— деб болалар бир-бирларини қисташа кетди.

Мен нима қилишимни билмай ҳайронман. На гапга аралашаман, на ишга. Таваккал қилиб биттасининг белкурагини олайми десам, қўлим ҳалигидақа. Шу ҳазиллари бўладиган бўлса, ҳадемай мени ҳам қуруқ қўйишмас. Тағин ҳам булар тоғанинг «бекорчи хўжа» деганини эшитишмаган. Эшитишачи, кўз очиришмас экан. Обрў борида жўнаб қолсаммикан? Орқамдан «шаҳарлик бола олифта, нозик экан — ишдан қочди», дейишмайдими? Қайтиб буларга қандай аралашаман. «Бор-е, нима дейишса дейишар», дедим. Йўқ, яна юзим чидамади. Бориб, Бўроннинг кетмонини сўрадим.

— Бу кетмоннинг бўйи сенга тўғри келмайди,— деди Бўрон.

Ҳамма кулди. Қейин Бўрон мени изза бўлмасин деб, бир боланинг кичик белкурагини олиб берди. Энди уч-тўрт марта кумга белкурак урган эдим. Бобой:

— Қўя қол, меҳмон бола. Сенга тўғри келмайди,— деди. Лекин афтидан билиб турибман: боқишиганимга хурсанд.

Белкуракнинг эгаси бўлса ўтириб олиб, ишимга қарайди. Қейин индамасдан келди-да, «раҳмат» деб белкуракни олди. У ҳам, «меҳмон бола», деб сийладими, ёки белкурак тутишим ёқмадими, билолмадим. Нима бўлсаям, бўшаганим тузук бўлди. Бир зумдаёқ ҳаммомга тушгандай терга ботиб, ҳаллослаб қолган эдим. Битта мен эмас, ҳаммаям офтоб қизифида шунака аҳволга тушган эди.

— Юраклар куйиб кетди-ку,— деди томоғи қуриган бобой— Асли «офтоб ўчоқ»ни келтирганингда, чой қайнатардик-да.

Бўрон жон деб турган экан, чайлага югуриб кетди. Бобой кетмонни қўлга олиб, болаларга деди:

— Ҳа, бўталарим, яна бирпас ғайрат қилсак, ажабмаски, мўъжизанинг кўзи очилса! Зора оби-ҳаётга ёлчиб қолсак.

Ахир, бўталарим, одамларнинг ташналигини қондиришдан кўра савоб иш борми оламда!

Бобойнинг сўзлари таъсирида болалар яна қимир-қимир қилишиб қолди-ю, лекин ишлари унча ҳам унмасди. Шу чоқ бобой Қўлдошни эслади.

— Хийла тиришқоқ бола экан-да, барака топгур. Кечак яхши иш берган эди.— Болаларнинг юзида «биз-чи?» деган савол пайдо бўлди. Бобой буни пайқаб, кетини тузатди:— Сизлар ҳам хўп ғайрат кўрсатяпсизлар-ку, аммо Қўлдош бўлганда сизларга бунчалик оғир тушмасди-да. Бугун нечук дараги бўлмаяпти?

Болалар елка қисишиди. Қўлдошни тоғаси уришгани, эчки боқишига юборганини айтай дедим-ку, айтолмадим. «Ўзинг ишимизга ёлчитиб боқишмаган, чақимчилигинг бормиди!» деб қолишмасин тағин.

Бўрон, манглакага ўхшаган нарса билан тунука чойдиш кўтариб келди.

— Бу нима ўзи?— деб болалар унинг устига ёпирилишди.

— «Офтоб ўчоқ». Мана ҳозир кўрасизлар.

Манглакада на ўтйн бор; на кўмир. Булар ўрнида оташдонга жимир-жимир майдо ойначалар ўрнатилган. Улар шундай ўрнатилибдики, ҳамма ойначалардан бир нуқтага ўткир шуъла тушади, худди электр лампочкадай ёнади. Бўрон ана шу «олов» устига чойнакни қўйди-да:

— Ун беш минут сабр қилсаларинг, чой гатоп,— деди, худди циркда фокус кўрсатаётган масхарабоздай.

Бирор ишонди, бирор ишонмади.

— Буни қаёқдан олдинг?

— Ўзимиз ясадик. Қўлдош билан бирга.

Шовқин кўтарилиди:

— Ёлғон!

— Рост!

— Ёлғон!

— Рост!

Мен ҳам ишониш-ишонмаслигимни билмай турибман. Бўроннинг олдинги гаплари-чи, ҳаммаси тўғри чиқди. Бунисиям тўғридир балки. Баъзи болаларнинг «ёлғон» деганига унинг жаҳли чиқадими десам, йўқ, парво қилмай турибди. Болалар энди бобой зўрласа ҳам ишга қарамай фақат «офтоб ўчоқ» фокусининг натижасини кутиб қолишган эди.

Кўп ўтмасдан, чойнак оғзидан буғ чиқиб, чойнак қопқоғи

вишв-вишв этиб титрай бошлади. Болалар «ура!» дейишиб, чапак чалиб юбориши.

— Бўронбойда ҳунар кўп, ишонаверинглар!— деди бобой фахрланиб ва белбоғига туғиб келган нон билан туршак, жийдадан оз-оз улашди. Кружкада навбати билан чой ичиши. Мен ҳам қуруқ қолмадим.

Чойдан сўнг яна қудуқ қазиш бошланди. Қум тепа сурила-сурила пастга тушиб борарди. Унга сари қизиқкан бобой қаттиқроқ кетмон урарди. Ўнинг астойдил ҳафсала билан ишләётганини кўриб, болаларда ҳам ишонч пайдо бўлди: «Мўъжиза очиладиган бўлса очилсин, бўлмаса йўқ», деб урина кетишиди.

Бобой куйиб кетди. Ўпкаси шишиб, бурун катакларини керип қаттиқ-қаттиқ пишиллар, қақраб кетган томоғини қириб-қириб қўярди. Кейин қарасам, эгилиб кетмонга тиралганича белини кўтаролмай қолди. Раҳмим келди, бир жойда томошабиндай қақкайиб туролмай қолдим. Шартта бориб бобойнинг кетмонига ёпищдим. Бобо «бу нима қилиқ?» дегандай ажабланиб турди-да:

— Бироқ кўтаролармикинсан,— деб кетмонни берди. Ўзи четга чиқиб, чойдишни ёнига қўйиб ўтириди.

Кетмонни кўтарай десам, зил-замбил. Бобой «Айтмадимми?» демасин деб, кучим борича кетмонни кўтариб урдим. Бобой кулган эди, болалар ҳам бирдан хахолашиб юборди:

— Ия, ия, кичкинтой, ҳорма! Шундоқ кетмонни кўтариш ўйл бўлсин, аввал ўзингни эвласанг-чи, миттивой!..

Булар қаёқдан топди-а «митти»ни! Ҳа, ҳа, майли кулаверларинг. Қўлидан ҳеч бало келмайди деган бўлсаларинг, энди қўриб қўйларинг, деб кетмонни уравердим, қумларни суравердим. Қўлларим, елкаларим оғриб кетаётган бўлсаям билдирмадим. Бир вақт дессангиз, кетмоннинг тифи заранг бир нарсага урилиб қарсиллаб кетди-ю! Ўзим ҳам қўрқиб кетганимдан ўтириб қолибман. Баттар кулги кўтарилди.

— Ана, айтмабмидик! Ҳолинг шу экан-ку, миттивой! Нима қилардинг чиранниб. Чиранма гоз — ҳунаринг оз!— деб шов-кинлашди болалар.

Битта бобой кулмади. Югурга келиб кетмонни олди-ю, ўша заранг ерни оча бошлади.

— Айтмадимми!— деб ҳайқириб юборди бобой.

Биз унинг кетмони тушган жойга тикилдик. Қум орасида алланима йилтилларди. Қўпчилик ёпирилиб, ўша ерни очиш-

ди. Мен ҳам қизиқиб ишга аралашиб кетдим. Харсанг тош, ёғоч, темирлар...

— Энди нима дейсизлар?— деди овози хириллаб, кўзлари чақнаб бобой. Қейин бирдан мени мақтаб кетди:— Яша, шоввуз! Омадинг келган экан, кўлинг ёқди. Мўлжални тўғри олибсан. Чиндан отасининг боласи чиқдинг!

Мен уялиб кетдим. Болалар бўлса, тан беришганиданми, менга ер остидан қараб-қараб жим туришарди.

Ҳадемай «Мўъжиза қудуқ»нинг усти очилди. Унга ёпилган қопқоқнинг тахталари чириб, темирлари занглаб қолган экан. Лекин у маҳкамлаб ташланган экан. Очмоқчи бўлиб хўп уриндик, очила қолмади. Бобой бир чеккага чиқди. Чойнакда қолган чойни ичиб ўтириб, хаёл сурди. Болалар хурсандликданчувур-чувур қилишарди.

— Нимани ўйлајапсиз, бобой?— деди Бўрон. Болалар жим бўлишди.

— Очишга очдик-ку,— деди бобой ҳорғин овозда,— қудуқда сув қолганми ё бошқа ёққа оғиб кетганми, шуни ўйлајапман.

— Бўни қандай қилиб биламиз?

— Билиш учун устини очиб, ичига тушиш керак. Ўткир асбоблар билан уста бўлмаса буни уddaлаш оғир кўринади. Болалар шалпайиб ўтириб олишди.

— Топдим, топдим, бобой!— деди ўрнидан сакраб турган Бўрон.— Қўлдошга айтамиз. Тоғаси уста-ку. Асбоблар ҳам ўшанинг қўлида.

— Ҳа, дарвоқе,— деди бобой руҳланиб,— ақлинг жойида, бўтам. Қўлдош ўртоғинг билан бориб, тоғасидан илтимос қилинглар. Бироқ, бўталарим,— деб ҳаммамизни огоҳлантириди,— бу янгилик ҳозирча ўртамиизда қолсин. Подадан олдин чанг чиқариб, ўсал бўлиб қолмайлик. Қудуқдан сув чиққандан сўнггина, овоза қилсак арзиди. Хўпми?

— Хўп,— деб ваъда бердик ҳаммамиз.

— Бўлмаса,— деди бобой Бўронга,— сен ўртоғингни то-пиб, маслаҳатни битир. Сизлар,— деди болаларга,— асбобларни йиғишириб чайлага боринглар. Бу меҳнатларга паловхонтўра ясамасак бўлмас.

Бобой ёғоч оёғини дўқиллатиб чайласига кетди. Бўрон бўлса, этигини шалоплатганча посёлка томонга юрди. Мен ҳам кетидан эргашдим.

Сал-пал ишлаган бўлсам ҳам, қаттиқ чарчаган эканман. Кўк вагонга чиқиб, каравотга таппа ташладим.

Қанча ухлаганимни билмайман, бир вақт Бўрон уйғотиб:  
— Юр чайлага,— деди,— қорин пиёзнинг пўсти бўбкетди.

Бирга чиқаётib, ундан Қўлдошни сўрадим.

— Қўлдошдан иш чиқмади,— деди у қўл силтаб.

— Нимага?

— Борсам, бостирмада хум бўлиб терт қоряпти. Мени кўриши билан кўзини артиб олди. Бари бир ҳиқ-ҳиқ қилишидан билиб турибман — тоғаси хафа қилган. Ўзи шунаقا илгаритдан.

— Қўлдошнинг ота-онаси йўқми?

— Ота-онаси, ака-укалариям бор. Узоқ қишлоқда улар. Тоғаси буни, қурилишга борсанг, ҳунарвон қилиб қўяман, деб опкелган. Қўлдош ўзича, бу ерда машиналарни ўрганиб меморик бўламан, кейин ўқиб инженер бўламан, деб орзу қилган. Лекин келгандан бери эчки, товуқ боқиш, сув ташишдан бўшамайди. Устахонада камдан-кам бўлади. Ўқишига ҳам тузук қаролмади. Шунча юмуш қилсаям, барি бир тоғасининг кўнгли тўлмайди. Мен Қўлдошдан, «тўғрисини айт, тағин урдими?» деб сўрадим. У айтмади. Қўймаганимдан кейин, айтди. «Эчкини яхши боқмаяпсан, кам сут беряпти. Сутини ичиб қўяяпсан шекилли», деб тоғаси савалапти. «Яхши боқмаганинг тўғрими ўзи?» дедим. «Улай агар, яхши боқяпман-у, сутни оз беряпти. Шунисига ҳайронман ўзим ҳам», дейди. «Оқ эчкининг сути ширин бўларкан, балки ичиб қўяётгандирсан?» деб ҳазиллашсам, жаҳли чиқиб кетди. Биламан, Қўлдош унақа боламас. Бунда бир сир борга ўхшайди, текшириш керак.

— Қанақа сир бўлади?

— Эчкисини эчкиэмар эмиб қўяётган бўлмасин, дейман-да.

— Ия, шунақасиям бўладими?— Оғзим очилиб қолди.

— Бўлмаса-чи! Саҳрова эчкиэмар кўп. Бобой билан мол боқиб юрганимизда, неча марта учратганмиз. Эртага ҳам пойлаймиз.

Бўрон буни жўн бир нарсадай гапиряпти. Менга бўлса аломат кўриняпти.

Чайлага келсак, бурнимизга гуп этиб палов ҳиди урди. Болалар йўқ. Чўпонбобо ёнбошлаб, чой ичяпти.

— Қалай, ундириб келдиларингми?— деди қаддини кўтариб.

— Йўқ,— деди Бўрон, ўртоғининг сирини очгиси келмай,— ҳозир Қўлдошнинг вақти йўқ экан, ҳали борамиз тоғасининг олдига.

Бобой сопол лаганда қолган паловни олдимизга қўйди. Бизни кутавериб, ошни тагига олдирибди. Болалар яхши жойини еб-еб, нуқул қирмочини бизга қолдиришибди. Шундоқ бўлса ҳам, мақтаб-мақтаб туширдик. Кейин посёлкага кетдик.

Бўрон юрак ютиб тоғага учрамоқчи бўлди-ку, тоғани ҳеч ерда учратолмади. Сўнг, «устахона», деб ёзиб қўйилган қизил вагон олдига бордик. Эшиги қулф экан.

— Кеч бўпқолди. Энди тоға устахонани очмайди. Унга билдириб ўтириш ҳам бекор. Бир иш қиласиз,— деди Бўрон, вагоннинг орқасидаги тепа туйнугига имлаб. Бу — кўчиб кетган ойна ўрни эди.— Шундан тушиб, керакли асбобларни шартта олмаймизми?

— Ҳазилингни қўй!— дедим, мени синамоқчи деб ўйлаб.— Үғирик қиласизми?

— Вой тентаг-эй!— деди Бўрон кула-кула елкамга уриб.— Асбобни еб қўярмидик. Ишлатамизу, тағин дарров жойига олиб келиб қўямиз-да.

У туйнукка қўл чўзиб кўрди, қўли етмади. У ёқ-бу ёққа аланглади. Ҳеч зоф йўқ. Нарироқда ювинди бочкадаги чиқин-диларни еб турган эшакка кўзи тушди. (Бу эшакни ҳам тоғанинг кулбасида кўрган эдим.) Эшакни қулогидан тортиб вагон ёнига олиб келди. Кўндаланг қилиб вагонга суюди-да, устига чиқиб, туйнукка бош суқди.

— Ҳаммаси есть! Аммо сиғмас эканман,— деди елкасини туйнукка тўғрилаб кўриб.— Чиқ, бу ёққа!

Ўзим, худди бирор келиб қоладигандай қочиш пайида турвдим, шундоқ бўлса ҳам, Бўроннинг буйруғига бўйсундим. Мени эшак устига тортиди. Эшак яғир экан. Яғирига оёғим тегиши билан, типирлаб юборди. Икковимиз ўмбалақ ошиб тушдик. Бўрон эшакни «тек тур, ҳаром ўлгур!» деб тепа-тепа тағин вагонга қапиштириди. Устига чиқдик. Бўрон мени бир амаллаб ўз елкасига чиқарди-да, вагон ичкарисига итарди. Ичи қоронроқ экан, билмасдан темирлар устига тушдим. Вагон ичи шарақа-шуруқ бўлиб кетди. «Секинроқ! Секинроқ!» деб Бўрон туйнукдан шивирлади ва менга керакли нарсаларни буюрди. Қўзимни қоронғига ўргатиб олиб, болта, аррача, омбур, ломларни узата бердим. Кейин Бўрон ихраб-сихраб мени тортиб олди. Икковимиз шоп этиб эшак устидан ташладик. Ташлашимиз билан, бирор:

— Тўхта, ўғирилар!— деб чинқирди-да, икковимизни ҳам мақкам тутди. Бу — Тоға эди. Бизни таниб қолди-ю қўзлари

ола-кула бўлиб кетди.— Ия, ия, бу қандоқ бўлди, жиянчалар! Сизлардан шў иш келдими! Етти ухлаб тушимга кирмаган-а! Қандоқ бўлди бу-а, Бўронбой!

Менинг қўйимни қўйиб юборди-ю, Бўронникини ушлаб турибди.

Зўр келгандан сўнг, Бўрон бор гапни айтиб қўя қолди: қудуқ очилаётганию бобой айтган топшириққача. Бўрон ўз гапидан ўзи дадилланиб, илтимосга ўтди:

— Сизни қидириб келувдик, тоға. Ўзингиз бориб ёрдам бера қолинг, бобой сўраб юбордилар.

Тоға чийиллаган товуши билан жеркиди: аввало, жиянча, бу бўлмағур қилингинг осонликча кечирилмайди. Иккиласмчи, унақа бефойда машмашаларга алақситма мени. Катта қурилиш билан банд одамман. Чўпонотага ҳам айт: хом хаёлни қўйсинилар. У ердан сув чиқади деб ўйлаш — ҳўқиз сут беради деб ўйлашдай гап.

— У ёғини сўрасангиз-чи, тоға...— деб Бўрон қудуқ очилаётганини айтиб юборай дёганди, мен оёғини босиб қўйдим. Бўрон ҳайтовур у ёғига ўтмади, лекин ялинини қўймади:

— Битта бора қолинг, тоға. Битта қарашсангиз ҳақингиз кетадими?

— Ялинма, устанинг бекорчи вақти йўқ. Бўлди,— деди пўписа қилиб тоға, кейин бирдан паст тушиб, кўзини қисди.— Текинга мушук офтобга чиқмайди, деганни эшитганмисан ўзинг?

Бўронга бу совуқ ҳазил ёқмади. Тоғанинг тиржайган афтига ҳам, асбобларига ҳам бошқа қарамай:

— Юр, кетдик!— деб мени судради.

Кетимиздан Тоға алланималар деб вайсаганча қолди. Мен Бўронга:

— Бобой ҳозирча қудуқни овоза қилмай туринглар, деган эдилар-а?— дедим.

— Кўрдинг-ку, қанақа пайтда қўлга туширди,— деди Бўрон, энди кулгиси қистаб.— Шошганда лаббай топилмайди, дейишади. Ёлғон тўқиёлмай қолдим-да, сен тўқиёлармидин?

Бу савол мени ўйлатиб қўйди: Бўрон шошганда ҳам, шошмаганда ҳам ёлғон тўқиёлмаса керак. Ҳа, ҳа! Мен-чи, мен? Ёлғон тўқиёлмаганимга яраша нега ростига ҳам кўчолмайман? Нима қилай? Султон амакига:

«Ойим сиздан аразлаган. Унга қолса мени юбормасди, Мен ўзим бекитиқча келавердим» дейми? Унда нима бўлади? Хафалиги ошиб, касали зўрайиб кетмайдими? «Ундей бўлса

хат ёзишм ҳам ортиқча, боришимнинг ҳам ҳожати йўқ» деб қолса-чи? Йўқ, йўқ, Султон амакини хафа қилиш мумкинмас, ҳеч мумкинмас!

## 16. ОВ

**К**еч бўлишига қарамай, посёлка сув қуйгандай жим-жит.Faқат дайди шамол вагонлар орасида фир-фир изғиб юрипти.

Бизнинг вагонда ҳам ҳеч ким йўқ. Салқин тушишини пойлаб Султон амаки яна трассага жўнаб кетган.

Вагон эшигига ўтиридм-ўтиридим, Султон амакидан дарак бўлмади. Қоронғи тушди. Движокни юргизадиган одам ҳам бўлмади. Изғиринда нафасим бўғилади, вагонга кираман. Ичкари баттар қоронғи, мени чўчитди, энди шамол бўри увла-гандай эшитилади Гоҳ-гоҳ вагон томини мушук тимдалагандай, ер қимирилаётгандай бўлади, юрагимни ваҳима босади. Ёт-сам билинмасмикин, дейман, баттар бўлади, уйқум келмайди. Ярим кечага боргданда ухлаб қолибман.

Султон амаки нонушта маҳали уйғотди. У қай вақтда келгану қай вақтда ухлаган — билолмадим. Унинг кўзларига яна кўпроқ қон қуилгандай, юзлари ориқлаб кетгандай эди. Шундай бўлса ҳам, ўзи хурсандроқ кўринарди. Чой ичиб ўтирганимизда, ўз ишидан сўз очди:

Насослар ишга туширилиб, ботқоқда ботган экскаватор юргазиб юборилганини айтди. Мен буни трассада ишлар юришиб кетибди, деб тушундим-да, пайтдан фойдаланиб:

— Иш тузалган бўлса, энди кетамизми? — деб сўрадим.

— Бир томони тузалгани билан иккинчи томони тузалгани йўқ-да, трасса оқсанб ётибди, — деб яна кўнглимни хира қилди. — Иннайкейин, телеграммага ҳам жавоб келсин-чи, — деб кўшиб қўйди.

Юрагим шув этиб кетди: «Қанақа телеграммани айтяпти?» Сўрасаммикин, деб турувдим, у:

— Қани, юр суриштирайлик-чи, — деб ўрнидан турди.

Хавотир ичидан чиқдим.

Султон амаки у ёқ-бу ёққа аланглади. Узоқдан Бўронни кўриб:

— Боря, бу ёққа! — деб чақирди. Бўрон яқин келиши билан, сўради: — Бугун почтальон сенми, бошқами?

— Бошқа. Яқинда келиб қолади, — деди Бўрон. «Иш бор», дегандай мени имлаб, изига қайтиб кетди.

Мен, Султон амаки буйруғи билан почтальонни кутиб қолдим. Почтальон қанақа хабар олиб келаркан, деб ҳам қизиқаман, ҳам хавотир бўламан. Ҳа деганда келавермади. Бўроннинг имлагани эсимга тушиб, юрагим сиқилди. Нима иши бор экан, деб олдига югурдим. У худди парадда юраётгандай катта-катта қадам ташлаб қудуқ тарафга кетаётибди. Шу кетишда: «бир, икки, уч, тўрт...» деб саняпти.

— Бу нима қилганинг? — дедим ҳайрон бўлиб.

— Мешат этмай тур, — деб қўл силкитди Бўрон. Нарироқ бориб, — юз!.. — деди-да, тўхтади. — Қани мўлжаллаб кўр-чи, бу ёғи қанча келади? — деди қудуққача қолган масофани кўрсатиб.

— Нимани ҳисоблаяпсан ўзинг? — дедим, ҳеч нарса тушунломай.

— Қудуқ билан бостирма ўртасидаги масофани, — деди у Қўлдошларнинг бостирмасини кўрсатиб.

— Нима учун?

— Сув келтириш учун. Ҳазил деб ўйлаяпсанми? — Бўрон жиддий сўзларди: — Қудуқда сув етарли экан, эрта билан текшириб кўришибди. «Унга мотор ўрнатиб сув чиқарсак бўлади», деяпти бобой.

— Ростдан-а? Йўлни нега ўлчаяпсан бўлмаса?

— У ёғини кейин биласан. Қани, юр, — деб Бўрон яна боягича қадамлаб кетди. — Бир, икки, уч, тўрт...

Қудуққа етдик. Бобой аллақаёқдан отга тахта, асбоблар ортиб келиб, икки бола билан туширади.

— Ҳаммаси уч юз қадам чиқди, бобо, — деди Бўрон.

— Ҳа, ҳа, — деди бобо қаддини тиклаб, — сенинг қадамингни метрга айлантирасак, икки юз чиқар-а? Демак, шунча ингичка қувур керак. Қаердан оласанлар, буни?

— Топамиз, деди-ку ўзимизнинг механик.

— Қайси? Э, ҳа, ўзимизнинг Қўлдошми? Дарвоҷе, у темир-терсакка ўч кўринади. Қани энди қувур топилса-ку чакки бўлмасди. Бола пақир ҳам сув ташиш азобидан қутуларди. Колаверса қўни-қўшниларга ҳам нафи тегарди. Бироқ, тоғасининг қаттиқлиги бўлса, қувур ундириш амри-маҳолдиров!

— Мен ҳам шуни айтган эдим, Қўлдош: «Ўндирамиз, уйга водопровод оборишимизни билса, тоғам қувурни ер тагидан бўйласям топиб беради», деди.

Гап нима устида бораётганига энди тушундим. Лекин бу иш аввал кимдан чиққанини билолмадим.

— Топиб берса бўпти,— деди бобой. Қейин тахтани қарич билан ўлчаб, арралашга тушиб кетди.

У, Тоғанинг ёрдам бермаслигига қўзи етиб, ўзи устачиликка киришган, қудуққа янги қолқоқ ясаётган эди. Бўрон унга боқиша кетди. Бошқа болалар, бобойнинг маслаҳати билан қудуқ ёнига йирик тошларни тўплай бошлади. Мени ҳам энди «миттивой» деб масхара қилмасдан, камситмасдан, ёнларига қўшишди. Бобой мени, «мехмон бола», деб сийлаганиданми самоварчиликка қўйди.

«Офтоб ўчақ»ни олиб келдим-да, чой қайнатдим. Юмшоқ кум тепасига ёнбошлаб, чой ичдик. Яна ишга тушиб кетдик. Иш қизиб турган вақтда Бўроннинг суратга тушгиси келиб қолди, фотоаппаратни келтирасан деб қўймади. Саҳрона келганимдан бери ўзимнинг ҳам эсимга энди келди. Бўроннинг қўнгли учун фотоаппаратни олиб келдим, болаларни ҳар хил туришда суратга олдим. Шу вақт бир халта нарса кўтариб Қўлдош келди. Бўрон уни ёнига чақирди. Иккаласи бир-бирининг елкасига қўл ташлашиб суратга тушиди.

Қўлдош бобойнинг олдига халтани ағдарувди, ундан тарақлаб темир асбоблар тушиди.

— Қанақа асбоблар булар, ўртоқ механик?— деб болалар Қўлдошни ўраб олишиди.

Қўлдошнинг айтишича, булар водопровод қурадиган асбоблар экан.

— Мана буни «клубик»— дейди — резьба кесадиган. Мана буни «муфта» дейди — икки қувурни бириктирадиган фидиракча.

— Анави қисқичбақага ўхшагани-чи?— деди бир бола тунукасозлар қайчисига ўхшаш асбобни кўрсатиб.

— Муфтани бураб маҳкамлайдиган ключ бу,— деди Қўлдош. У билағонлардай ишонч билан гапиряпти. Чиндан техник бўладиган кўринади.

Хуллас, керакли ҳамма икир-чикирни қолдирмай олиб келган эди.

— Қуруқ асбоблар билан нима иш битади?— дейишди болалар.

— Сеники, бўтам, афандининг ишига ўхшади,— деди кулиб бобой.— Афанди эшак олмасдан бурун ҳовлисига қозиқ қоқиб қўйган экан.

— Қувур ҳам бўлади, кўрасиз,— деди ишонтириб Қўлдош.

Қайтайдан Бўроннинг қулоғига пичир-пичир қилди. Нимани пичирлаётган экан? Мабодо телеграммани гапираётган

бўлса-я, деб юрагим шиг этиб кетди. Бўрон, «салдан кейин», деб уни жўнатди. Бир оз ўтгач бобойга алланима деб шивирлади. Бобой «майли» дегандай бош силкитди. Бўрон, «кетимдан юр», деб мени имлади-да, чайлага жўнади. Кетидан бордим. Чайлада Бўрон қўлига брезент қўлқоп кийди. Тепадаги дордан бургутни ечиб олди-да:

— Овга кетдик,— деди.

Севиниб, ёнига тушдим. Кетимдан бўлса Лайка эргашди. Кечадан бери мени кўрмасдан соғинган экан. Ҳайдамадим. Анчагина юрдик. Қуриган, қамишли кўл келди. Ундан ўтдик. Қовжираган ўтлоқда сигир, қўйлар подаси кўринди. Берироқдаги қовжираган ўтлоқда Қўлдошнинг бир ўзи эчкисини боқиб юрган экан. Бизни кўриб:

— Бу ёққа, бу ёққа!— деб қичқирди.

Бордик. Бўрон бургутни оёғидаги чилвирдан ажриқقا боғлаб қўйди. Ўзи эчки ўтлаб юрган жойнинг атрофларини айланди. Янтоқзорларга оралади. Алланарсанинг изини топгандай ерга тикилиб-тикилиб қўярди. Оғзи қулоғида, олдимиэга келди-да, Қўлдошга «бўлди», деб кўз қисди.

— Нима бўлди?— дедим.

— Тек туравер, ҳали замон кўрасан,— деди сирли қилиб Бўрон. Эчкини ўша ўзи текшириб чиқсан жойга яқинроқ олиб бориб қўйди.— Энди бери келинглар,— деб бизни бургут олдига бошлади. Қамиш соясида ўтиридик. Бўрон, нима қилмоқчи бўлганини энди айтар деб турибман. Ў бўлса, бургутга мағиз едира туриб, уни мақташга тушди. Унинг ҳушёрги, олғирлиги, кучлилигини шундай мақтадики, худди одамга ўҳшатиб юборди. Ҳайвонот боғига топширган кийик боласини шу ерда шу бургут билан тутганини нақ ҳовлиқиб, қўпириси ҳикоя қилди. Биз жуда берилиб эшитаётган эдик, бирдан Лайканинг вовиллагани эшитилди. Қарасам, у эчки яқинида, янтоқлар орасида ўйнаб юрган экан.

— Чақир, секин чақир!— деди Бўрон.

Мен ҳуштак чалдим. Лайка эшитди. Янтоқзордан чиқиб, қулоғини диккайтириди. Қўлим билан имладим. Бошқа вақтда югуриб келган бўларди. Ҳозир негадир келгиси йўқ. Жойидан сал бери жилдию, яна орқасига қараб бўйини чўзди. Ҳуриб қўйди.

— Алланарсанинг исини олганга ўхшайди қурғуринг,— деди овозини пастлатиб Бўрон.

Уст-устига қаттиқ ҳуштак чалдим. Лайка жаҳлим чиққанини билди. Ўн-ўн беш қадам бери келди-да, тағин қайтиб

кетди, ириллади. Бўрон бургутни елкасига қўндириб олди-да, қўрбақадай эмаклаб кетди. Дўнгроқ жойга кўтарилиб ер қа-пишиб олди. Мушук сичқонни пойлагандай, Лайка билан эчки турган ердан кўз узмади. Бургут ҳам, эгасининг фикрини бил-гандай ўткир кўзларини ўша ёққа қадади. Менинг сабрим чи-дамади. Сургала-сургала, Бўроннинг ёнига бордим. Қўлдош ҳам борди.

— Нима пойлаяпсан ўзинг? — деб сўрадим.

— Жим! Ётларинг! — деб қўлини силтади Бўрон.

У тикилган томонга мен ҳам тикилдим. Бир вақт Лайкам қаттиқ вовиллаб, эчкини қувиб қолди.

— Есть, Лайканг молодец! — деб Бўрон шартта ўрнидан турди. Турди-ю, бургутнинг оёқларини бўшатди-да, баланд кў-тариб эчки қочган тарафга силкиди.

Бургут, соябон қанотини вар эткизиб ёзганча, самолёт-дай уча кетди. Янтоқзор устига борганда сал пастлади-ю, бўйинни илондек эгиб бир нимани қидирди. Дам ўтмасдан «ов»ини кўрди шекилли, бирданига тошдай пастга отилди. Шунда мен, Лайкага чанг соладими, деб қўрқиб кетдим.

Бўрон ўша томонга чопди. Кетидан Қўлдош билан мен ҳам.

Бир вақт янтоқлар орасида бургутнинг патир-путур қила-ётганини кўрдик. Яқин борсак, бургут бир ҳайвон билан оли-шиб ётибди. Бу аждаҳодай бадбашара, қўпол, одам чўчийди-ган махлуқ эди. У типиричилаб бургутнинг кучли чангалидан чиқиб қочишга уринар, бесўнақай панжалари, йўғон думи билан бургутни ураг, янтоқларни шитирлатиб сургаларди. Лекин бургут бўш келмади. Бигиз тумшуғи, ўткир чанглари билан ҳайвонни хўб эзғилади, кўзларини ўйиб, баданларини тилиб ташлади.

— Бўлар,— деди Бўрон, Қўлдош билан янтоқзорга кириб.

Мен ҳам кетидан бориб, берироқда тўхтадим. Бўрон, қа-нотини патирлатиб ётган бургут устига дадил борди. Бир ни-малар деб, брезент қўлқоплари билан таппа бургутни босди. Бургут эгасини кўриши билан дарров жаҳлидан тушди. Ин-дамай Бўроннинг қўлига қўнди. Бўрон бизга:

— Уринглар эчкимарни,— деди.

Шундагина билибман бу хунук ҳайвоннинг нималигини.

Қўлдош тош топиб келиб, эчкимарга ота бошлади. Мен ҳам қўлимга дуч келган нарсани итқитавердим.

— Қани энди судраларинг. Тоганинг олдига олиб бориб ташлаймиз,— деди Бўрон.

Қўлдош югурга бориб эчкининг бўйнидаги арқонни ечиб

келди. Сулайиб ётган эчкизмар олдига тап тортмасдан борди. Унинг йўғон белидан арқон ўтказиб боғлади. Арқоннинг бир учини ўзи ушлаб, бир учини менга тутқазди. Икковимиз сургай бошладик. Ўлғудай оғир экан. Янтоқларга илиниб баттар оғирлашди. Амаллаб янтоқзордан олиб чиқдик-да, қумдан судраб кетдик. Лайка бўлса, боягича эчкини ҳайдаб кетяпти. Энг олдинда Бўрон, бургутнинг титилган патларини текислаб, тумшугини артиб, мағиз едириб кетяпти.

— Қалай, Дамир, овимиз жойида бўлдими? — деб қўяди у, менга маъноли қараб.

— Ҳа,— дейман. Қўлдошга қарайман.— Яхши бўлди-я?

Қўлдош ишшаяди. Шундоқ ишшаядики, оғзи қулогига етгудай бўлади, юзидағи ямоқлари буришиб кетади. Бунақа қилиб ишшайишини энди кўришим эди.

Мана ҳозир Тоға олдимиздан чиқади. Катта ов қилиб келаётганимизни кўриб қойил бўлади. Бизга раҳмат ҳам дербалки. Биз «ов»ни унинг оёғи остига ташлаймиз. Шунда у нима деркин? «Қўлдошни бекорга хафа қилиб юрган эканман», дермикин деб ўйлаб бораман.

Аксига, Тоға йўқ экан. Бўрон «ов»ни бостирма эшигига кўндаланг қилиб ташлади. Қўлдош, эчкини сугориш, товуқларни донлатиш учун қолди. Биз чайлага кетдик.

## 17. «ЕНАР ДАРЕ»НИНГ ОҒЗИ

**Б**ургут билан Лайкани чайлага қўйдик. Овқатланиб олдик-да, қудуққа шошилдик. Қудуққа яқинлашиб борганимизда, орқамиздан бир юқ машинаси келиб тўхтади. Кабинада Вася, тепада Қўлдош.

— Газқайнарга боргиларинг келса, юринглар,— деди Қўлдош.

— Нимага?

— Вася акам газ қувурларини пайвандлаш учун электрод олиб келмоқчи, ўша ердан ингичка қувур ҳам олиб келамиз. Тоғам буюрди.

— Ўша тоғанг-а? — деди ажабланиб Бўрон.— «Қудуқдан сув чиқмайди, бу ерларда сув чиқади деб ўйлаш — хўкиз сут беради, деб ўйлашдай гап», демабомиди!

— Сув чиққанини ҳамма кўрди-ку. У ҳам кўриб ишондида. Ўйимизга сув келаркан, деб хурсанд бўлди. Газқайнараги танишимизга қувур сўраб илтимос хати ёзди-да, Султон акадан қўл қўйдириб олди. Шунга кетаяпмиз. Юринглар, томоша қилиб келамиз!

— Мен кўрганман Газқайнарни. Сен бора қол,— деди Бўрон менга.

Узим қизиқиб юрувдим. Ҳеч нарсани ўйламасдан Қўлдошнинг ёнига чиқдим.

Қўлдош хурсанд кўринади. Мен ундан, «нечук тоғанг жавоб бера қолди», деб сўрамоқчи эдим, ўзи гап бошлади:

— Қизиқ бўлди, Дамир. Сенлар кетдиларинг-у, тоғам келди. Чайла эшигига эчкимарни кўриши билан капалаги учиб «ва-а» деганча ўзини орқага ташлаб юборди. Кейин туриб, кўкрагига «туф-туф» қилди-да, «буни ким олиб келди?» деб дўқ урди. «Ов» қилиб келдик десам ишонмади. «Ҳозир Бўрон билан Дамирни чақириб келай, ўzlари айтиб беришсин», дегандим. «Бўлди, бўлди. Бўроннинг қўлидан ҳар бало келади» деди. «Тулкини тутган, югурик кийикни қўлга туширган, буни тутолмайдими!» деди. Маъраб ётган эчкининг эмчагини ушлаб боқди. Тирсиллаб турганини кўриб, кулиб қўйди. «Майли, фалокатимиз арибди. Энди эчкини подаға қўшганимиз маъкулга ўхшайди», деди.

— Баҳона билан эчки боқишдан қутулибсан. Қалтак ҳам емайдиган бўпсан-да?

Қўлдош, ори келиб бўзарди. Кўнглида, қалтак еганимни ҳеч ким билмайди деб юрган экан-да. Энди уялмай қўя қолсин, деб гапни бошқа ёққа бурдим. Газқайнарда қанақа танишлари борлигини сўрадим.

— Қурбонов. Илгари бизнинг колхозда инженер эди. Ҳозир Газқайнарда инженер. Номи чиққан. Боргандা кўрасан,— деди.

Машина қум саҳроси ўртасидан ғизиллаб чопарди. Бир вақт олдимизда милт-милт қилиб оқ уйлар кўринди. Улар анча экан. Тепасида баланд-баланд темир миноралар.

— Газқайнар дегани шу. Газчилар шаҳарчаси,— деди яқинлашганимизда Қўлдош.

Қум саҳросида шаҳар? Чиндан-а? Ҳа, ҳа чиндан! Ҳалиги на кўзимизга жимитдай кўринган оқ уйчалар баланд, кўп қаватли, сонсиз деразали иморатлар экан. Бу ерда ҳам бизнинг шаҳардагидай асфальт кўчалар бир-бирини кесиб ўтган. Улардан ҳар ёққа ёғоч, тахта, қувурлар қоп-қанорлар ортган машиналар ғиз-ғиз ўтиб турибди. Одам бўлса, ундан кўп. Булар бизнинг шаҳардаги одамларга ўхшаб яхши кийинишган бўлса ҳам, лекин ҳаракатлари тезроққа ўхшайди: кўчалар, магазинлар, ошхоналар, яна аллақанақа биноларга шошилганча кириб-чиқишиди, йўлакларда бир-бирларини қувишиб

кетаётганга ўхшайди. Нега шунақа десам, шамол ҳаммани шошилтираётган экан. Бу шаҳарда ҳам, худди саҳордаги каби ҳавони қум зарралари босган, асфальтларда ҳам қум кукунлари худди тумандай сузив юрибди.

Тушив шаҳарни томоша қиласиз, деб турсам Вася машинаси тўхтатмади. Бир зумда шаҳарчадан яна саҳрога чиқиб кетдик.

— Ана, ана, оловли кўл! — деди бирдан ҳовлиқиб Қўлдош.

Чап ёққа қарадим. Офтобда жимирилаб кўл кўринди. Берироқдан бўлса негадир одам ўтмасин дебми, сим билан тўсиб қўйилибди. Кўл устида милт-милт этиб тутунми, алангами кўтарилиб турганга ўхшайди.

— Билдингми, газ ённати! — деди менга уқтириб. — Бу ерларда ҳар қадаминг ости газ. Кўл тагидан ҳам газ отилиб чиқсан...

— Бўлмаса Вася акангга айт, тўхтасин, — дедим мен қизиқиб, — тушиб кўрайлик!

— Э, яқинига йўлаб бўлармиди, ловиллаб ёниб ётибди-ку!

— Ўзидан-ўзи қанақа қилиб ёнади?

— Болалар ёндиришган буни! Баҳорда биз, кўлдан газ отилиб чиқаётганини кўргани келган эдик. Шунда бир бола қани ёнадими, йўқми деди-да, қоғоз ёқиб ташлаворди. Тўсатдан сув бети аланга олиб кетди. Шамол елиб турган эди, алангани бизга қараб урди-ку. Эҳе, қий-чувни кўрсанг. Биттасининг кўйлаги, биттасининг шими куйган. Қизларнинг рўмоли, сочиға ўт кетган. Шунда мен яқинимдаги боланинг ёнаётган кўйлагини тортқиласман деб, аланга юзимга урганини билмай қолибман. (Ҳа, Қўлдош бечоранинг юзидағи ямоқлар шундан экан-да!)

Ҳикояга берилиб, каттакон бир минора тагига келиб қолганимизни билмабман. Машинадан тушдик. Эҳе, уни қаранг.

Боя узоқдан минораларга кўзим тушганда бу ерларда катта бинолар қурилаётган экан, деб ўйловдим.

Тошкентда Чилонзор қурилишига экспурсия қилганимизда, юқори қаватларга фишт чиқараётган кранларни кўрган эдим. Йўқ, бу бошқача минора экан — газ қудуғининг минораси! Бу темир минора шунча баланд, шунча ҳайбатлики, оғзинг очилиб қолади. Тагидаги кенг майдонда машиналар фув-фув юриб турибди. Улар хилма-хил, антиқа. Бола бўлиб бунақасини кўрган эмасман. Қувурларнинг кони ҳам шунда: катта-кичик, йўғон-ингичка — қалашиб ётибди. Ҳа, Тоға қув, билиб юбор-

ган экан. Мен пастдаги нарсаларга алақсиб турсам, Қўлдош туртди:

— Анави акробатчини кўряпсанми?

Ҳамманинг кўзи минора тепасида. Мен ҳам қарайман деб дўппим тушиб кетди. У ерда комбинезонли бир йигит худди циркдаги акробатлардай чаққон ҳаракат қиласади. Миноранинг у шотисидан бу шотисига капитардай лип-лип ўтади. Пастдагиларга кўли билан бир нарсалар деб имо қиласади. Машиналарни айлантираётган, қудуққа қувур тушираётган, яна алланима қилаётганлар унинг имосига қараб ишлашади. Худди у дирижёру, пастдагилар музикачи. Бу йигитча киму, нега ҳамма унинг айтганини қиласади, деб ўйлаб турувдим:

— Инженер Қурбонов,— деб қўйди Қўлдош.

— Кимни айтаяпсан?

— Уша акробатчини-да,— деди тепадаги йигитни кўрсатиб.— Бизнинг қишлоқлик Али полвон.

— Ия,— дедим ҳайрон қолиб,— кичкинагина-ку? - Полвон эмиш!

— Гавдасига қарама, ука,— деди гапимизни эшитган Вася.— Али Қурбонов курашда, боксда кўпларни енгган. У билан биз олимпиадада куч синашиб танишганимиз — ҳақиқий чемпион!

Кейин Вася Қурбоновга «Аливой!» деб бақирди. Машиналар гулдуросида эшитмади. Вася дастрўмолини силкитди. Ана кўрди. Қўриши билан минорадан тез-тез тушди-да, югура келди. Икковлари кучоқлашиб, бир-бирларини кўтариб қўйишиди. Шунда афтига кўзим тушди-ю бақрайиб қолдим. Тунов куни автобусда кўрганим қизиқчи йигит-ку! Уни артистми деб юрсам, бунаقا ҳунари ҳам бор экан! Бу ердагиларнинг ўзи ҳам, иши ҳам қизиқ экан-да шунаقا!

Али Қурбонов мени кўрган заҳоти қошларини кериб:

— Э, офарин,— деди,— қандай қилиб келдинг? Отинг нима эди? Ҳа, Дамир?

Бизнинг таниш чиқиб қолганимизга Вася, Қўлдош ажабланишди. Вася менинг ҳақимда унга яна гапириб берди.

— Офарин, офарин! «Ёнар дарё» қаҳрамонининг ўғли! Султонбой оғайним, ҳамкасабам бўлади. Биз у билан бирга ўқиб, чўлда бирга кезганимиз. Бардамми, соғми? Мендан қоп-қоп салом айтиб қўйгин дадангга, хўпми?

Султон амакини сансирағ гапирганидан бу йигит энди кўзимга каттароқ кўриниб кетди.

Вася келишининг сабабини айтиб, адам қўл қўйган қофозни узатди. Али чемпион қофозга кўз ташлади-да, дарров:

— Ҳамкасабаларнинг илтимосини қайтариб бўлармиди. Қани, юрингларчи,— деб кабинага кирди. Биз кузовга чиқдик.

Машинамиз бояги олов кўл яқинидан ўтиб шаҳарчага яқинлашганда, қаршимиздан биттаси от чоптириб келди. Тўп-па-тўғри машинамизга қараб тасира-тусур босиб келяпти. Қанақа довюрак отлиқ экан-а? Ана, ҳозир машина отни одам-помами билан мажақлаб кетади, деб нақ ваҳимага тушиб боряпман. Охири Вася ҳам қўрқди-да, тормоз берди. От шундоқ машина тумшуғига келганда таққа тўхтади. Биз бўлсан қалқиб, тепадан учиб тушай дедик. Ҳарасак, отлиқ ким экан денг — Бўрон!

— Ҳой, чавандоз, нима қилиб юрибсан от чопдириб? Нега келдинг ўзинг?— деймиз ҳаммамиз унга бақрайишиб.

Бўрон чиндан ҳам чавандозлардай қорабайир устида қийшиқ ўтириб, чайқаларди. Гапираман деб гапиролмас, энтикарди. От эса сапчиб қочмоқчи бўлар. Бўрон жиловини қаттиқ тортиб турса зўр бериб ўйноқлар, машинани гир айланарди. Анча йўлдан чопиб келгани учун отнинг сағриси терга ботиб, чови кўпирив кетганди. Ҳадеб пишқирар, бурун катакларини кериб ҳансираради.

Бўрон бир амаллаб отни машина ёнига ўнглади-да:

— Қани, мингаш!— деб менга қўл чўзди.

— Нега энди?

— Негалигини кейин биласан,— деб мени улоқчидай тортқилади. Қўймасдан орқасига мингаштириди-ю, ҳеч нарса демасдан, отга қамчи босди. Машинадагилар ҳайрон бўлишганча:

— Қаёққа, ҳой Бўрон! Тўхтаб тур!— деб бақиришиб қолди.

Қорабайир учирив кетди. Мен ағанаб тушай дедим-у, Бўронга ёпишиб белидан маҳкам қучоқлаб олдим.. Кетимиздан машина қувиб келаверди. Вася билан Қўлдош алланима деб бақиришарди, сўзларини от туёғининг тасир-тусури, машина-нинг гулдур-гулдурида тушуниб бўлмасди.

— Тўхтат, Бўрон, тўхтата қолсанг-чи! Қаёққа шошиласан, ўзинг?— дейман, Бўроннинг қамчи тутган қўлидан тортиб.

Бўрон қулоқ солмайди, қўлинни силтаб тортади. Отини тобора қаттиқроқ чоптиради.

— Нима бўлди, Бўрон? Гапирсанг-чи, ахир!— дейман хубnob бўлиб.

- Нима бўларди! — дейди ҳаллослаб Бўрон.—Даданг, «отга мину, Дамирни топиб ўнгариб кел», деди.
- Нима иши бор экан?
- Нима иши б-бўларди! Ўзбошимча ўғлининг таъзирини бериб қўймоқчидир-да!
- Ҳой, нималар деяпсан, ўзинг?
- Сени бунақа деб ўйламовдим. Билганимда, ўртоқ бўлиб, шунча кетингда юрмасдим!

Бўрон чопиб кетаётган отни жаҳл билан қамчилади. От, пойга чопгандай, шамол бўлиб учди. Мен бўлсам ҳар интилганда юмалаб кетай дейман. Ҳамма ёғимнинг оғриғига чидолмайман. Шундоқ бўлса ҳам билдирамасдан, Бўронга маҳкамроқ ёпишаман. Нега Бўрон аччиғланяпти? Султон амаки нима учун мени бунақа қисталанг билан чақирдийкан? Бўлди! Телеграмма келган, телеграмма! Ойимдан, ойимдан! Сир очилди. Бўлганимча бўлдим. «Ёнар дарё»да куним битди энди!.. Телеграммада нималар дейилган экан-а? Султон амаки мени қандай кутиб оларкан ҳозир? «Сен ёмон бола чиқдинг. Бунақа болани ўғил қўлмайман», деса-я! Унда нима қиласман?

Посёлкага яқинлашяпмиз. Орқамиздан машина гулдуроси эшитилди, у ҳадемай бизни қувиб етди. Утиб ҳам кетди. Утаётганда қарасам, кабинада Вася билан Қўлдош кўринди. Қўлдош мағурурлик билан бизга: «Қойил қолларинг. Чавандозларни ҳам орқада қолдиридик-ку!»— деб бақирди ва қўл силкиб ўтди. Кузовда қувурчалар, яна аллақандай темир-терсаклар шақирлаб борарди.

Бўрон, машинага етиб оламан деб от жониворни шунча қамчилади-ю, лекин етолмади.

## 18. ЕР ЮЛДУЗЛАРИ

**Б**ўрон отни чайла устунига боғлади-да, йўлга чиқди. Фира-ширада узоқдан посёлкага қарайман. Вагонлар қорайиб ўшшайиб кўринади.

— Қаёққа кетяпмиз?

Бўрон жавоб бермади.

Яқинимизда ёнбошига «медицина ёрдами» деб ёзилган енгил машина кўринди. У посёлка томонга ўтди. Сал юриб тўхтади. Кабинада ўтирган хотин бизни имлади. Олдига борганда танидим: Султон амакини боқиб юрган доктор опа. Бўрон унга ҳозир посёлкада ҳеч ким йўқлигини, ҳамма трассага кетганини айтди.

— Сенинг даданг ҳам-а?— деди доктор опа менга тикилиб.— Роза ишонган эканман-а. Эрталаб келиб вагондан на дадангни топдим, на сени. Дадангга қараб тур, демабидим? Дайдиликдан бўшамаяпсан дейман-а? Ҳозир дадангни топамизу, машинага ўтқазиб кетаман. Тошкентга жўнатамиз. Бирга кетасан.

Мен чурқ этмадим. Машинага ўтирилди. Бўрон йўл бошлади. Доктор опа яна менга деди:

— У ёқда ойинг ҳам пойлаб ўтиргандир-а хавотир олиб? Үзи келмаганига ҳайронман. Дадангнинг касалини билармиди? Е ойинг ҳам ўзингдақа бепарвоми?

Унинг сўзи бўлинди. Узоқдан кўзимизга ялт-ялт этиб нурлар кўринди. Ҳайрон бўлганимизни билиб, Бўрон:

— Юлдузлар учяпти,— деб қўйди.

— Пастда-ку?— деди доктор опа ишонмай.

— Тўғри, пастда учяпти. Буни қурувчилар: «Ер юлдузи» деб аташади.

Бу ердагилар ҳамма нарсага ўзларича от қўйиб олишган экан: «Ёнар дарё», «Фидираб юрувчи посёлка», «Офтоб ўчоқ», «Мўъжиза қудуқ», «Газқайнар», яна алланарсалар.

Яқинлашганимиз сари юлдузлар кўпайди. Улар чанг ё туманга аралашиб учқунларга айланди. У ерда одамлар гулхан ёқишаётгандир деб ўйладим. Бирдан гулдурос эшитила бошлиди. Икки проJECTор қуёшдай ўткир шуъла сочиб, ҳамма ёқни ёритди: кундузи «Газқайнарда кўрганимдан ҳам каттароқ « завод»; ичига одам сифадиган йўғон қувурлар, антиқа машиналар... Пастга тушдик. Бўрондан:

— Бу ерда нима бўляялти?— деб сўрайман. Жомакор кийган одамлар орасидан Султон амакини қидираман.

Бўрон менга жавоб бергиси келмайди, гулдуросда овозимни эшитмайдиям. Бу ерга доктор опанинг ҳам биринчи келиши экан. Аланглаб ҳайрон бўлиб қолди.

— «Ёнар дарё» колоннаси ҳаракатда!— деди Бўрон доктор опага бақириб. Қейин антиқа машиналарни бир чеккадан кўрсатиб кетди: бир хил машиналар йўғон қувурларни ўз қанотида кўтариб турибди. Бир хиллари қувуррга суюқ мум суркаб, устидан сариқ қоғоз ўрайти.— Анави, қувур устида чинқириб кетаётганини «йўрга» дейишади.

Жуда ғалати машина: қувуррга маҳкам миниб олган. Унинг темир парраклари фир-фир айланяпти, ўткир темир тирноқлари қувурнинг зангини қириб ярқиратиб, учқунлар сочиб боряпти.

Тутун, резинка, мум, яна алланималарнинг ҳиди қўшилишиб, кишининг димоғини ачитади. Прожектор билан машиналарнинг ҳарорати эса ҳамма ёқни кундузгидай иситиб юбориби.

Иссиқ, чанг, шовқинда одамни одамдан ажратиш қийин. Бунинг устига, кўпчилиги катта қора қўзойнак тақиб олипти. Улар бир-бирлари билан соқовлардай имлашиб, туртишиб гаплашади. Уларнинг бу ҳаракатларидан мен ҳеч нарса тушунолмайман. Бўрон олдимизга тушиб ўзича ҳали у, ҳали бу машинани кўрсатиб, тушунтириб кетяпти. Доктор опа бўлса, энди унинг сўзларига қулоқ солмай, Султон амакини қидиряпти. Кўзим Ваёяга тушди. У, қўлида аллақандай асбоб, бир машинанинг ёнига энгашиб олиб, чарс-чурс элеќтру учқунлар сачратяпти. «Пайвандлаш деб шуни айтармикин?» Унинг яқинига бориб, Султон амакини сўрайман, у эшитмайди.

Ана шу вақт ҳамманинг кўзи ўртага келган янги кўк автобусга тушди. Одамлар: «Телевизор! Телевизор!» деб қичқириди. Телевизор нима қилади бу ерда? Автобусда ҳар хил аппаратлар кўринди. Яхши кийинган ёш йигитлар автобусдан ўт ўчирувчиларнинг насосларига ўхшаган асбобларни тушириб, у ёқ-бу ёққа тўғрилай бошлишди. Уларнинг нима қилаётгани билан ортиқча ишим йўқ, доктор опага аланглайман. Опа бўлса «Йўрга»нинг олдига бориб қолиби. У, «Йўрга» устида Васяга ўхшаб, машинанинг бир ерини пайвандлаётган кишига бақирияпти. Яқинроқ бориб, у кишига тикиламан: Султон амакими? Худди ўзику! Унинг терлаб, қурум босган юзлари электр нурида чўяндай ўйлтирайди.

— Тушинг, ўртоқ инженер! Ким рухсат берди ишлашга? Мумкинмас. Тушинг ҳозир!— деб доктор опа жеркияпти.

— Ҳозир, ўртоқ доктор, ҳозир,— деб Султон амаки илжайди-ю, пайвандлаш асбобидан кўз узмайди.

— Сизга айтилман, ўртоқ касал. Рухсат бермайман. Яна тағин кўзойнаксиз-а! Сизга кўзойнаксиз ишлаш у ёқда турсин, кўчага чиқиши мумкин эмас! Қандай қулоқсиз одамсиз?! Түшинг-э, ҳозир!— деб доктор опа баттарроқ қичқирди.

— Ҳозир, ҳозир,— деди Султон амаки томонги қирилиб.

Мен ҳам унинг аҳволига ачиниб кетдим:

— Ада, қўя қолинг!

Шунда унинг кўзи менга тушди.

— Бормисан, ўғлим! Ҳозир битади. Томоқ қақраб кетди. Менга сув олиб кел-чи. Ана у ердан...

Кўрсатган томонга чопаман. Прожектор турган кўчма

электр станция супасида катта бочка. Бўрон ўша ерда. У қувурга ўраладиган сариқ қофоз парчасидан «стакан» ясаб, сув олиб беряпти. Башараларига мой суркалган, кўзлари мильмилт йилтираган йўғон, ингичка йигитлар сувни ичиб, унга раҳмат деб кетишяпти. Вася ҳам келиб сув ичди-да, менга:

— Дадангни кўрдингми? Молодец-а! Қувур тозалаш машинасини юриб турган жойида тузатяпти. Ҳеч кимнинг қўлидан келмайди бу,— деди.

— Хавфли иш қиляпти. Бош инженер ҳаммамизга хавфсизлик қоидасини ўргатади-ю, ўзи бузяпти,— деди сув ичаётганлардан бири.

— Хавфли бўлсаям, қоида бузилсаямки, иш тўхтамасин деяпти-да!— деди иккинчи йигит.

— Аввал бунинг ремонтини Тоғага ишонган эди. Қарайдики, Тоға ўз тириклиги билан овора бўлиб, ишимиизни сургаб юборадиган. Кейин Тоғани ишдан четлатди-да, ўзи уннаб кетди ремонтга...

Бўрondon каттароқ «стакан»да сув олиб, Султон амакига обориб бердим. Сувни ичиб, «баракалла» деди-да, яна буюрди. Бу галги келтирган «стакан»имни доктор опага узатди. «Стакан»ни бир кўтиришда симирган доктор опа:

— Сувдай сероб бўл,— деб қўйди менга. Яна Султон амакига илтимос қилди.— Бўлди, ўртоқ Арслонов, тушинг!

— Ҳозир, мана ҳозир,— деб Султон амаки пайвандлаш асбобини машинага яна бирпас тутиб турди. Шунда бирдан боши эгилди-ю, «иҳ!» деб «Йўрға»дан ағдарилиб тушди. Одамлар ўрнидан турғизишиб қўйишиди. Султон амаки қўллари билан қўзини бекитиб олди.

— Ана, ана, айтмадимми сизга, айтмадимми ахир!— Доктор опа Султон амакини четга етаклади. Қуйиб-пишиб сўради.— Бошингиз айландими? Учқун тегдими қўзингизга?

Султон амаки қўзини очолмаёди. Ихраб, туртиниб юрарди. Бир қўлтиғига мен ўтдим.

— Қаттиқ оғрияптими, ада?

— Қўрқма, ўғлим, салгина, салгина,— деб ўзини босишга ҳаракат қилди. Аммо нафас олишидан қаттиқ оғриётгани сезилиб турарди.

— Одамлар тўпланди. Ҳамма ҳар ёқдан аҳвол сўрарди:

— Нима бўлди, ўртоқ бош инженер! Қўзингиз лат едими, ўртоқ Арслонов? Э, аттанг, ўзингизни эҳтиёт қилсангиз бўлмасмиди!

Доктор опа бўлса у одамларга:

— Арслоновнинг касаллигини билардиларинг. Олдинроқ қайтаришларингиз керак эди!— деб зарда қилди.

— Қайтардик, неча карра қайтардик. Қулоқ солмади-лар-да.

— Бўлар иш бўлди. Қани, четроқ чиқинглар. Ураманглар! Ҳаво керак!— деб доктор опа одамларни нари итарди. Сумка-сидан еллиғич чиқариб, Султон амакини елпий-елпий машинасига етаклаб келди. Султон амаки билан мени машинага ўтқизди. Лип этиб Вася билан Бўрон ҳам чиқиб олишди. Ке-йин Вася ёрдамида доктор Султон амакининг юз-қўлларини ювиб артди. Қўзига дори қуйиб дока билан боғлади. Энди Султон амаки докторнинг айтганларига индамай кўниб турарди. Иложи борича ўзини маҳкам үшларди-ю, оғриқ зўридан тишлари фижирлаб кетарди. Доктор уни машинадаги оппоқ чой-шабли каравотга ётқизмоқчи бўлган эди, бунисига кўнмади:

— Қўйинг-е, ётмайман... Салгина, салгина.

Этим увишиб кетди. Султон амакининг боғланган кўзларига қаролмай қолдим. Султон амаки:

— Ҳозирча хайр, биродарим,— деб Васяга қўл узатди.

— Хайр, тезда соғайиб келинг, дўстим!— деб Вася уни маҳкам қучоқлади, зўрға машинадан тушиб қолди.

Машина кўзгаларкан, Султон амаки қўллари билан тимис-киланиб мени қидирди. Мен қалтираганимча ёнига сурилдим. У, елкаларимни пайпаслаб, бошимни силади. Бир нималар демоқчи бўлди-ю, дейёлмади. Охири ўзим гап бошлайман:

— Қаттиқ оғрияптими, ада?

— Йўқ, ўғлим, салгина,— дейди у. Бир оз ўтириб, сўрайди:— Сенга Боря ўртоғинг телеграммани айтдими?

— Й-йўқ,— дедим баттар бўшашиб.— Қ-қанақа телеграмма?

— Ойингдан келган,— Султон амаки жомакори чўнтагидан қофоз олиб, менга берди.

Қўлларим қалтираб, қофозни очдим. Ундаги: «Дамир қандай қилиб бориб қолди? Ҳавотирдаман. Тез жўнатинг...» деган сўзларни ўқиб, қалтираб кетдим. Султон амаки деди:

— Почтадан Борянинг ўзи олиб келган эди. Олдида ўқиган эдим. Айтмабди-да сенга. Қўрқитмай қўя қолай дегандир-да ўртоғинг.

— Тўғри,— деб қўйди шу чоққача бурчакда чурқ этмай ўтирган Бўрон.

— Ия, Боря, сен ҳам шу ердамисан? Балли, вақтида ўртоғингни етказиб келдинг.

Шофёрнинг ёнида ўтирган доктор опа бизга қайрилиб:

— Бўлди энди, касални гапга солаверманглар,— деди.

Посёлкага етганимизда доктор машинани тўхтатди.

— Қани, болакайлар, тушиб қолинглар. Мен бу кишини касалхонага олиб кетаман. Сизлар эртага хабар оларсизлар. Дадангдан ҳеч хавотир бўлма, йигитча, тезда тузатиб юборамиз.

Шу гапни айтди-ю машинанинг эшигини очди. Мен бирдан йиғлаворай деб, Султон амакига ўзимни отдим. У бўлса:

— Ия, ия, ўғлим, сенга нима бўлди? Тошкентдай жойдан самолётда учиб келган азаматсан-ку. Уят эмасми йиғлаш, ўртоғинг айбиситмайдими? Менга ҳеч нима бўлгани йўқ. Салгина-да,— деб кулган бўлди, бошимни силаб қўйди.

Сезиб турибман, оғриги зўр-ку, ўзини мажбур қилиб куляпти.

— Бўлди, ўғлим, туша қолинглар. Эртага кўришамиз,— деб пешанамдан ўпди. Бўронга тайинлади:— Боряжон, сенга ишонаман. Ўртоғингни зериктирмай тургин-а?

— Хўп,— деди Бўрон машинадан тушиб. Мени ҳам машинадан тортиб туширди.

Машина бир зумда саҳро зимистонига сингиб кетди, мен шалвайганимча қолдим. Энди нима қилдим, қаёққа бордим?

— Юр, қудуққа.— деди Бўрон.

— Қудуқда нима бор кечаси?

— Томоша! Эҳе, унда ҳозир болалар гулхан ёқишган. Гулхан ёруғида водопровод қиришишган. Ҳамма, Қўлдош, Тоғагача ўша ерда. Юравер, кўрамиз.

Тепаликка чиқдик. Узоқдан уфқни ёритиб, гулхан шуъласи кўринди. Ана, ана, гулхан тобора баландроқ гуриллаяпти. Унинг учқунлари фир-фир шамолда мушакдай ҳар ёққа сочилади. Эҳ, мана икки йилча бўлди, пионерга ўтган вақтимдан бери, ловиллаган гулхан атрофида ўйнаганим йўқ! Айниқса кечаси, ҳозиргида оймўма ёруғида, чарак-чарақ юлдуз тагида гулхан ёқиши қандай гаштли-я!

Нариги тепага ўтамиз. Энди болаларнинг қий-чуви барада эшитилди. Уларнинг ҳаммаси хурсанд. Уларга яхши-да. Ташвишлари йўқ. Ўйлаганларинг бўлиб, ишинг юришгандан сўнг хурсанд бўлишинг керак-да! Менинг бўлса кўнглим хира, жуда хира! У ёқда телеграмма: «Дамир қандай қилиб бориб қолдӣ? Хавотирдаман. Тез жўнатинг...» Демак, ойим, бувим ўтакалари ёрилиб, кечалари ухламай чиқишаپти. Бу ёқда Султон амаки, энди кетишга кўнай деб турганда, шу аҳволга туш-

ди. Докторнинг гапи тўғридир: қарайдиган одами бўлганида бу аҳволга тушмасми балки? Мен ҳам қаролмадим. Менинг қўлимдан нима иш келарди. Ойим бўлганда бошқа гап эди-да. Қанақа эҳтиёт қиласидики уйда, худди ёш боладай. Нега кела қолмади-а ойим? Келмаганига нима, ким сабаб? Ҳа, Султон амакига айтгани эсимда: «Буларингиз мўмин-қобил болалар бўлгандаям бир нав эди. Улардай қайсар. Чапақай!..» Шунинг учун биз билан келишни хоҳламади-да. Бунинг устига бувим касалланиб қолди. Нега? Кўп уринди-да бечора. Уни кўп уринтирган ким? Яна бизми? Мен билан Попукми?

Бундан чиқди, ҳаммасига ҳам биз сабабчи эканмиз-да? Иўқ, иўқ. Наҳотки мен шундоқ бўлишини хоҳлаган бўлсан! Ҳеч хоҳлаган эмасман!..

## 19. ҚАЙТИШ

**К**ечаси ваҳимали тушлар кўриб чиқдим. Худди бир вақтдагидек лочин мени осмонга олиб чиқсанмиш-ку, мен унинг чангалидан айрилиб тушиб кетаётганмишман...

Қаттиқ овоздан уйғониб кетдим. Бўрон билан икковимиз апил-тапил бошимизни кўтарсак, Чўпонбобо тепамизда.

— Қани, тура қолинглар, бўталарим, илдамроқ. Кутиб қолди.

Чайла эшигида машина турган экан. Кечаси адамни олиб кетган қизил ёзувли машина. У нега келганини сўрамасимизданоқ, таниш шофёр бизни чақирди. Учовимиз чиқдик. Машина қўзғалиши билан, рўпарамиздан адам миниб юрган «Газ-69» чиқди. Унда Вася, Мамед, яна бир-икки киши кетаётган эди. «Виллис» тўхтаб, Вася бизнинг машинага ўтди.

Мен Бўронга, Бўрон менга қарайди: қаёққа кетяпмиз? Нега бунақа шошилинч? Бобой менинг кўзим бежолигини билди-да:

— Сенга машина юборибди даданг. Соғинган бўлса керак-да дарров. Сенинг баҳонангда биз ҳам кўриб келайлик.— деди. Кейин Васяга қаради.— Тунги смена дуруст ўтдими, болам. Жўнашиб кетдими ишинг?

— Йўргалаб кетди!— деди Вася.

— Йўргалаган бўлса, ошиқларинг олчи. Ўзларинг омади келган йигитсанлар-да,— деб қўйди бобой хурсандлик билан соколини силаб.

— Аммо,— деди Вася пахсадай қўлларини тиззасига шап

уриб,— жонини аямай ишни юргизди-ю, ўзи сафдан чиқди-да.  
Шунисига хафамиз.

— Яхши нафас қил, болам,— деди бобой астайдил ишонч билан.— Худо хоҳласа тузалади, докторлар давосини топади. Бот фурсатда қарабсанки, яна сафларингда юрибди-да.

Бу гапларни бобой мени тинчлантириш учун гапирдими ё чиндан ишониб гапирдими, билиб бўлмади.

— Айтганингиз келсин ишқилиб, отахон,— деб қўйди Ва-ся, чуқур нафас олиб.

Васянинг авзойидан адамнинг касали оғирга ўхшайди. Мен энди ҳеч кимнинг гапини эшитмасдан, ўзимча хаёл суреб кетяпман: докторлар даво топиб кўзини очаётганмикан, ё бўлмаса бутунлай... Йўқ, йўқ, бобой айтганча, «яхши нафас» қиласай. Кўзи очилиши керак. Очилади, албатта!

Ана, деразаларига оҳак суркалган, кўриниши совуқроқ бино. Касалхонадир. Машинадан тушамиз. Остонага қадам кўянимиз. Юрагим қинидан чиқиб кетай деб, типир-типир қиляпти: адам қай аҳволда ётганикан ҳозир? Мени танирмикан?

Кўрқа-писа одамлар кетидан йўлакка киряпман. Бирдан қаршимда адамни етаклаган доктор опа кўринди. Адамнинг кўзи боғлиқ эди. Бориб, қўлини ушладим. Дарров билди. Мени бағрига босди. Ўзим гап тополмайман. Ўзи бир нарса дер-микан дейман. Индамайди. Хафамикан?

Доктор опа ҳаммамизни ҳалиги машинага бошлаб чиқди. Ўзимча: касали енгил бўлса жавоб берганмикан, дейман. Сў-рашнинг иложи йўқ. Кетяпмиз. Адамга тўхтовсиз гапиришарди. Посёлкага қайтаяпмиз деган хаёлда эдим, бир пайт аэропортга келиб қолибмиз.

Одамлар адам билан мени аэропорт майдонига олиб чиқиши. Узоқ гаплашиб, хайлрашишди. Мен адамни етаклаб самолётга чиқдим. Шундагина Тошкентга қайтаётганимизни билдим. Билибоқ, юрагим орқамга тортиб кетди: севинишданми, чўчишданми — тушунолмасдим. Бир ёқдан — роса хавотир бўлиб эшикка термулишган ойим, бувим кўз олдимга келишди, уларни ҳозироқ кўргим келиб кетди. Иккинчи ёқдан — бу ерда орттирган янги ўртоқларим, алмат кишилар ва қизиқ ишларни кўзим қиймасди. Худди тарвузи қўлтиғидан тушган одамдай бўшашдим. Шу чоғ эсимга Лайка тушди. Фотоаппаратим-чи? Ия, айтгандай, дафтар, қаламларим-чи? Халтада борганича шундоқ қолаверибди. Каникулда мен ҳам бошқа болалар қатори кўрган-билгандаримни ёзиб бормоқчи эдим. Синфдошларим ёзиб боришганда, ўқитувчи «қани сеники?»

деса, нима дейман энди? Тағин уришадиган бўлди-да: «Уйин-қароқлигинг, бесарамжонлигинг қолмабди», деб.

Одам чуқур хаёлга ботса кўзи кўр, қулоғи кар бўлиб қоладими, дейман. Тўсатдан олдинга қалқиб кетдим-у, ҳушим жойига келди. Адам қалқигацимни пайқади-да, мени маҳкам ушлаб олди. Шу ушлаганча қўйиб юбормади. Энди бир гап сўраб қоладими деб хавотир бўламан. Йўқ, индамайди.

Гулдурос солиб самолёт осмонга кўтарилади. Мен фиддик ойнадан ташқарига қарайман. Ер билан осмон бир-бирига қўшилишиб кетгандай, ҳамма ёқ қип-қизил ловиллаб ёнаётгандай кўринади. «Нега бундай?» деб адамдан сўрайман дейману, гапим ёқмайдими, деб сўрамайман. Лекин дилимданни топгандай, ўзи сўраб қолди:

- Нимани кўряпсан, ўғлим?
- Осмонни.
- Қизилқумни-чи?
- Йўқ.

Адам бир хўрсиниб қўйди. Нега хўрсиндикин: Қизилқумдан узоқлашганиданми, энди уни кўришга кўзи етмаганиданмикан?

— Яхшироқ қара-чи: узоқдан Қизилқум қанақа кўринаркан?

Эгилиб узоқларга қарайман. Кўзимга худди оппоқ очилиб ётган пахтазор кўрингандай бўлди.

- Пахта! Оппоқ пахта!

— Йўғ-э!— дейди адам кулги аралаш.— Июнда пахта очилармиди! Булутдир?

Ха, ха, булут экан. Салдан сўнг, пахтадай сочилган майда булутлар бир-бирига хирмён-хирмон бўлди. Самолётнинг ҳамма ёғидан тоғдай бостириб келаверди. Эҳе, тағин самолёт уларга урилиб ағдарилиб кетса-я! Ваҳима босади. Кўзларим тиниб кетади.

Мени чалғитиш учунми, адам сўрайди:

- Саҳро сенга ёқдими?

Нима деб жавоб бераман: «Ёқди» десам, нимаси ёққанини ўзим билмайман. «Ёқмади» десам, худди саҳродаги ўртоқларимни хафа қилаётганга, уларнинг яхшиликларини унутаётганга ўҳшайман. Наҳотки ҳаммасидан кечсам, уларни қайта кўрмасам?

Адамнинг саволига жавоб бериш ўрнига, шошилиб сўрайман:

- Энди саҳрога қайтмаймизми, ада?

Адам бир оз ўйлаб олди-да:  
— Сенга боғлиқ, ўғлим,— деди.

Ажабланиб унга тикиламан. У жим бўлиб қолади. Кўзи юмуқ одамнинг нима ўйлаётганини, хурсандми-хафами, билиб бўлмас экан. Гоҳо жағини қимирлатиб, тишини ғижирлатиб қўйишидан, кўзи оғриётганга, бир нима алам қилаётганга ўхшаб кетади. Шунинг учун мен бошқа сўз сўрамайман. Факат ичимда ўйлаб кетаман: «Сенга боғлиқ», дегани нима дегани? Ахир ўзининг касали тутиб, кўзи бунақа бўлиб қолди-ку? Докторлар уни саҳродаң ҳайдай бериб, охири жўнатди-ку? Энди қайтиб боролармиди? Ойим бўлса, олдин ҳам боришига қарши эди. Энди-чи? Ойимнинг кўниш-кўнмаслиги менга боғлиқмикан. Адамга, бувимга қулоқ солмаган, менга қулоқ солармиди? Ҳеч-да!

Самолёт қаттиқроқ силкинди. Мен ўрнимдан қўзғалиб кетдим. Адам яна суяб қолди.

Самолёт пастлай бошлади. Хиёл ўтмай, ер кўринди. Тошкент, ана Тошкент!

Самолётдан тушдим. Адамни етаклаб, аэропорт майдонига юрдим.

Майдонда одам тирбанд. Шовқин-сурон. Ҳамма темир панжарага қараб интилади. Кўзимга бу одамларнинг ҳар бири икки-учтадан бўлиб кўринади. Қулоғимда худди карнай-сурнай чалаётганга ўхшайди. Шу пайт таниш бир қичқириқ эшитаман. Одамларга аланглайман. Ия, анави, тўда ичидан келаётган ким? Ойим эмасми? Ҳа, ҳа, худди ўзи, ўзгинаси!.. Бизни кутгани чиқибди-да. Қаердан билиби-а бизнинг келишимиzn?.. «Ойи!» дейман, томофимга бир нарса тиқилади. Ойим жон ҳолатда келади-ю, индамай-синдамай мени қучоқлаб олади, у юзим, бу юзимдан ўпади. Шу заҳоти бирдан афти тиришиб кетади.

— Бу нима қилганинг, ўзбошимча! Бу нима қилганинг, дайди!— деб қулоғимдан чўза бошлайди.

Мен пиқ-пиқ йиғлаб юбораман. Икки-уч қадам нарида туриб қолган адам буни пайқайди-да:

— Қўйинг, уни хафа қилманг!— дейди аста.

Ойим, ишчи кийимидағи, кўзи боғлиқ бу одам ким бўлди экан, деб унга бақраяди, қулоғимни қўйиб юборади.

— Адам, адам-ку!— дейман мен ҳиқиллаб, ловиллаган қулоғимни силаб.

— А-а?— дейди ойим чўзиб. Бир зум кўзлари бежо бўлиб

туради-да, бирдан бориб адамнинг елкасига қўлларини ташлади. Шу кўйи анча тургандан сўнг титроқ овозда:

— Нима бўлди сизга, нима бўлди? — дейди-ю, ҳўнграб юборади.

— Кўз оғриди. Салгина,— дейди адам ойимнинг қалтираган қўлларини ушлаб.

Кейин адамнинг бир қўлтиғидан ойим, бир қўлтиғидан мен тутиб, аэропорт биносиға кирамиз. Кўчага чиқаверишда ойим: «Шундоқ туринглар», дейди-да, тарозида юк тортаётган жойга ўтади. Ҳадемай, битта чамадон кўтариб чиқади. Ҳа, энди билдим: ойим бизни кутиб олганимас, қидириб боргани отланган экан!

Таксига тушиб, уйга кетяпмиз. Адам ойимга, кўзи боғлиқ ҳолда уйга бориши яхши эмаслигини айтди. Докторларнинг Тошкентдаги катта касалхонага ёзиб берган қоғозини кўрсатди. Шундан сўнг ойим мени кўчамизнинг оғзида тушириб қолдирди-да, адамни касалхонага олиб кетди.

## 20. МИТТИ ДЕМАНГ БИЗНИ...

**О** смондан тушганимдан бери бошимнинг айланиши, қулоғимнинг фувиллаши тинмайди. Кўзимга кўчалар жуда тор кўринади. Осмон нақ пастрлаб, томларни босиб тушаётганга ўхшайди. Иморатлар бўлса ҳар ёғимдан қисиб устимга афдарилаётгандай бўлади.

Саҳро қандай кенг эди-я: бошинг оққан тарафга кетаверасан, қанча югуриб-елсанг ҳам бирор уришмайди, тақиқламайди. Ойинг, бувинг: «Йироққа кетма, кўзингга қараб юр, ров бориб, ров кел» деб тергамайди. Кўча ўртасида қаққайганча, ола-була таёғини кўтариб: «У ёққа юрма, бу ёққа юр!» деб буюрадиган милиционер ҳам йўқ. Эртаю-кеч қуёндай тепадан-тепага сакрайсан, бўронда қумларнинг гирдоб уриб кўчишини кузатасан. Қизиқ, аломат кишилар... бургут билан овга чиқиш, кечаси гулхан ёқиши, «Ёнар дарё» ишини томоша қилиш, эҳе...

Мана уйимиз. Эшик қулф. Қўшниникидан калитни олиб очаман. Ҳовлимиз ҳувиллаб ётибди. Бувим, Попук қаёқда экан? Қўшни хотиннинг айтишича, ўтган куни Мирзачўлдаги холам келибди. «Сиқилиб кетибсиз, уч-тўрт кун яйраб келинг» деб бувимни олиб кетибди. Попук ҳам эргашити, албатта.

Бир ўзим нима қилдим-а уйда? Ана лиммо-лим ҳовузча.  
Ана ўрик тагидаги каравотим. Чарчаб келганман-у, ётиб ух-  
лолмайман. Бир чеккаси хавотирдаман: ҳали замон ойим ке-  
лади. Мени сўроқ қилиб, хўб таъзиримни беради. Унга нима-  
лар дейман? Ўзимни қандай оқлайман?

Юрагим хаприқади. Шунда болаларнинг шовқинини, ма-  
шина овозини эшитаман. Эшикка югурман. Синфдошларим  
иккита кичик мотоциклда пойга қилишяпти. Солиҳ ҳам бор.  
Мени кўрибоқ, Солиҳдан бошқалари олдимга келишади. Қа-  
ёкларда юрганимни суриштиришади. Айтиб бераман. Солиҳ  
ҳам яқин келиб эшитади. Гапимга бошқалар ишонсаям, Со-  
лиҳ ишонмайди.

— Қизилқумга бориб бўпти. Мирзачўлга борган, холаси-  
нигига! — дейди.

Бошқалар унинг гапига лаққа ишонишади, мени ёлғончига  
чиқаргандай лабларини сўлжайтириб, яна пойгага чопишади.  
Гапимга ишонмагани, пойгага қўшишмагани алам қиласи-  
менга.

Бояги таксида чамадони билан ойим келди. «Ҳозироқ сў-  
роқ бошланади», деб юрагим пўкиллаб турувди. Иўқ, сўроқ  
қилмади. Қайтага мени меҳмондай сийлаб тўрга ўтқазди-да,  
чамадондан қатлама, патирлар олиб олдимга тўкди. Эрталаб  
Чўпонбобо берган чапати нон билан куртдан бошқа нарса  
ичимга кирмай, яланиб турган эдим, очопатлик билан овқатга  
ёпишаман. «Ҳозир бошласа, овқат ҳам қолиб кетади», деб  
кавшамай ютавераман. Томоғимга тиқилади. Ўхчийман. Усти-  
устига чой ҳўплаб ўтказаман. Ҳиқичноқ тутиб қолади. Ойим-  
дан бекитиб тухумми, бошқа нарсами еганимда шунаقا ту-  
тарди. Ҳозир нега тутади, шошилганимданми — билмайман.  
Ишқилиб, эсон-омон қорнимни тўйғазиб олдим. Энди ойим  
нима деса деяверсин, деб турган эдим, дегани фақат шу бўлди:

— Ҷўл биёбонда хўб адабингни еб келибсан-ку, ўзбо-  
шимча!

Ким айтибди унга бунаقا деб? Адамми! Ё ўзи ичидан чи-  
қаряптими?

— Нега унаقا дейсиз, ойижон?

— Кўриниб турибди-ку афти-башарангдан. Қоп-қорайиб  
қотиб кетибсан!

Раҳми келиб айтаётган экан. Бўш келганидан фойдала-  
ниб, мен кучайдим:

— Яхшиям борганим денг, ойи. Адам дастёrsиз қийналиб  
қолган эканлар. Қарашиб турдим.

Ойим ишонмай лабини бурди. Мен тўхтамай, саҳрода кўрганларимни сўзлайман. Қийинчилик, сарсонгарчиликларни айтмасдан, нуқул яхшиларини айтаман. Бу ойимга ёқмади шекилли:

— Бўлди, бўлди, барини эшитдим,— деди.

Кейин мен ҳовузчада чўмилиб, тоза кийим-бош кийиб олдим.

Хуллас, бу ташвишдан осонликча қутулиб турибман, у ёғи нима бўлади? Адамнинг кўзлари очилармикан? Очилгандан сўнг, яна «Ёнар дарё»га қайтармиканлар? Қайтса, ойим борармикан, бизни ҳам олиб кетармикан?

Кунига ойим касалхонага қатнайди. Мен борай десам олиб бормайди. Адамнинг аҳволи қанақалигини ойимнинг чеҳрасидан пайқаб тураман: чеҳраси бузуқроқ бўлса — ёмон, очиқроқ бўлса — яхши.

Тўрт кун деганда, Қизилқумдан адам номига хат келди. Уни ойим очдию ўқий олмасдан менга берди. Шошиб, ажи-бужи қилиб русча ёзилган экан. Қйнала-қйнала ўқидим. Кейин ойим мени касалхонага олиб борди.

Адам бугун биринчи марта бирорвга етаклатмасдан йўлакка чиқибди. Бир кўзи камроқ заарланган экан, операциясиз, дорилар билан очилибди. Шундоқ бўлса ҳам ҳали хат ўқий олмас экан. Мен унга ўқиб бердим. «Ёнар дарё»дагилар унга кўпдан-кўп салом айтиб, соғлиқ тилаб ёзишибди. Колонна «чаққон йўрғалаётганини» айтиб, адамни хотиржам қилишибди. Иннайкейин, бир маслаҳат сўрашибди: Тоға, ўз хатосини бўйнига олиб ариза ёзиди, қайтариб ишга олишини сўрабди, аммо «Қўшоқнинг ичидаги бўшоқ бўлиб юрадиган одам керакмас», деб уни ишга олмай туришганмиш. Адам бу гапларни эшитиб кулди-да, дарров жавоб юбормоқчи бўлди: қалам, қоғоз топдириб, менга ёздирди. Соғлиғи аста-секин яхшиланётганини айтиб, охирида қўшиб қўйди: «Агар Тоға астойдил тавба қилса, кечириш мумкин... Ишларингизда муваффақият тилайман. Бот фурсатда дийдор кўришгунча хайр». Шу сўзларни ёзаётганимда, «яна қайтиб бормоқчимисиз?» доворадими деб, ойимга қараб қўйдим. Иўқ, индамади. Бу сўзлар ёқсан-ёқмаганлигини афтидан билиб бўлмайди.

Шу куни адам билан касалхона боғида анча гаплашиб ўтирик. Қоронги тушганда уйга қайтсақ, бувим билан Попук келишган экан. Ҳовузча бўйида энди у ёқ-бу ёқдан гаплашиб ўтирган эдик,чувур-чувур қилишиб болалар келиб қолишиди. Ажабланиб турсам, улар бирданига менга ёпишиб кетишиди.

Ҳа-хув дегунча қўймай оёқ-қўлларимдан тортқилаб, мени осмонга иргита бошлаши. Ойим билан бувимнинг капалаги учиб:

— Ҳой-ҳой, болалар, нима қиляпсизлар? Дамир сизларга нима ёмонлик қилди?— деб чуверлаши. Болалар бўлса:

— Кўрдик! Кўрдик! Айтиб бер ҳозир!— деб шовқин солишди.

Ҳаммадан кўра Солиҳ қаттиқроқ бақирав, қаттиқроқ силтарди. (Қасди бор-да!) Мен болаларнинг нега ундоқ қилишаётгани, ундоқ дейишаётганини билолмасдим. Нафасим оғзимга тиқилганча, зўр бериб:

— Нимани кўрдиларинг? Нимани айтаман?— дердим.

Болалар қўйиб юборишавермади. Жаҳлим чиқди. Ўнгланимда, Солиҳнинг елкасига осилиб олдим. Силтаб туширди. Энди белидан сиқиб олдим. Қаттиқ курашиб кетдик. Болалар қийқиришиб, чапак чалишарди. Ойим аралашса ҳам Солиҳ қўйвормай, мени ҳовузчага пишмоқчи бўляпти. Мен бор кучимни тўплаб жони-жаҳдим билан бир кўтариб отувдим, унинг ўзи шалоп этганча ҳовузчага ағдарилди. Сувда бақалоқ гавдасини аранг ўнглади, ҳовузчадан чиқа солди-ю, ҳамма ёқа сув сачратиб, лапанглаганча мени қувди. Мен ҳовлини гир айландим. Бора-бора лип этиб ўрикка чиқиб олдим. У ҳам кетимдан чиқмоқчи бўлди. Лекин жиққа ҳўл кўйлак-шими халақит берди. Болалар жиртак чалишди:

— Йиқилган курашга тўймас! Йиқилган курашга тўймас! Солиҳ бўлса, иложи қолмагандан:

— Кулмай қўя қолинглар! Шу митти сўйина қолсин деб, жўрттага йиқилдим,— деди.

Унинг бу гапига бувимнинг ғаши келди шекилли, ҳазил аралаш:

— Митти деманғ бизни, кўтариб урамиз сизни,— деб ўхшатиб жавоб берди.

Ойим ўшшайиб олган Солиҳнинг кийимларини сиқишиб юборди-да:

— Қўй, укажон, хафа бўлма, ўз ўртоғинг — билмай қилди,— деб юпатди. Кейин сўради:— Ўзларинг нега келдиларинг-у, нега бунақа қилиқ қилдиларинг, бир гап борми?

— Телевизорни кўрмадингизми?— деди димоги билан Солиҳ.

Болалар чекка-чеккадан ҳовлиқиб, ҳалигина экранда кўришган томошани гапириб кетишли. Билсам, «Ёнар дарё»даги ишларни телевизорда кўрсатибида. Ўша томоша ичидаги болаларни телевизорда кўрсатибида.

лар адамни, мени, Бўронни ҳам кўришибди. Бекорга мени ирғитишмаган экан осмонга.

— Эсизгина-эсизгина-я, томошадан қолибмиз-да! — дейишиди ойим билан бувим.

Кейин хурсандлик билан болаларни стол атрофига ўтқазиб, меҳмон қилишди.

Энди Солиҳ димоғидан сал тушган, бошқалар қатори у ҳам менга «Ёнар дарё»дан савол берарди. Сўзлаб берганларимга астойдил қулоқ солиб, ишонарди, ҳаваси келганини ҳам яширмасди. Саволлар кўпайиб, гапимиз чўзилганини кўриб, бувим деди:

— Қани энди, чироғларим, уй-уйига, тепа тўйига. Аллама-хал бўлди. Ойиларинг хавотир олиб ўтиргандир. Эртага ҳам гап қолсин.

Ўртоқларимнинг кетгиси келмасди. Бувим яна ҳайдагандай қилиб гапиргандан сўнг, ноилож қўзғалишди.

— Бўлмаса бундай, Дамирвой,— деди Солиҳ звено вожатийлиги эсига тушиб.— Пионерлар каникулдан қайтганда сбор қиласиз, ўшаңда ҳаммасини гапириб берасан, бўлдими?

Мен ҳам энди жичча ғурурландим-да:

— Кўрамиз, *айтар* «Ёнар дарё»га кетиб қолмасак,— дедим.

Малеевка — Тошкент.  
1964—1965.